

This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<http://books.google.com>






10454

Je. 8.1 p. 69

Boice



10454

Dec. 8. 1869

Boice

1842

CONSOLATION

DE PHILOSOPHIE.

Traittant du mespris de la fortune & du monde : de l'iniquité & iniustice procedente de calomnie : du moyen de resister à tous finistres euenemens : du souuerain bien : de la felicité des bons après ceste vie, & de la punition des mauuais : de la diuine prudence : du destin, liberal arbitre, & plusieurs autres belles matieres deduites avec vne singuliere edification du Lecteur.

Par SEVERIN BOECE : & mise
en François par le Sieur de Malassis,
de Mante.



Avec des Sommaires prefix à
chaque Prose.



A P A R I S,

Chez JEAN HOUZE, au Palais, en la seconde boutique de la gallerie des prisonniers, Et pres de la Chancellerie.

AVEC PRIVILEGE,

1645



A TRES-ILLVSTRE
ET TRES-BENIGNE
Mademoiselle de Viuone,
fille vnique de hault &
puissant Seigneur, Monsei-
gneur Ian de Viuone Mar-
quis de Pisani, &c.

MADEMOISELLE,
Ce traicté petit en
quantité, mais gra-
ue en qualité, m'est
tumbé entre mains, i'en ay recuei-
li les sommaires de chasque prose,
lesquels venans maintenant en lu-
miere, ie me suis faict accroire que
à ij

vostre debonnaireté me feroit cet
honneur de les recevoir de bon œil,
Et que la lecture d'iceluy ne vous
seroit desagreable, à cause de la gra-
uité du sujet, contenant plusieurs
solides instructions pour le cours
de la vie humaine parmy les de-
pravations & desbauches moder-
nes. Je le vous apporte donc, non
pas que luy ayant prefix vostre
nom i'estime l'ennoblir dauanta-
ge. on conoist assez l'illustre sang
de Monseigneur le Marquis, sa
sagesse & accortise, son humanité
& clemence, sa largesse & libera-
lité, sa constance & fidelité, sa gra-
uité avec douceur, sa valeur et
magnanimité, & toutes autres
vertus que non seulement nostre

nation, mais les estrangeres aussi
parmi lesquelles il a sous le tres-
exquis tiltre d'Ambassadeur de
plusieurs de nos Rois, irreprocha-
blemēt conuersé dés si long temps,
ont tousiours admirées en luy: des-
quelles on vous recognoist vrai-
ment heritiere, les ayant fait dès
vostre plus ieune aage reluire en
vostre personne, ainsi que toutes
les plus belles parties & perfectiōs
des plus accomplies vierges de la
Grece paroissoient en cet ant ex-
quis tableau de Zeuxis. bien ap-
prise que la beauté corporelle vui-
de de vertu ressemble à l'eau, chose
tres-bonne & tres-utile (dit Pin-
dare) mais qui coule aisément, &
que la terre hume en peu de temps.

à ij

joint que le voisinage d'icelle est
tres-dangereux, d'autāt qu'elle mi-
ne, sappe, amollit & destrempe
tout ce qu'elle bat de ses ondes.
C'est doncques seulement vne arre-
te tesmoignage du desir & de l'e-
sperance que j'ay de vous presenter
avec le temps chose de plus grand
trauail, si vous faites cette faueur
à cettuy-ci qu'il se serue de vostre
digne nom pour voir la lumiere.
Cependant

MADemoiselle, je sup-
pliray bien-hüblement nostre Sei-
gneur vous donner accroissement
de ses saintes graces, & accöplis-
sement de vos souhaits.

Vostre tres-humble & tres-obeissane
seruiteur, I. D. M.

AV LECTEUR.

LORSQUE i'entreprins ceste petite traduction, amy Lecteur, ie ne m'attédois point qu'elle deust iamaisenir en tes mains, ny qu'elle deust estre veüe d'aucun : car le but de mon intention estoit seulement de satisfaire au commandement qui m'auoit esté faict de le mettre en François, par personne, qu'il m'estoit impossible de toute impossibilité de pouuoir desdire, ny refuser. Et biẽ que ie cogneusse ceste entreprinse trop difficile pour moy, pour n'auoir iamaise esté que bien peu à l'estude, ny estre institué en la Philosophie: ie m'y hazarday pourtant, asscuré qu'il m'estoit mieux seant quitter vn peu de ma reputation, en faisant vn signalé tesmoignage de mon obeissance, que par vn refus me faire remarquer pour peu ciuil & ignorant du tout. Voila comment ie

à iiii

m'y suis embarqué, amy Lecteur, mais ie faisois bien mon compte de m'en acquiter legerement, representant seulement à peu pres le sens du discours, sans m'aheurter aux raisons de Philosophie, ny aux Poemes, & Vers interposez. Toutesfois la chose est succedée tout au rebours. car la mesme puissance qui m'auoit forcé à entreprendre, me contraignit encore à l'exécution selon son intention. De sorte que ie me mis aussi tost à tirer les Muses aux cheueux, & à les harasser de la façon que tu pourras voir. Que si tu n'y trouues les termes propres, & la Loy du Poeme bien obseruée, pren pour excuse que i'ay fait comme i'ay peu, & nō comme i'eusse bien voulu. encore me trouuerras tu en quelque sorte excusable, & sans reprehension, si tu viens à considerer que l'exercice est beau, & que tel passe-temps est vtile & profitable.

Domino Malaffisio.

Fatorem tacitis seu currunt omnia causis,
 Et torquet certa stamina Parca colo:
 Siue alterna regens cæco Vestigia vultu,
 Subdit non stabili Diua proterua rota:
 Heu natura homini statuit quàm scævus auarè,
 Vsuràmque meret lucis, in ære graui.
 Nam veluti glebas putres bos findit aratro,
 Et terit æterno turgida colla iugo,
 Dum stimulo fessos malè pungit villicus armos,
 Cuique assuevit, opus vomere mane nouat:
 Spargitur Aegeo veluti sine remige classis,
 Dum Boreas gelido verberat imbre rates:
 Aut nos præcipites trahimur sic tramite fati,
 Aut furit, incertas sors variatque vices.
 O miseri nimis, ætherea quò vescimur aura,
 Damnatum nocti, nec tegit Umbra caput!
 Nos, animal seu, sibi spe quòdque omnia spòdet
 Atque deos, cæli numina, iactat auos.
 Incerti ferimur rapidi ludibria casus,
 Et parili freno spesque metusque premunt.
 Pascua cum prona carpant animalia fronte,
 Nec somnos abigat publica cura lenes.
 Aut populi fauor, aut ventosi principis aula
 Vix patitur somni lumina melle lini.
 Vitæque per multos miserè iactata labores
 Inuidia semper subiacet acta Noto.
 Tot rapida felix inter contagia vite

Nullo mens, sensus turbine, mersa vadoi
 Sed velut auriga rota voluitur arte magistra;
 Quæ victrix domina frontis in arce manet.
 Et cui multa virens crescit post prælia palma,
 Spes vulgi infra se dum videt esse leues.
 Si quis in occulto pauidus non tabuit auro,
 Hac sapè ad veras semita duxit opes,
 Maiorique locum fortuna, iniuria fecit,
 Nec virtus fulget sit nisi pressa malis.
 Nescit in Elea quantum pugil audet arena;
 Cui nunquam tinxit liuida membra cruor.
 Sed tu sola homines inuictis viribus imples,
 O sophia, æterni vertice lata poli!
 Vipereos fœtus curarum, dente feroci
 Exarmas, mentis te sequiturque quies.
 Verùm acies oculis caligat ferrea, nube
 Obducta hæc ætas ferrea; tota riget.
 Nec sanguis sacri iam dudum degener aus
 Vidit vbi nostro tu sine thure lates.
 Primus Dadaleis radit Malasibus alis,
 Audax cælestes persequiturque vias.
 Ac offert (tu parce auso iam clara) videndam
 Vt cælo, vtiq; Ioui, Cœlicolisque solis.
 Ille etiam Gallo perfundit nectare pennas
 Remigio, & diues laberis ipsa nouo:
 Næque illi labor & studiū, firmo ordine, iunxit
 Alas inuicta Palladis, ille tibi.

N. Fillelius Quercetanus.



ARGUMENT

SVR LES LIVRES DE
la consolation de Philo-
sophie de S. Boece.

DE v x choses prin-
cipalement ont ac-
coustumé, par le
iugement de plu-
sieurs, rendre quelque œuvre
plus singulier & recomman-
dable : dont la première est
le nom de l'Autheur, & la se-
conde l'inscription du Liure :
Estât bien certain que par ces
deux choses, nous sommes au-
cunement instruits & infor-

â vj

A R G V M E N T.

mez tant de la probité & reputation de l'Autheur entre les doctes, que subiect & maniere qu'il doibt traicter: & par consequent du fruiet & delectation, que nous peut apporter la lecture d'un tel oeuvre. C'est pourquoy en examinant ces deux poincts nous auôs deliberé traicter par mesme moyen de la vie de Boece nostre Autheur: & puis toucher le plus brieuement que faire se pourra, ce que concerne l'argument de ses liures. Mais auant qu'y entrer, il ne fera à mon aduis hors de propos, retirer le lecteur peu versé en la cognoissance de l'an-

ARGUMENT.

tiquité, sur la difficulté en laquelle de prime face il pourroit entrer, pour la diuersité & numerosité des Noms, d'ot l'Autheur se trouue illustré en l'inscription de son Liure, en ces mots, AVITICIVS, MANLIVS, TORQVATVS, SEVERINVS | BOETIVS. L'Autheur à la verité a suiui en cela, la façon & commune maniere de faire des anciés Romains, qui ne se contentoient pas seulement d'un Nom propre, mais en auoiét communément plusieurs. Ce qui procedoit principalemēt des cas fortuits & accidentaires euenemens, d'ot ils estoiet

ARGUMENT.

ordinairement accompagnez en leurs aetiōs: cōme il aduint à cest ancien Torquatus, qui pour auoir vaincu & subiugué le Gaulois, & pour despouille & trophée de sa victoire, réporté le colier d'or, fut ainsi surnommé entre les siens: Si bien que tousiours depuis ce nom de Torquatus demeura comme propre & peculier à sa posterité. Ce qui nous peut donner occasion d'estimer, qu'ayant nostre Autheur retenu ce mesme nom, il peut estre descendu de ce personnage là. Au reste, ce seul exemple pourra seruir pour l'intelligence des autres noms

ARGUMENT.

de l'Authcur , la plus-part
desquels sont seulement de
dignité & honneur. Quant
à la vie, Trittenham Abbé,
qui a faict vn traicté des Au-
theurs Ecclesiastiques , en
parle ainsi: Boetius, Manlius,
Seuerinus, Consul ordinaire
de Rome , Philosophe , O-
rateur & Poëte insigne, hom-
me au reste fort docte és li-
ures sacrez , & des mieux ver-
sez de son tēps és lettres pro-
phanes, estoit gēdre de Sym-
machus Patrice. Il estoit aussi
fort bien versé és lāgues Grec-
que & Latine, comme celuy
qui auoit trāslaté de Grec en
Latin, plusieurs volumes d'A-

ARGUMENT.

ristote, & autres bōs Autheurs Grecs, n'estant en ses escrits moins disert & eloquēt q̄ Cicerō mesme. Ce mesme Auteur poursuyuant son discours, dit de lui, q̄ pour chose certaine il auoit plusieurs fois conuersé & cōmuniq̄ué avec saint Benoist qui estoit de son tēps, & iusques à estre paruenue en grande dilection & amitié avecques luy : mesmes que souuentefois il s'estoit trouué à sa table avec Tertullius le Sénateur pere de Placide le religieux. Puis ayant quelque peu discouru sur ses escrits, & fait vne sommaire descriptiō de ses œuures, il adiousté : Il

ARGUMENT.

mourut la mesme année que
 feirét Symmachus Patricius,
 & le Pape Iean, sous le regne
 de l'Empereur Anastase : ayāt
 esté mis à mort par le com-
 mandement de Theodoric
 Roy des Goths en la ville de
 Rauenne, où il estoit prison-
 nier enuiron l'an de nostre sa-
 lut D.xxiiij. apres vn fort lōg
 & iniurieux exil. Et depuis fut
 canonizé à Rome, sous le nō
 de Seuerin, & inferé au catalo-
 gue des autres saincts. Voylā
 ce qu'en dit cest auteur. La
 cause, au reste, de son exil pro-
 ceda de ce que, s'estant plu-
 sieurs fois courageusement
 opposé aux vitieuses & tyrā-

A R G V M E N T.

niques entreprinſes de Theodorick, & ayant deliuré de ſes
 mains pluſieurs bons & vertueux perſonnages, qu'il auoit
 delibéré faire mourir, cet inique Roy voyant qu'il ne
 receuoit en ſes deſſeins & malheureuſes conſpirations,
 empeschement quelconque que de Boëce, delibera de le
 faire mourir ou exiler à quelque pris que ce fuſt. Et pour
 plus facilement y paruenir, trouua moyen de le faire ac-
 cuſer d'auoir ſouſtraict certaines lettres, par leſquelles le
 Senat Romain eſtoit accuſé enuers luy, & empesché qu'elles
 ne fuſſent paruenues à ſa

ARGUMENT.

cognoissance : & aussi d'auoir enuoyé lettres à l'Empereur Anaftaze , pour le prier de pourchasser la liberté & deliurance des Romains. Tellement que sous pretexte d'une si honnestre couuerture , il le bannist & relegua en la ville de Paue. Au moyen duquel bannissement , se voyant Boece , priué & decheu de la grandeur en laquelle il auoit esté de parauant , se mit à composer ces beaux liures de la Cõsolation de Philosophie , tant pour en receuoir luy-mesme cõsolation & soulagement en ses miseres & calamitez , que pour seruir aus-

A R G V M E N T.

si à mesme effect, à ceux qui
 comme lui, estoient inique-
 mēt bānis & exilez de leurs
 pais. imitant en cela ce grand
 personnage Ciceron, lequel
 (ainsi que luy-mesme en rēd
 tesmoignage) se voyāt priué
 de l'administration de la cho-
 se publique, & que l'estat d'i-
 celle estoit reduict au poinct
 d'une execrable & insuppor-
 table Tyrannie, se retira en
 l'extremité de ses ennuis &
 tristesses, à l'estude de Philo-
 sophie, comme à vne retrai-
 cte trefasseurée & port infal-
 lible de consolation. Aussi à
 la verité est elle diuine & ad-
 mirable, & qui (comme di-
 soit Aristote) nous apporte

ARGUMENT

en toutes nos actions vn singulier plaisir, estant seule, qui nous peult entieremēt retirer d'un iuste regret que nous pourrions concevoir sur nos prosperitez passées : & nous faire ioindre au contentement d'un estat present, quelque calamiteux & miserable qu'il soit, sās iamaiz permettre que nous entriōs tant soit peu aux termes de quelque desespoir ou sinistre cogitation. Ainsi que nous en red bon tesmoignage nostre Autheur, sans en aller plus loing rechercher d'autres exēples, lequel receut vne consolation & contentement incroiable de s'estre rāgé à ce party, vray & vnique

A R G V M E N T.

moyen, pour tromper l'ennuy & tristesse que iustement il eust peu concevoir à cause de son exil. Au demeurant le subject & principal argument de ses liures, est la Cōsolation, qui est fondée sur le mespris & contēnement de la fortune & du monde: parmy laquelle il insere fort industrieusemēt sa deffence à l'encōtre de la calōnieuse & faulse accusation contre luy proposée: mōstrant clairemēt l'iniquité & iniustice du iugemēt de son exil. Voult à son exēple induire tous ceux qui se trouueroyēt en aduersité de ne perdre cœur: ains virilemēt résister aux sinistres euene-

ARGUMENT.

més, esquels ils se trouueroiét
 precipitez par l'iniure & im-
 petueux orage de la fortune.
 Quant à la façon d'escrire, el-
 le est diuerse. car il a escrit en
 prose fort elegamment; & si bié
 que plusieurs ont creu, qu'il
 n'estoit en son lágage de beau-
 coup inferieur à Cicéron. Il a
 aussi escrit en vers à l'imita-
 tion d'un ancien Poëte appel-
 lé Martion Capella, qui auoit
 auparauant tenu ceste mesme
 forme & maniere d'escrire,
 en la description du maria-
 ge de Mercure & Philogia. Ses
 vers sont elegiaques, qui est
 vne maniere propre pour tou-
 tes deploratiōs, cōme de faict
 aussi il se plainct de son mal-

A R G V M E N T.

heur & defastre, auquel la Philosophie est induicte se presenter & le cōsoler, lui faisant cognoistre l'instabilité de la fortune, & q̃ les biens tēporels sont vains & trāsitoires, disputāt fort & ferme du souuerain biē, & enquoy il cōsiste. Aussi de la felicité & prosperité des bōs, & du loier qui leurest deu & préparé: & au cōtraire, q̃ les mauuais ne peuuēt à la fin cuitter la punitiō de leurs crimes. Elle dispute aussi de la diuine prudence, du destin, de la fortune, & du liberal arbitre, ensemble de plusieurs autres belles matieres, qu'il prēd occasiō de traiter à la suite des precedētes.



LA CONSOLATION
DE PHILOSOPHIE.

PAR SEVERIN BOECE.

LIVRE PREMIER.

Premier poëme du premier liure.



MOY qui iadis des parfaites chan-
sons
De ma ieunesse ay faict ouyr les
sons,

Vieillard, ie viens lamentable me plaindre,
Et mes malheurs en tristes vers depeindre.
Vers qui me sont dictex par les neuf sœurs,
Autant que moy tristes pour les douleurs,
Qui de vrays pleurs m'arrousent le visage.
Ny le malheur, ny crainte de l'orage,
N'ont peu forcer ce beau troupeau diuin,
De s'escarter vn pas de mon chemin.
Ce fut iadis l'honneur de ma ieunesse,
C'est or' l'appuy de ma blanche vieillesse.
Certes, le mal mon aage a preuenu,
Faisant fleurir au chef le poil cheuu,
Auant le temps, & ma peau large ride

A

CONSOLAT. DE PHILOS.

Dessus mon corps de sang chaleureux vuyde.
On doit la mort bienheureuse appeller,
Qui ne vient point au bon heur se mesler:
Mais qui accourt lors que quelqu'un l'appelle
Pour limiter sa fortune cruelle.

Las elle est sourde, & destourne le front
Des malheureux qui prieres luy font,
Et ne veut point leur siller la paupiere,
Des biens fuitifz ie me plongeois n'aguere
Dedans les flots, & m'assailloit alors
Que la fortune avec ses vains trespors
M'amignardoit, & que j'auois enuie
En cest estat me conseruer la vie.
Mais maintenant qu'elle a le front troublé,
Elle me fuit à grand pas redoublé,
Me prolongeant la vie miserable.

Helas pourquoy pour vn bien si muable
Vous qui m'auex fidèlement aymé,
Heureux en vain m'auex vous estimé?
Qui tombe ainsi, peu sage, ne prend garde
D'asseoir ses pas qui glissent par mesgarde,

SOMMAIRE DE LA I. PROSE.

Boëce introduit icy la Philosophie le consolant en son affliction. Et faut noter que luy desolé, & elle consolant, ne representēt autre chose, qu'un esprit dolent & oppressé par la

sensualité; & la raison qui le reconforte par la rigueur de sâpience. Premièrement il descript comme elle luy apparut, en quel temps, lieu, forme, visage, couleur, habits & viuacité. Secondement, les ornemens & enseignes qu'elle portoit en ses mains. Tiercement, ce qu'elle fit alendroit de sa personne. Or il luy assigne vne forme feminine, d'autât que comme la femme nourrit de laiçt les enfans : aussi la Philosophie accommode aux moins parfaicts, vne doctrine aisée à comprendre : & aux esprits troublez, des remedes debonnaires pour rasserenier leurs esmotions.

P R O S E II.

A I N S I que ie discourois ces choses en moymesmes, & que ie m'apprestoïis pour deplorer mes infortunes d'un style douloureux & lamentable, il me fut aduis que ie veis au dessus du cheuet de mon liçt, vne Dame fort venerable, ayant les yeux ardents & beaucoup plus clair-voyans, que ne sont communément ceux des hommes. Sa couleur estoit fort viue, & monstroit vne telle vigueur que l'on ne l'eust sceu croire estre de nostre siecle ny de nostre aage. Quant à sa taille, elle estoit si variable que le iugemēt en estoit doubteux. Car tantost il sembloit qu'elle ne surpassast

A ij

point la commune grâdeur des hōmes, & soudain il sembloit que de la teste elle touchast au ciel : & quelquefois encor, quād elle s'esleuoit, elle passoit oultre, & trompoit ainsi la veuë de ceux qui la vouloient regarder. Ses habillemens estoient d'une estoffe fort subtile, & tissus avec grand artifice, d'une matiere indissoluble : qu'elle mesme (comme depuis ie peux comprendre) auoit de ses propres mains faits & tissus. La beauté desquels estoit voilee & obscurcie d'une certaine crasse, que le temps met aux choses dont l'on ne tient compte, cōme l'on void aux tableaux enfumez.

Au bort d'embas d'iceux habillemens estoit tissu vn caractere semblable à cestuy cy, π. & au haut vn semblable à cet autre, θ. & de l'une à l'autre de ces lettres, y auoit de certains degrez & eschelons, par lesquels on pouuoit facilement monter de celuy d'embas à l'autre d'en haut. & si estoient les vestemens rompus & deschirez en plusieurs endroicts : & chacun de ceux là qui y auoit mis les mains avec trop de violence, & sans respect, en auoit emporté la piece qu'il

*L'un signifie
praticque, &
l'autre theori-
que.*

auoit peu. Elle tenoit en sa main droicte
aucuns liures, & en l'autre vn sceptre.
Soudain qu'elle eut apperceu autour de
mon liēt les Muses poëtiques, qui don-
noient force & suiet à mes plaintes &
lamentations, s'esmeut vn peu, & les re-
gardant de trauers : *Qui* (dit elle) a per-
mis à ces eshontées & fascheuses fem-
mes d'entrer en la chambre de ce mala-
de ? qui ne sçauent pas seulement reme-
dier à son mal, mais encore de leur
doux venin l'y nourrissent & entretien-
nent. C'est vous autres qui avec les espi-
nes infructueuses de vos affections, fai-
ctes mourir les fruiets delicieux de la rai-
son : & au lieu de rendre l'entendement
libre de toutes passions, vous le rendez
serf & l'assuiettissez à icelles. Et dea, si
vos flateries & mignardises m'auoient
enleué quelque homme commun & de
peu, à l'aucture m'en soucieroi ie moins ;
Pource que perdant vn tel personnage,
ie ne m'en sentirois point offencée :
Mais vous m'ostez cestuy-cy avec vos
mignardises & belles caresses, qui a esté
nourry & esleué en la Grece, en l'Acade-
mie & eschole des Stoiques. Sortez d'ici

A iij

CONSOLAT. DE PHILOS.

Serenes vaines & folles, qui ne cessez point, & ne mettez iamais fin à vos al-
lechemens & flateries, que vous n'ayez
donné la mort, & me laissez, & à mes
Muses, auoir soing de cestuy-cy, & de
le guerir. Ceste compaignie toute trou-
blée de telle reprimende, baissant la teste
tesmoigna sa honte par la rougeur de
son visage, & sortit de la chambre. Et
moy, qui pour la grande abondance de
pleurs & larmes auois les yeux tout trou-
blez, & enfoncez en la teste, ne peuz ia-
mais comprendre qui estoit ceste Dame
de si grande autorité, & qui parloit si
brauement. Je demeuray tout estonné,
& ayant la venë basse, & les yeux fichez
en terre, i'attendois ce qu'elle voudroit
faire de là en auant: & elle s'approchant
de moy, s'assit sur le bord de mon liçt, &
me regardât au visage que i'auois char-
gé de larmes, & panché vers la terre,
pour la douleur que ie sentoie: com-
mença à se plaindre des passions qui af-
fligent & tourmentent noz ames en ce-
ste sorte.

POÈME II.

L Ors hélas que la raison cede
A la volupté, qui conduit
L'homme léger qu'elle possède,
Il se noye nageant de nuit
Dans la mer des affections
Qui ondoie de passions.
Luy qui le ciel auparavant
Tournoyoit d'une course isnelle,
D'un pol à l'autre mesurant
Des astres la course eternelle,
Voyant celui qui le iour luyt,
Et l'autre qui pare la nuit:
Voyant des estoilles brillantes,
Le cours fidelle & arresté,
Et de celles qui sont errantes
La variable fermeté,
Ce qu'ils ont de bon ou peruers,
En leurs contournemens diuers:
Sçauoit ce qui conçoit le vent
Qui bruit dessous l'ombre marine,
Quel esprit meult le firmament,
Et qui d'autre cours achemine
L'astre des Indes qui doit choir
Aux rines de l'Espagne au soir.

A iiii.

CONSOLAT. DE PHILOS.

Quel vent l'horreur des cieux tempere
 Esmaillant la terre de fleurs,
 Quand nous auons la primeuere,
 Ce qui dore les espics meurs,
 Durant le temps chaud de l'Esté,
 Et qui fait la fertilité.

Qui les grappes au pampre attache,
 Que l'Automne vient conseruer,
 Dont le vin qui le soing relasche,
 Ou fouille afin de le cuuer,
 Et a les secrets recherchez
 Que la nature auoit cachez.

Ore sans cœur il gist à terre,
 N'estant guide de sa clarté,
 Et va sous le ioug qui le serre
 Et le tient aux pieds arresté,
 Et courbe son chef affligé
 Soubz le faix dont il est chargé.

SOMMAIRE DE LA II. PROSE.

La Philosophie ayant par certains signes de scouuert le mal de Boëce, s'employe plustost à luy donner remede, qu'à le plaindre beaucoup. Et de faict elle fournit de tressuffisantes armes pour combatre les algarades de fortune, & chasser de l'entendement le voile qui luy bande les yeux, & l'empesche d'aprehender les choses celestes.

MAIS il est plustost temps de luy donner remede, que de s'amuser à se plaindre. Lors ayāt la veüe sur moy arrestée, me parla ainsi: Estes vous celuy qui autrefois nourry de nostre lait, & esleué de nos viandes, estiez arriué à ceste force d'esprit, que l'on desire aux hommes perfects? Certainement nous vous auions pourueu de telles armes, que si vous ne les eussiez point desdaignées ny reiettees, vous auriez à ceste heure dequoy vous deffendre avec vne inuincible fermeté contre toute infortune. Ne me cognoissez vous point? vous ne dites mot, vous tenez vous de parler, ou de honte, ou pour estre estonné? Que pleust à Dieu que ce fust honte. Mais (las!) ie m'apperçoy, que vous estes de quelque trouble fort affligé. Et me voyant non seulement coy, mais sans langue, & du tout muet, elle mit tout doucement sa main sur mon estomac. Le danger en est dehors (dit-elle) il est en lethargie, mal assez commun à ceux qui ont l'esprit trompé de quelque illusion: Il est vn peu hors de soy, mais

A v

CONSOLAT. DE PHILOS.

on le remettra facilement, s'il nous peut
vne fois cognoistre. Et afin que cela
soit, nettoions luy les yeux, qu'il a of-
fusquez & veillez d'une nuee des cho-
ses mortelles. Soudain d'un des coings
de sa robe, elle m'essuya les yeux, que
j'auois troublez & tout chargez de lar-
mes.

POEME III.

Quand le moëtte vent assemble
Tant d'espais broüillas ensemble,
Qu'un obscur & gros nuage
T'esmoing certain de l'orage,
S'estend en l'air sous les cieux,
Le soleil fuyt de noz yeux,
Et caché plus ne nous luyt
Non plus que s'il estoit nuit,
Combien qu'à demy du iour
Il n'ayt acheué son tour.
Mais ceste nuee obscure
Rend là face claire & pure
Du ciel, & le grand flambeau
Alors se monstre plus beau,
Si par le vuyde de l'air
Aquilon s'en vient soufler.

*Ainsi à son doux langage
Des yeux i'ay receu l'usage
Que i'auois desia noyex
Des pleurs qu'elle a nettoyez.*

SOMMAIRE DE LA III. PROSE.

Voici Boëce esueillé cōme d'une lethargie: lequel premieremēt discourt comme il reconut avec admiration celle qui se presentoit inopinément à luy, laquelle ne laisse iamais au besoin ses nourrissons: notamment ceux qui par impostures & calomnies souffrēt persecution. Secondement, elle vient à montrer, que ce n'est pas chose nouuelle de voir les sages affligez en ce monde, auxquels elle appréd à se roidir contre les bourraiques des meschans, qui ne pouuans offenser l'ame des gens de bien, exercent leur rage & passions alencontre de leurs corps & renommée.

PROSE III.

SANS autre chose faire, les nuées de mon affliction furent soudain dissipées, & commençay à voir & à me rassurer, pour cognoistre qui estoit celle qui me vouloit donner remede: & si tost que ie l'eus apperceuë, & ietté ma veuë sur elle, ie cogneus que c'estoit dame Philosophie, en la maison de laquelle dès que i'estois ieune i'auois esté

A vj

nourry & esleué : A laquelle adressant ma parolle, ie luy dis : O maistresse de toutes vertus, issuë de la plus haute partie du ciel, qui vous a amenée en ces deserts, où ie suis relegué & banny ? Estes vous à l'auenture accusée à tort comme moy, & tourmentée de quelques calomnies & impostures faulces ? Ah mō nourrisso (dit-elle) ie ne vous veux pas abandonner, ny vous faillir au besoin, ains plus tost vo⁹ aider à supporter la charge, qu'à mō occasion l'on vous met à sus. croiez que ie ne pouuois pas vous laisser aller seul, & ne vous accompagner point en quelque lieu que vous allassiez, estant innocent comme vous estes. Et quoy ? on auroit pensé que i'eusse eu crainte d'estre accusée auecq'vous, & que i'eusse eu peur de cela, cōme de chose nouuelle, & que iamais l'on n'eust veu aduenir. Auez vous opinion que ce soit la premiere fois, que les sages ayent esté tourmentez & affligez par les fols ? N'auons nous eu iamais assez de fois à combattre, auāt mesmemēt que Platon fust au monde, auec l'outrercuidāce & temerité de la folie ? Et de son viuāt, son mai-

ſtre Socrates ne fuſt-il pas tant calomnié & tourmenté, qu'il eſleut plus-toſt vaincre en mourant vertueuſement, que de viure d'auantage? & apres ſa mort, comme la ſecte des Epicuriens, celle des Stoiques, & toutes les autres s'eſſorçaſſent de raur ſon heritage, & chacune d'elles s'en approprier comme de choſe ſienne, ou comme de quelque butin qu'ils euſſent conquis, ie feis ce que ie peuz pour l'empescher. Mais à la fin ils tiraillerent tant contre moy, qu'ils rompirent le veſtement que moy-meſme i'auois faiſt, & chacun d'eux emportant la piece qu'il en peult auoir, s'enfuyoit pensant m'auoir toute. De là aduint que pluſieurs mal-aduiſez voyans en ceux là quelques apparences de mon veſtement, creurent qu'ils eſtoient de ma ſuite: & beaucoup ſuiuans en cela l'opinion du vulgaire, furent deceuz & trompez. Mais ſi vous ne ſçauéz d'auen- ture l'occaſiõ de la fuite d'Anaxagoras: pourquoy Socrates prit le venin, qui fut cauſe des tourmens de Zenon, pour eſtre eſtrangers: Vous ne pouuez ignorer ce qui aduint à Camnius, à Seneque,

A vij

& à Soranus. car la memoire de ceux là n'est pas beaucoup ancienne ; mais bien celebrée, & qui n'ont esté amenez à la mort que pour auoir esté instituez en noz mœurs, & viuans selon noz preceptes, se monstrent du tout contraires & differens des meschans : Desquels combien que le nombre soit infini, on ne le doit pourtant craindre comme celuy qui n'est guidé, ny gouuerné d'aucun, & qui se laisse transporter çà & là, cōme la folie le meine & conduit. Que si de fortune il fait quelquefois mine de se renger en quelque ordre, & de nous vouloir assaillir, la raison qui tient nostre party, soudain retire ses gens au dedans : lors eux ne pouuans faire sur nous aucune entreprise, s'amusēt à piller & saccager au dehors choses de peu & inutiles: dequoy nous nous mocquons, de les voir tant apres chose de nulle valeur : Assurez que leur fureur ne nous peut nuire, estans retirez en lieu où la temerité & la folie n'oseroient en façon du monde nous affronter.

POEME IIII.

Celuy qui sçait viure bien,
Ayant l'esprit franc & libre,
Et qui peult n'estimer rien
Le destin, & si sçait suyure
Sans se monstrier alteré,
Et l'une & l'autre fortune;
Comme si tousiours fust vne,
Avec vn front assuré:
Il ne s'estonne de veoir
Des flots l'escumeux orage;
Ni ne se peut esmouuoir
D'une vomissante rage
Des feux esclancez en hault:
De la plus afreuxse cuue,
Du mont ardent de Vesuuë.
De tout cela ne luy chault.
Il se soucie aussi peu
D'ouyr bruire le tonnerre;
Et si ne craint point le feu
Qui les haults sommets atterre.
Quand Iupiter courroucé
Arme sa dextre de fouldre,
Pour brusler les corps en pouldre
De ceux qui l'ont offensé.
Qui fait donc pallir d'effroy
Les chetifs sans assurance

CONSOLAT. DE PHILOS.

De l'ire d'un cruel roy
 Qui n'a dessus eux puissance?
 Car si l'esper de ton cœur
 Ne peut la constance enfreindre,
 Si le mal ne te fait craindre,
 Tu desarmes sa fureur.
 Celuy qui espere ou craint,
 De sa liberté n'est maistre,
 Et peu hardy est contraint
 Bas souuent ses armes mettre:
 Car hors de son lieu ietté
 Luy mesme forge vne chesne,
 Dont en apres on le trayne
 Priué de sa liberté.

SOM. DE LA IIII. PROSE.

Icy Boëce est exhorté à sauouer la precedente reprehension, & reueler sa maladie & le sujet de sa fascherie. Et premierement il confesse que les orbes coups de fortune l'estonnent, tant par le sentiment des iniures faites à son innocence, que par le souuenir des accidens auenus à d'autres. Pour premier chef des perturbations de son esprit, il pose son iniuste bannissement: pour le deuxiesme, qu'il se void frustré de la récompense deuë à ses bienfaits & merites: pour le tiers, son inique condamnation: pour le quart, l'offense faite à sa reputation, voire par gens stigma-

tifez & criminels infames , avec des procedu-
res du tout déraisonnables , tolerées neant-
moins par la Iustice, pour conuiuer aux pas-
sions d'un mauuais Princee. Toutes lesquelles
considerations troublent estrangement l'es-
prit de Boëce: mais par l'estude de Sapience il
se resoult que la condition des gens de bien
en ce monde est d'estre en cōtinuelle espreu-
ue & de chercher ailleurs le salaire de leur
innocence & bonne conuersation : celle des
meschans, de iouir çà-bas de toutes les com-
moditez de ce siecle, qui les rendront d'au-
tant plus inexcusables deuant Dieu.

PROSE II.

AVEZ vous entendu ce que i'ay dit?
le comprenez vous, ou si vous estes
comme vn asne au son de la lyre? Pour-
quoy plorez vous? & à quel propos ier-
tez vous tant de larmes? Dictes où le
mal vous tient, ne le celez point. si vous
voulez guerir, il faut descouurir vostre
vlcere. Lors reprenant vn peu mes es-
prits: Fault-il (dis-je) que ie vous racon-
te mon mal? n'est-il assez cogneu & ma-
nifeste? & ne void on point comme ie
suis estrangement traicté de la fortune?
ne le pouuez vous pas iuger me voyant
en ce lieu relegué où ie suis? Péssez vous
que ce soit icy le cabinet, auquel vous
auez prins place en ma maison, & où

tant de fois nous auons discoursu ensemble des sciences tant diuines que humaines? Auois-je tel port & telle cōtenance, lors que vous & moy recherchions les secrets de la nature? que vous me rendiez raison du cours des astres, & que ie m'estudiois de composer ma vie & reigler mes mœurs & actions à l'exemple de l'ordre celeste? sont-ce-cy les guerdons & récompenses que ie deuois receuoir, pour vous auoir obey & suiui? N'est-ce pas à vostre adueu que Platon disoit, que les Republiques seroient heureuses, ou qui seroient gouuernées par les Philosophes, ou quand les gouuerneurs d'icelles s'addonneroient à l'estude de Philosophie & de Sapience? Et par luy mesme ne m'avez vous pas aduertty qu'il estoit necessaire, que le sage prinst le soing du gouuernement de la Republique, de peur que venant à estre gouuernée par les meschans, les bons n'en patissent & n'en receussent dommage? I'ay recherché de mettre ceste opinon que i'auois de vous particulierement apprise parmy mes estudes, en œuvre, & me suis du tout ad-

donné au maniement des affaires publiques, & vous & ce grand Dieu qui vous introduit en l'entendement des hommes sages, m'estes tesmoins & sçavez si j'ay prins aucun magistrat, ou si ie me suis entremis du gouuernement, sinon pour le commun bien & vtilité de tous les bons. De là est aduenü que j'ay eu beaucoup de disputes, & de grandes querelles avec les meschans, & n'ay iamais crainct d'offencer les grands, pour tenir le party du droict & de l'equité. Combien de fois me suis-ie opposé & rendu contraire à Conigastus, qui vouloit trauailler & molester le pauvre, & luy raur son bien par force? Combien de fois ay-ie empesché Triquilla Maître d'hostel du Roy, de continuer les torts & iniures qu'il faisoit à chacun? Et combien de fois me mettant en danger, ay-ie prins en ma protection les pauvres, que l'impunie auarice insatiable des barbares molestoit & trauailloit? Iamais aucun ne m'a peu destourner de ce qui estoit iuste, pour me faire faire iniustice. Et quand les biens de ceux du pays ont esté prins & ravis, soit par les larre-

cins d'aucuns particuliers , ou pour les tailles & impositiōs, ie n'en ay eu moindre desplaisir que ceux à qui il touchoit: Et ayant mesmes au temps d'une grande famine & extreme charté, esté permise & publiée vne traicte & leuée excessiue de grains qui eust du tout appauury la Champagne d'Italie, qui est maintenant la terre de Labour, non pour autre raison que pour l'vtilité commune, j'entrepris de l'empescher , contre le capitaine du Palais qui en estoit l'auteur , & debatis si bien contre luy en la presence du Roy qui estoit iuge , que j'obtins qu'elle ne se leueroit point & seroit abolie. N'ostay-ie pas encor d'entre les dents de ces chiens de la cour, les biens & possessions de Paulinus , homme noble & d'autorité, que ceux cy abbayoient esperans bien les engloutir & deuorer? Et pour deliurer Albinus homme consulaire de la faulse accusation qui luy estoit mise sus , & de la peine qu'il eust encourue, ie ne fis point de compte de la haine de Cyprianus son accusateur. Ne trouuez vous pas que faisant ainsi j'aye enaigry contre moy

l'inimitié des plus puissans & des plus riches ? Mais ie deuoy à l'auenture bien estre en seureté ailleurs , puis que ie ne pouuois trouuer aucune grace entre les courtisans, pour l'affection que i'auois à l'equité. Ce sont eux mesmes qui m'ont faulsemēt accusé, l'un desquels nommé Basilius, cy deuant chassé de la cour a esté poulcé à ce faire : & Opilius & Gaudentius ayans pour vne infinité de meschâcetez esté par decret bannis, se retiroiēt dans les Eglises en franchise, pour euitter l'execution de l'arrest. Ce que venu à la cognoissance du Roy , fit publier que si dans vn temps limité ils n'abandonnoient la ville de Rauenne , qu'ils feroient marquez au front, & puis iettez hors de la ville. Et toutesfois ce iour mesme ceux là ont esté oys en l'accusation qu'ils ont proposée contre moy. Quoy donc ? Auois-je prins tāt de soin, pour meriter cela ? Et la condamnation de ceux là les a elle rendus accusateurs plus iustes & receuables ? Est-il possible que la fortune n'aye point de hôte ? Au moins si elle ne l'ha de voir vn homme iuste & innocent accusé, elle l'a deu a-

noir de la meschanceté & vilennie des accusateurs. Et afin de vous faire entendre en quelle sorte ils m'accusent, j'ay empesché (ce disent-ils) que la conspiration qu'il auoit faicte cōtre la personne du Roy pour recouurer la liberté, ne luy ait point esté descouuerte. O maistresse, que vous semble il que ie doy faire ? Estes vous d'opinion que ie nie l'auoir faict, pour ne vous point faire de honte ? Mais cōment le puis-ienier ? Car j'ay tousiours desiré le salut du Senat, & ne puis ne le vouloir point. No^o confesserons donc ce qui est vray, & nierons ce qui est faux, qui est d'auoir retenu & empesché l'accusateur. Ie ne croy point à la fin que ce soit meschanceté d'auoir desiré le salut d'une telle compagnie. Bien que j'eusse assez d'occasion pour les deliberations & decrets qu'elle a faicts cōtre moy, de souhaitter tout autrement: mais la sottise & l'imprudence de ceux qui mentent à eux mesmes, ne peut faire les choses bonnes mauuaises, ny changer ou alterer leur nature: & croy avec Socrates qu'il ne m'est pas permis cacher la verité en niant ce qui

est vray, ny dire menfonge affermât ce qui est faux. Toutesfois ie remets cela à vostre iugement , & à celuy des hōmes plus sages. Mais afin que nos successeurs & ceux qui viendront apres nous, sçachent l'ordre & la verité de cest affaire , & cōme il s'est passé, ie l'ay bien voulu escrire & le consacrer à la memoire. Il me semble hors de propos de discourir des lettres qu'ils m'imposent faulxement auoir escrites, esperant la liberté de Rome. Car si l'on m'eust permis (comme il estoit bien raisonnable) de faire interroger ceux qui m'accusoient, & prendre leur confession, qui peut beaucoup en tels negoces, la fraude & la tromperie dont ils ont vsé enuers moy auroit esté descouuerte, & cogneue d'un chacun. Car quelle esperance reste-il de liberté? Pleust à Dieu que l'on en peust esperer , i'aurois faict pareille responce que feist Canius à Caius Cefar fils de Germanicus , lors que l'on le chargeoit d'estre consentant de la conspiration faicte contre luy : Si ie l'eusse sceu (dist-il) tu ne l'eusses pas sceu. L'ennuy & la fascherie que ie ressens de mon

infortune, ne m'ôt pas tellemēt hebeté
 ni tiré hors de moi, que ie me tourmēte
 & me plaigne de ce que les meschans &
 malheureux ayent conspiré & faict en-
 treprise contre la vertu. Bien trouuay-je
 estrange qu'ils ayent fourny à leur en-
 treprise, & executé ce qu'ils vouloient.
 Car souhaitter du mal, cela peut proce-
 der de nostre deffault: Mais qu'un mes-
 chant puisse toutes les fois qu'il veut e-
 xecuter ses mauuaises deliberations à
 l'encontre de l'innocent, Dieu estant iu-
 ge & voyant ses actions, cela est hors de
 raison & monstrueux. Et c'est pourquoy
 vn certain Philosophe ne demandoit
 pas sans occasion: D'où venoient les
 maux, s'il estoit vray qu'il y eust vn Dieu;
 & s'il n'y en auoit point aussi, qui pou-
 uoit estre autheur du bien. Or si les
 meschans, lesquels ne demandent que le
 sang des bons, & la ruine de tout le Se-
 nat, auoient occasion de me vouloir mal,
 & me perdre du tout pour me voir li-
 brement entreprendre la deffence des
 vns & la conseruation de l'autre: le Se-
 nat n'auoit point occasion de faire de
 mesme enuers moy, ny de me porter
 mauuaise

mauvaise volonté. Il vous souvient que ie n'ay dict ny faict iamaïs chose qu'ainsi que vous me l'ordonniez: & tousiours assisté de vous. il vous souviét bien (dis-
ie) comme le Roy estant à Veronne, & ayant bien grande enuie d'une totale ruine, s'efforçoit de rendre tout le Senat coupable de la faute que l'on im-
posoit à Albinus, cōme si tout le corps en eust esté consentant: que sans auoir esgard à mon dommage ny au danger qui m'en pouuoit aduenir, i'entrepris libremēt la deffence de tous. Vous sca-
uez bien que ce que ie dis est vray, & toutefois ie nē m'en suis iamaïs vanté. Pource que quand l'on manifeste ses a-
ctiōs pour en estre estimé, l'ō en est trop bien recōpensé. Et le seul souuenir de ce que i'auois faict en cela, me donnoit as-
sez de contentement, & vous voyez ce qui en est arriué. Puis qu'au lieu d'es-
tre guerdonné pour auoir bien faict, ie suis en peine & mal traicté pour vn faulx crime. Mais quelle plus grande meschâceté pour cognüe & auerée qu'el
le ait esté, a eu les iuges si seueres & si vnis ensemble, qu'aucun d'eux n'ait peu

B

CONSOLAT. DE PHILOS.

estre esmeu à pitié, ou par la fragilité de l'homme, ou par la nature qui est encline à mal, ou par l'incertitude & condition de la fortune, estât vn chacun incertain de ce qui luy doit aduenir? Si i'auois voulu brusler les temples, & lieux sacrez: Si i'auois entrepris couper la gorge aux prestres, & si ie m'estois efforcé de faire mourir tous les gens de bien; on ne m'auroit pourtant peu condamner ny me punir, sans premieremēt m'auoir appellé en iugement, m'auoir oy, & à la fin conuaincu. Et toutefois absent & esloigné de cinq cens mil, sans auoir esté oy en mes defences: i'ay esté bāny & condamné à mort par le Senat. Moy qui auois tousiours fauorisé cest ordre là & désiré son salut. O gens vraymēt dignes qu'aucun ne puisse cy-apres estre attainct ny conuaincu de semblable faut: la grandeur, & importance de laquelle a esté biē cogneüe de ceux mesmes qui m'ont accusé, & pour la couvrir & desguiser ont fait vne meslāge d'autres meschancetez, & ont dict vn mensonge tel: que i'auois par vne conuoitise & ambition de grandeur offensé ma

conscience, en sacrifiant aux demons. Mais comment eust-il esté possible de cōmettre vn tel sacrilege en vostre presence? Car ie vous ay tousiours eu logée en mon esprit, & m'auez osté de l'entendement l'affectiō & la conuoitise des choses mortelles. l'oyois tousiours sonner à mes oreilles ceste sentence de Pythagoras, qui dit, à vn, & non plus. Qui signifie qu'il faut sacrifier à vn seul Dieu, & non à plusieurs, & n'auois point de besoin de recercher l'aide d'esprits si inutiles, & si vils, estant appuyé de vous qui m'auez esleué & rendu si parfaict, que ie suis comme semblable à Dieu. Outre cela, les lieux les plus secrets de ma maison sont tesmoins comme i'ay vescu avec ma famille, la compagnie de tant d'honnestes amis, & mō beau-pere Symmachus, homme de bōne vie, & bien loüable en toutes ses actions, me pourront bien deffendre du soupçon de si grande faute. Mais ô quelle meschanceté! Ils se persuadent, & soupçonnent de moy vn acte si meschant & malheureux à vostre occasion. Pource (disent-ils) qu'estant bien ap-

CONSOLAT. DE PHILOS.

pris en toutes vos institutions , & instruiſt en tous vos preceptes , ie ne doy eſtre ignorant de telle ſcience. De ſorte qu'il ne leur a pas ſuffy que la reuerence que l'on vous doit auoir ne m'aye apporté aucun proffit : Mais encor auecques moy vous veullent ils trauailler & moleſter, & en m'offençant vous diffamer. & pour comble de toutes ces miſeres ceſte cy y eſt d'auantage , que les hommes pour la plus part ne font pas iugement des choſes ſelon leurs merites, ny ſelon ce que c'eſt; mais ſelon l'euenemēt & le ſuccés de la fortune, & eſtimēt celles là ſeulement bien faiſtes & auec prudence , qui reuſſiſſent heureuſement. De là vient que ceux qui tombent en quelque miſere & calamité , perdent tout premierement l'honneur & la reputation. Ie ne puis faire iugemēt (qu'auec vn extreme deſplaiſir) de ce que l'on peult dire de moy, & quelle opiniō l'on en peult auoir. Car chacun iuge diuerſement de mes actions , & me ſuffit de dire pour tout, que ce qui peult pl^{uſ} tourmenter & affliger les miſerables; c'eſt que l'on croit qu'ils ont faiſt les

fautes que l'on leur impose, & qu'ils ont bien mérité le mal qu'ils endurent pour raison d'icelles. Or ie suis spolié de tous mes biens, desmis de tous mes estats, & dignitez, noté d'infamie, & travaillé pour auoir bien faict. Ie veux veoir d'icy en auant les meschans par troupes se resiouyr, & faire feste, & chacun d'eux fort prompt & attentif à faire mal, dresser des tromperies & faulses accusations, & les gens de bien tous estonnez & troublez pour crainte qu'il ne leur en arriue autant comme à moy. Les meschans estre induits & conuiez à ozer faire mal, & guerdonnez pour le mettre à execution, & aux bons & innocens ne defaillir pas seulement seureté: mais encor estre destituez de tout appuy & support, il fault donc en tel affaire auoir recours à Dieu.

P O E M E V.

Createur du firmament,
Qui dès le commencement
Assis au throsne doré,
As à vn ordre asseuré.

R. iij.

CONSOLAT. DE PHILOS.

Les choses assuietties,
Que tes deux mains ont basties,
Qui d'un mouuement isnel,
Fais sans fin mouuoir le ciel.

La Lune tantost entiere
Nous monstrant, lors que son frere
Qui les astres obscurcit,
Son large front esclarcit:
Puis soudain nous paroissant,
Or' obscure & or' croissant
D'une lumiere empruntée,
Selon qu'elle est accostée
Du Soleil, & cest' estoille
Qu'au soir Venus on appelle,
En variant son chemin,
Estre Diane au matin.

Tu fais lors que la froidure
Pille des champs la verdure,
Les iours moins longs deuenir,
Et pareille Loy tenir
Aux nuicts, lors que la saison
Jaunist des champs la toison:
Et peult bien ta force aussi
Moderer le temps ainsi,
Que ce qu'Aquilon emporte,
Le doux Zephyr le rapporte,
Et l'ardant chien assaisonne.

Les bleds semez en Automne:
Rien n'est exempt de la Loy,
Ny de l'ordre mis par toy,
Tout premierement aux choses
Que tu regis & disposes,
Tu les enclos de tes mains
Dans des limites certains
Sans les rompre. Mais nous sommes,
Nous sotte race des hommes,
Seuls exempts & hors du soing
Qui nous fait tant de besoing:
Et ne veux pas moderer,
Noz faicts ny les asseurer,
Car qui fait que la fortune
Nous est si fort importune;
Et quell'a si grand pouvoir
Faisant à toute heure voir
Les bons souffrir le supplice
Qui est deu au malefice,
Que le vice est hault loué;
Et le meschant auoué,
De faire tort & iniure,
A l'innocent qui l'endure?
On desdaigne la vertu;
Et l'homme iuste est battu
Pour la faulte qu'a commise
Cestuy là qui la mesprise.

B iij

infortune, ne m'ôt pas tellemēt hebeté
 ni tiré hors de moi, que ie me tourmēte
 & me plaigne de ce que les meschans &
 malheureux ayent conspiré & faict en-
 treprise contre la vertu. Bien trouuay-je
 estrange qu'ils ayentourny à leur en-
 treprise, & executé ce qu'ils vouloient.
 Car souhaitter du mal, cela peut proce-
 der de nostre deffault: Mais qu'un mes-
 chant puisse toutes les fois qu'il veut e-
 xecuter ses mauuaises deliberations à
 l'encontre de l'innocent, Dieu estant iu-
 ge & voyant ses actions, cela est hors de
 raison & monstrueux. Et c'est pourquoy
 vn certain Philosophe ne demandoit
 pas sans occasion: D'où venoient les
 maux, s'il estoit vray qu'il y eust vn Dieu;
 & s'il n'y en auoit point aussi, qui pou-
 uoit estre auteur du bien. Or si les
 meschans, lesquels ne demandent que le
 sang des bons, & la ruine de tout le Se-
 nat, auoient occasion de me vouloir mal,
 & me perdre du tout pour me voir li-
 brement entreprendre la deffence des
 vns & la conseruation de l'autre: le Se-
 nat n'auoit point occasion de faire de
 mesme enuers moy, ny de me porter
 mauuaise

mauuaife volonté. Il vous fouuient que ie n'ay dict ny faict iamais chose qu'ainfi que vous me l'ordonniez: & tousiours affisté de vous. il vous fouuiét bien (dis- ie) comme le Roy estant à Veronne, & ayant bien grande enuie d'une totale ruine, s'efforçoit de rendre tout le Senat coupable de la faute que l'on im- posoit à Albinus, côme si tout le corps en eust esté consentant: que sans auoir esgard à mon dommage ny au danger qui m'en pouuoit aduenir, i'entreprins libremét la deffence de tous. Vous sça- uez bien que ce que ie dis est vray, & toutefois ie n'en suis iamais vanté. Pource que quand l'on manifeste ses a- ctions pour en estre estimé, l'on en est trop bien recópensé. Et le seul souuenir de ce que i'auois faict en cela, me donnoit as- sez de contentement, & vous voyez ce qui en est arriué. Puis qu'au lieu d'es- tre guerdonné pour auoir bien faict, ie suis en peine & mal traicté pour vn faulx crime. Mais quelle plus grande meschaceté pour cognüe & auerée qu'elle ait esté, a eu les iuges si seueres & si vnis ensemble, qu'aucun d'eux n'ait peu

B

CONSOLAT. DE PHILOS.

estre esmeu à pitié, ou par la fragilité de l'homme, ou par la nature qui est encline à mal, ou par l'incertitude & condition de la fortune, estât vn chacun incertain de ce qui luy doit aduenir? Si i'aurois voulu brusler les temples, & lieux sacrez: Si i'aurois entrepris couper la gorge aux prestres, & si ie m'estois efforcé de faire mourir tous les gens de bien; on ne m'auroit pourtant peu condamner ny me punir, sans premieremēt m'auroir appellé en iugement, m'auroir oy, & à la fin conuaincu. Et toutefois absent & esloigné de cinq cens mil, sans auoir esté oy en mes deffences: i'ay esté bāny & condamné à mort par le Senat. Moy qui auois tousiours fauorisé cest ordre là & désiré son salut. O gens vraymēt dignes qu'aucun ne puisse cy-apres estre attainct ny conuaincu de semblable faute! la grandeur, & importance de laquelle a esté biē cogneüe de ceux mesmes qui m'ont accusé, & pour la couvrir & desguiser ont faict vne meslāge d'autres meschancetez, & ont dict vn mensonge tel: que i'aurois par vne conuoitise & ambition de grandeur offensé ma

conscience, en sacrifiant aux demons. Mais comment eust-il esté possible de cōmettre vn tel sacrilege en vostre presence? Car ie vous ay tousiours eu logée en mon esprit, & m'avez osté de l'entendement l'affectiō & la conuoitise des choses mortelles. I'oyois tousiours sonner à mes oreilles ceste sentence de Pythagoras, qui dit, à vn, & non plus. Qui signifie qu'il faut sacrifier à vn seul Dieu, & non à plusieurs, & n'auois point de besoin de recercher l'aide d'esprits si inutiles, & si vils, estant appuyé de vous qui m'avez esleué & rendu si parfaict, que ie suis comme semblable à Dieu. Outre cela, les lieux les plus secrets de ma maison sont tesmoins comme i'ay vescu avec ma famille, la compagnie de tant d'honnestes amis, & mō beau-pere Symmachus, homme de bōne vie, & bien loüable en toutes ses actions, me pourront bien deffendre du soupçon de si grande faute. Mais ô quelle meschanceté! Ils se persuadent, & soupçonnent de moy vn acte si meschant & malheureux à vostre occasion. Pource (disent-ils) qu'estant bien ap-

CONSOLAT. DE PHILOS.

pris en toutes vos institutions , & instruiſt en tous vos preceptes , ie ne doy eſtre ignorant de telle ſcience. De ſorte qu'il ne leur a pas ſuffy que la reuerence que l'on vous doit auoir ne m'aye apporté aucun proffit : Mais encor auecques moy vous veullent ils trauailler & moleſter, & en m'offençant vous diffamer. & pour comble de toutes ces miſeres ceſte cy y eſt d'auantage, que les hommes pour la plus part ne font pas iugement des choſes ſelon leurs merites, ny ſelon ce que c'eſt; mais ſelon l'euenemēt & le ſuccès de la fortune, & eſtimēt celles là ſeulement bien faiçtes & auec prudence , qui reuſſiſſent heureuſement. De là vient que ceux qui tombent en quelque miſere & calamité , perdent tout premierement l'honneur & la reputation. Ie ne puis faire iugemēt (qu'auec vn extreme deſplaiſir) de ce que l'on peult dire de moy, & quelle opiniō l'on en peult auoir. Car chacun iuge diuerſemēt de mes actions , & me ſuffit de dire pour tout, que ce qui peult pl^{uſ} tourmenter & affliger les miſerables; c'eſt que l'on croit qu'ils ont faiçt les

fautes que l'on leur impose, & qu'ils ont bien mérité le mal qu'ils endurent pour raison d'icelles. Or ie suis spolié de tous mes biens, desmis de tous mes estats, & dignitez, noté d'infamie, & travaillé pour auoir bien fait. Ie veux veoir d'icy en auant les meschans par troupes se resiouyr, & faire feste, & chacun d'eux fort prompt & attentif à faire mal, dresser des tromperies & faulses accusations, & les gens de bien tous estonnez & troublez pour crainte qu'il ne leur en arriue autant comme à moy. Les meschans estre induits & conuiez à ozer faire mal, & guerdonnez pour le mettre à execution, & aux bons & innocens ne defaillir pas seulement secreté: mais encor estre destituez de tout appuy & support, il fault donc en tel affaire auoir recours à Dieu.

P O E M E V.

Createur du firmament,
 Qui dès le commencement
 Asis au throsne doré,
 As à vn ordre asseuré

R iij

CONSOLAT. DE PHILOS.

*Les choses assuietties,
Que tes deux mains ont basties,
Qui d'un mouuement isnel,
Fais sans fin mouuoir le ciel.*

*La Lune tantost entiere
Nous monstrant, lors que son frere
Qui les astres obscurcit,
Son large front esclarcit:
Puis soudain nous paroissant,
Or' obscure & or' croissant
D'une lumiere empruntée,
Selon qu'elle est accostée
Du Soleil, & cest' estoille
Qu'au soir Venus on appelle,
En variant son chemin,
Estre Diane au matin.*

*Tu fais lors que la froidure
Pille des champs la verdure,
Les iours moins longs deuenir,
Et pareille Loy tenir
Aux nuicts, lors que la saison
Jaunist des champs la toison:
Et peult bien ta force aussi
Moderer le temps ainsi,
Que ce qu'Aquilon emporte,
Le doux Zephyr le rapporte,
Et l'ardant chien assaisonne.*

*Les bleds semez en Automne:
Rien n'est exempt de la Loy,
Ny de l'ordre mis par toy,
Tout premierement aux choses
Que tu regis & disposes,
Tu les enclos de tes mains
Dans des limites certains
Sans les rompre. Mais nous sommes,
Nous sotte race des hommes,
Seuls exempts & hors du soing
Qui nous fait tant de besoiing:
Et ne veux pas moderer,
Noz faicts ny les asseurer,
Car qui fait que la fortune
Nous est si fort importune;
Et quell'a si grand pouuoir
Faisant à toute heure voir
Les bons souffrir le supplice
Qui est deu au malesice,
Que le vice est hault loué,
Et le meschant auoué,
De faire tort & iniuré,
A l'innocent qui l'endure?
On desdaigne la vertu;
Et l'homme iuste est battu
Pour la faulte qu'a commise
Cestuy là qui la mesprise.*

B iij

Et son inique vouloir
 Ny mentir ny decevoir,
 Pariurer ny faire outrage,
 Ne luy font point de dommage
 Mais quand fortune s'aduiſe
 De iouyr de ſa franchise,
 Et de practiquer ſes droicts,
 Ceux qu'à tort elle a ſaiēt Rois,
 Et que l'on redoubte tant
 On les void en vn instant
 De grands, deuenir petis,
 Et toſt eſtre aſſuiettis.

O Seigneur qui que tu ſois,
 Qui de l'ordre de tes loix
 Vas des choſes aſſeurant
 L'accord, & les moderant,
 Tourne deſormais tes yeux,
 Et voy Seigneur ces bas lieux,
 Voy nous Seigneur au danger,
 Et tout preſts à ſubmerger
 Dedans la mer furieuſe
 De la fortune ennuyeſe,
 Nous hommes que tu as ſaiēt
 Pour le labeur moins parfait
 D'un ſi grand & bel ouurage,
 Seréne Seigneur l'orage,
 Gardant de pareil ſoucy
 Les cieux & la terre auſſi.

SOM. DE LA V. PROSE.

Cy-dessus Boëce se plaignant de sa condition, se douloit seulement pour les incommoditez qu'il souffroit en sa personne, sans faire estat des esmotions qui luy affaissoient le courage. maintenant, au rebours, la Philosophie passe legerement ce qui plus affligeoit son homme, & insiste par legers & digestifs remedes à luy faire recueillir ses forces spirituelles, esgarées & distraictes par vne multitude d'affections, de douleur, courroux, tristesse, & autres induisans l'hōme à vengeance, desespoir & alienation d'esprit. Et l'operation des remedes qu'elle applique, dispose son patient à en recevoir de plus actuels & pressants.

A PRES que ie me fus ainsi desgor-
gé, & avec tant de douleur plus
tost abbayé que dit ces paroles : elle a-
uec vn visage agreable, & sans se mon-
strer esmeuë de mes lamentations, me
dict : Quand ie vos ay veu si triste, &
les yeux si chargez de larmes, i'ay bien
iugé que vous estiez fort affligé, & com-
me hors de vous mesmes : Mais ie ne
sçauois point que ce bannissement fust
si loingtain, iusques à ce que par vostre

B v

CONSOLAT. DE PHILOS.

discours m'en ayez rendu certaine. & encor que vous soyiez si esloigné de chez vous, vous n'en auez pas esté chassé, vous vous trompez : & si vous voulez que l'on croye que cela soit, c'est d'oc vo^r mesmes qui vous en estes chassé. Car vn autre que vous ne l'auroit peu faire. D'autant que si vous vous souuenez en quel pays vous estes nay, vous cognoistrez qu'il n'est pas gouuerné de plusieurs, comme estoit au temps passé la republique d'Athenes : mais bien d'un seul Roy, d'un Seigneur, & d'un seul Prince, qui ne prend pas plaisir de chasser ses luyets : mais bien de les conseruer, d'en auoir beaucoup, & les tenir vniz & bien d'accord ensemble. De sorte qu'estre corrigé par luy, estre guidé & conduit sous son autorité & obeir à ses edicts & ordonnances, c'est estre fort libre, & la plus grande liberté que l'on scauroit desirer. Ne scauez vous pas ceste tres-ancienne loy de nostre cité, par laquelle il est ordonné que quicquoy y establit sa demeure, n'en pourra estre iamais banny ? & celuy qui est comprins dans le circuit du fossé & l'en-

ceinte des murailles , ne doit craindre d'en estre iamais chassé ny foruscy ? Aussi qui se fasche d'y plus demourer ne merite plus d'y demourer. Je n'ay point horreur ny ne suis point esmeuë de l'aspect de ce lieu. Car ie ne recherche pas tant les murailles de vostre maison, & de vostre estude, si bié painctes & ornées d'yuoire & de verre , ny voz beaux liures, comme le siege de vostre entendement , où autres-fois i'ay mis & logé non pas les liures , mais cela pourquoy les liuxes sont estimez , qui sont les belles sentences. Et veritablement vous auez dict vray pour le regard de ce que vous auez faict : mais peu au respect de tant de choses que vous auez bien faictes. Et ce que vous auez racompté de ce qui vous a esté imposé ou vray ou faux , est manifesté & cogneu d'un chacun. Des trôperies & melchancetez de ceux qui vous ont accusé, vous auez bien faict de passer legerement par dessus: pource que le cōmū peuple qui sçait cela, le publie assez. Vous auez aussi touché ce que le Senat a iniquemēt decerné cōtre vous, & estes marry d'estre des-

CONSOLAT. DE PHILOS.

honoré, & de ce que vous perdez vostre reputation : & finalement vous vous estes courroucé contre fortune, vous plaignant de ce qu'elle ne donne pas recompense selon les merites. Et en la fin de vos vers choleres & desdaigneux, auez faict priere à Dieu que cest ordre qui tient & gouuerne les cieux en paix & vnion, gouuerne encor le monde. Mais pource que vous estes fort troublé, de beaucoup d'affections & de passions, & que la douleur, l'ire & l'ennuy vous affligent en diuerses façons : estant en l'estat que vous estes, on ne vous peut appliquer ny donner de forts remedes : Mais nous en vsérons à ce commencement de quelques vns vn peu plus doux, afin que les parties qui par le moyen de vos perturbations se sont aucunement endurcies, se puissent (en les touchant) mollifier & adoucir tant qu'ils en puissent receuoir remedes plus gaillards.

P O E M E VI.

C*Eluy au sein des sillons
Qui paresseux son bled cache,
Quand ses plus ardents rayons*

Phœbus sur le Cancre lasche,
Qu'il n'espere se charger
Des fruits que Ceres retranche,
Mais qu'il esbranle la branche,
Du Chesne, s'il veut manger.
Lors que le froid Aquilon
Tond des bois la chevelure,
Et que le dos du sillon
Est endurcy de froidure,
D'odorer ne pensez pas
L'œillet fleury ny la rose.
Ou quelqu'autre fleur esclose,
Car la saison n'en est pas.

Ne pense par ton labeur
Que la grappe au cep meurisse
Au printemps gay de verdure,
C'est assez qu'elle fleurisse:
Car Bacchus peint les raisins
Tant seulement en Automne:
L'autre saison n'est pas bonne
Pour pressurer les bons vins.

Dieu a le temps ordonné
Aux especes pour produire,
Et de bornes terminé
L'effect qu'on ne peut destruire.
Si de l'ordonné chemin
Les choses vont séparées,

CONSOLAT. DE PHILOS.

Ou qu'elles soient esgarées;

Bonne n'est iamaïs la fin.

SOM. DE LA VI. PROSE.

C'est vne recherche de la cause radicale de la maladie de Boëce, par certaines demandes. La 1. demande est touchant le gouuernement du monde, pource que Boëce sembloit aucunemēt douter de la prouidence de Dieu. La 2. touchât les circōstances du gouuernemēt, & de la fin de toutes choses: enseignant que le commencement & la fin s'en trouuent en vn mesme. & que qui conoist Dieu pour commencement des choses, ne peut ignorer qu'il en est aussi la fin. La 3. est touchant la conoissance de la nature humaine, en laquelle Boëce pechoit, se disant estre seulement animal raisonnable & mortel. or l'ame ne conoissant point sa condition, franchit aisément les bornes de raison, & s'arreste à regretter la perte de ses biens, honneurs & autres accesssoires. Mais quand par le moyen d'une sainte Philosophie elle reconoist ce principe, *Que rien ne se fait sans la prouidence de Dieu*; il y a bonne esperance de salut & guerison. tout ainsi qu'en vne maladie corporelle, tādīs que le cœur a quelque vigueur, par l'aide de bonnes receptes les autres membres peuuent recouurer santé.

PRÉMIÈREMENT donc, me permettez vous pas que ie vo^s face certaines demandes, par le moyen desquelles ie puisse entendre & toucher l'estat & la disposition de vostre esprit, afin que ie puisse mieux conoistre quels remedes seront plus propres pour vostre guarison? Demandez ce qu'il vous plaira (luy dis-*ie*) ie suis pour vous répondre. Lors elle me fit vne telle question: Pensez vous (dit-elle) que ce monde se regisse temerairement & à l'aduenture; ou si vous croyez qu'il soit gouverné par quelque ordre & raison? Je ne croiray iamais (dis-*ie*) que chose si certaine & assurée, se puisse temerairement ny fortuitement mouuoit. Mais ie sçay que Dieu qui en est le createur, preside à son ouurage, & le regit & gouverne, & iamais iour ne me destournera de la creance d'une opinion si veritable. Il est comme vous dites (respondit-elle) & l'avez n'aguères ainsi chanté en vos vers, & en iceux vous vous lamentiez d'avantage, que les hommes seuls fussent exempts & priuez du soing de la sollicitude de Dieu, & vous ne vous

plaignez point de cela en toutes les autres choses. Je ne puis assez m'esmerveiller qu'àiât vne si sainte & salutaire opinion, vous soyez malade. Mais regardôs vn peu de plus pres, & recherchons plus auant : car i'estime qu'il y a quelque chose à dire. Mais respondes moy à ce que ie vous demanderay. Puis que vous ne doubtez point que le mōde ne soit regi & gouuerné de Dieu, avec quel tymon & gouuernail pensez vous qu'il le regisse & gouuerne ? Il seroit mal-aisé que ie vous peusse respondre (dis-ie) car ie ne vous entends pas. Ah ha (dict-elle) ie me doubtois bien qu'il vous defailloit quelque chose, & que par là cōme par vne ouuerture ou vne ruine en vn fort, la maladie des passions & perturbations s'est coulée en vostre ame. Mais dictes moy ie vous prie, vous souuenes vous à quelle fin sont toutes choses, & à quoy tend l'ordre de la nature ? Ia l'ay autresfois ouy dire (di-ie) mais l'ennuy & la fâcherie m'ont tellement hebeté, que i'en ay perdu la memoire. Lors elle me dict : Vous sçaez pour le moins d'où viennent & proce-

dent toutes choses. Je le sçay (dis-je) & vous ay desia faict entēdre qu'elles procedoiēt de Dieu. Et comme est-il possible (dict-elle) que sçachant le principe des choses, vous ne sçachiez point à quelle fin elles sont faictes? Mais c'est la coustume des esmotions & perturbations, lesquelles peuuent bien & ont assez de force pour esbranler vn esprit de son lieu: mais non pas de l'en arracher du tout. Je voudrois bien que vous me respondissiez encor à cecy, vous souuenez vous d'estre homme? Pourquoy voulez vous (dis-je) que ie ne m'en souuienne point? Vous me sçaurez dōc bien dire (dict-elle) quelle chose est l'homme. Me demandez vous (dis-je alors) si ie sçay que ie suis animal raisonnable mortel? Je sçay bien cela, & confesse estre tel. & elle me demanda: Ne pensez vous point estre autre chose? Non, dis-je, voicy (dict-elle) vne autre occasion de vostre mal tres-importante: Vous auez oublié quel vous estes, d'où j'ay descouuert & plainemēt trouué quelle est vostre infirmité, & le moyen de vous donner guarison. Car

CONSOLAT. DE PHILOS.

pource que vous vous estes oublié vous
mesmes , vous estes marry & fasché
d'auoir esté banny & dechassé de tous
vos biens : & ne sçauoir point qui vous
estes , & à quelle fin sont faictes toutes
choses, fait que vous estimez beaucoup,
& tres-heureux les hommes meschans
& de peu. Et ne vous resouuenir point
quel est le tymon & gouuernail du mō-
de, est occasion que vous croyez que ces
vicissitudes & variables chāgemens de
fortune , flottent & vaguēt à l'aduentu-
re sans que quelqu'vn les regisse ou gou-
uerne : & toutes ces choses sont assez
suffisantes & peuuent bien ne vous fai-
re pas seulement malade , mais vous
perdre du tout. Or remercions l'auteur
souuerain de santé, que la nature ne vous
a encor point du tout abandonné. Nous
auōs dequoy vous faire de bōs remedes,
desquels vous vous trouuerez bien, &
vous profiteront beaucoup. Puis que
vous croyez, comme il est vray , que ce
monde n'est point gouuerné ny cōduit
fortuitement ou par sort: mais bien par
raison & par la prouidence de Dieu..

N'ayez donc plus de peur. car avec ceste petite estincelle on vous allumera facilement toute la chaleur naturelle. Mais pource qu'il n'est pas encor temps d'vser de forts remedes, & que la nature de l'entédemét humain est veritablemēt de telle sorte, qu'il ne se despouille iamais des vraies opiniōs, qu'il ne se faisisse tout soudain des faulses & mauuaises, dont naist ceste obscurité qui l'offusque & retient en tenebres : ie m'estudiray tout premieremēt de subtiliser & amoindrir cest esblouissement, avec quelques remedes doux & legers : afin que quand les tenebres seront dehors, vous puissiez mieux recognoistre la splendeur de la vraye lumiere.

P O E M E VII.

Quand les astres sont couuers
 Dessous la poix d'une nuë,
 Lon ne peult pas à trauers
 Voir leur clarté respandue;
 Et si la rage du vent
 En sillons l'onde remuerse,

CONSOLAT. DE PHILOS.

Comme verre auparauant
Qui luisoit de couleur perse,
Soudain elle s'espaisit,
Et de la fange meslée
Sa clarté nous obscurcit
Estant esmeuë & troublée.

Le torrent qui court leger
D'une libre & roide course
Du hault au bas d'un rocher
D'où il desbonde sa course,
Est en son cours empesché,
Et la cheute est arrestée
Quand son conduit est bouché
Par vne roche esclatée.

Et toy si tu veux ainsi
La verité bien cognoistre,
Et le droict chemin aussi
Qui au ciel te pourra mettre,
Chasse la crainte & la peur,
Aux voluptez ne t'abuze,
Ne sois vaincu de douleur,
Et que l'esperoir ne t'amuse.

L'esprit est voilé de nuit
Et genné de seruitude
Quand de ces choses il suit
Le ioug pesant & trop rude.

Fin du premier Liure.



LA CONSOLATION DE PHILOSOPHIE.

PAR SEVERIN BOECE.

LIVRE SECOND.

SOMMAIRE DE LA I. PROSE.

Après que la Philosophie a descouvert les causes efficientes de l'infirmité de Boëce, elle procede à la guérison alleguant pour premier chef de cōsolation de la nature & qualitez de fortune, qui au milieu de son inconstance maintient plus fermement sa constance, & ne se roidit iamais en vn mesme estat. puis incite le Sage à courageusement combattre les faulx appafts d'icelle, qui sous vn masque de blandissemens de peu de duree, detraquent la raison de son siege, laquelle par doux medicamens & raisons prises du sens commun des hommes, est en fin persuadée de se fermer à l'encontre de tels assauts. Laquelle persuasion la rend capable de plus solide traitement, & de sauourer de plus viues raisons, enseignans quel est le souverain bien, en quoy il consiste, le moyen d'y paruenir, l'impuissance des mechans, la puissance & fermeté des bons : qu'il

CONSOLAT. DE PHILOS.

ne faut tenir exquis ne précieux ce qui n'est permanent, & qui par sa retraite ne laisse que fascherie.

PROSE I.

A PRES ces choses elle demeura quelque téps sans mot dire: puis quand elle pensa m'auoir rendu plus attentif par son modeste silence, elle recommença à parler en ceste sorte. Si i'ay bien remarqué l'habitude & toutes les causes de vostre maladie, vous vous consommez & vous trauallez pour le grand desir & affection, que vous auez de r'entrer en vostre premiere fortune. Et rien autre chose n'a peu immuer ny changer la disposition de vostre esprit, (comme vous pensez) sinon vostre condition, qui s'est si soudainement changée. Je sçay bien toutes les mignardises & tromperies de ce monstre, & comme il s'accoste familièrement, & sçait caresser ceulx qu'il veut abuser: puis lors qu'ils y pensent le moins, il les quicte là, & les

abandonne trauallez & affligez d'un ennuy & fascherie insupportable. Mais si vous voulez vous souuenir quelle est sa nature, sa coustume, & les benefices quel'õ en peut receuoir, vous cognoistrez manifestemēt que vous n'auiez iamais ny possédé en elle, ny faict perte de chose qui vaille. Je ne pense point qu'il soit besoing de me traualler d'auātage, pour vous remettre ces choses en la memoire. D'autant que vous mesmes quād vous l'auiez plus prospere & fauorable, estiez bien coustumier de l'attaquer & picquer de braues paroles, la poursuyuant avec ces beaux propos, que vous auez apprins de nous. Mais il n'aduient iamais vn si soudain changement sans quelque perturbation d'esprit. De là est aduenü que vous vous estes vn peu esloigné de vostre repos accoustumé. Or il est temps que vous preniez quelque chose aisée & plaisante, laquelle penetrant au dedans prepare le chemin & la voye à plus forts bruuages. Que la douce persuasion de rhetorique s'approche donc, qui lors seulement marche droict, quand elle ne s'esloigne point de nos

institutions. Et avec elle vienne encor chanter d'un ton tantost plus leger, & tantost plus graue, la Musique nourrie & esleuée à nostre suite. Qu'y a il d'oc (ô hōme) qui vous à peu si fort attrister, & plonger en tant de pleurs & ennuis? Je croy que vous avez peu voir quelque chose inusitée & toute nouuelle: si vous avez opinion que la fortune se soit enuers vous changée, vous vous abusez, telles sont ses façons de faire & telle est sa nature. Et plustost en variant a elle maintenu sa constance, estant chose propre à elle de ne demeurer iamais vne. elle estoit inconstante quand elle vous caressoit & mignardoit avec ses allechemens d'une non vraye felicité. Mais vous avez à ceste heure bien decouvert, quel est le visage douteux & variable de ceste aveugle deesse, qui se tient aux autres encor cachée, mais à vous assez congneüe & manifeste; si vous l'approuuez, & qu'elle vous plaise, receuez ses façons & ses mœurs, & en usez. Mais aussi si vous la desdaignez, & avez en horreur son infidelité & sa trahison, reiettez la, & ne faictes com-

pte

pte de celle, qui en se ioüiant apporte tant de dommage. Si elle vous est à ceste heure occasion d'ennuy, & de fasticherie, elle vous a deu encor estre matiere de repos & de plaisir. Vous auez esté delaisé de celle, de laquelle aucun ne se peult tenir assésuré de n'estre point abandonné. Faictes vous si grand cas de la felicité qui s'en doit fuir quelquefois? & tenez vous la fortune si chere, de laquelle vous ne pouuez vous assésurer, qu'elle soit pour tousiours demeurer avecques vous, & qui en vous quittant vous doit laisser miserable & infortuné? Or si on ne la peut retenir quand on veult, & si fuyant de nous elle nous laisse disgraciez: Que veult demonstrier autre chose son inconstance, sinon que bien tost nous deuons estre miserables & malheureux? Car il ne fault pas seulement s'arrester à ce qui est deuant noz yeux. l'homme sage preuoid & mesure la fin des choses. Cognitoistre la fortune muable en vne sorte & en l'autre, fait que nous ne deuons ny craindre ses menaces, ny désirer ses caresses & mignardises. Il est force que

C

CONSOLAT. DE PHILOS.

ayant vne fois soubf-mis vostre col au ioug de la fortune, que vous supportiez & ayez agreable tout ce qu'elle a en son aire. Si vous vouliez donner loy à celle que vous auriez volontairement esleuë pour dame & maistresse, de ne bouger ou partir que quand il vous plairoit; ne penseriez vous pas luy faire tort? Et ne voulant supporter avec patience le sort, qui ne peut estre autre, ne l'aigrissez vo^r pas d'auārage, & ne le vous rendez vous pas plus difficile à endurer? Si vo^r auiez mis les voiles au vêt, vo^r iriez nō pas où vous voudriez, mais où le vent vous poulseroit. Si vo^r auiez semé aux chāps, vous compenseriez les annes fertiles avec les steriles. Vous vous estes soubf-mis à la fortune pour estre gouuerné d'elle; il fault donc que vous obeissiez aux loix & coustumes de vostre maistresse. C'est en vain que vous vous efforcez de vouloir arrester l'impetuosité de sa rouë, qui tourne sans cesse. O homme hebeté & fol plus que nul autre, si elle demeueroit ferme & arrestée, elle ne seroit plus fortune.

POÈME I.

Quand son orgueilleuse main
Qui varie toute chose,
Remue l'ordre incertain,
Autrement qu'on ne propose,
Elle ressemble la mer
Bouillant de flots & d'orage,
Qui or' voir, or' abyssmer
Fait les champs de son riuage.
Car de ceux qui estoient Roys
N'aguères crains en la terre,
Soudainement sous ses loix
Les sceptres d'or elle atterre.
Et celuy par son malheur
Qui le vulgaire mesprise,
Se void bien tost en honneur
Quand son œil le fauorise.
Elle desdaigne les pleurs,
Et tient l'oreille fermée
A ceux qui de leurs douleurs
Luy ont la plainte entasmée.
Elle iouë ainsi ses ieux,
Ainsi fait voir sa puissance
Et puis se mocque de ceux

C ij

CONSOLAT. DE PHILOS.

A qui elle fait nuisance:

Et lors fait de son pouuoir

Preuue plus grande & plus seure,

Quand quelqu'un elle fait voir

Grand & petit en vne heure.

SOMMAIRE DE LA II. PROSE.

C'est vne prosopopœe de Fortune avec Boëce : de laquelle (si la distribution & dispense des honneurs & commoditez mondaines est sienne) l'homme n'a sujet de se plaindre, quand elle vient à reserrer la main & retirer son affluence. attendu qu'elle a droict de redemander & reprendre ce dont elle auoit seulement donné l'vsufruit. ainsi que le Ciel ne nous fait point d'iniure, si nous ayant descouuert vn beau iour, il vient après à le voiler des tenebres de la nuit. En suyte, par autres similitudes Fortune tesmoigne qu'il n'y a rien de ferme ny de stable. en elle, qu'aucontraire sa force & maintien ne consiste qu'en inconstance, se iouant à hausser & baisser les estats des hommes, peslemeslant les biens parmy les maux, & ne versant iamais des vns sans les contrequarrer des autres.

PROSE II.

IE voudrois bien discourir avecques vous en la personne de fortune, adui-

fez doncques si elle vous feroit demandes iustes & raisonnables, si elle vous disoit: Pourquoi m'accusez vous ô homme ? pourquoy vous plaignez vous de moy ainsi à tous propos ? Quelle iniure vous ay- ie faite, & quels biens vous ay- ie ostez , qui fussent vostres ? Prenez tel iuge qu'il vous plaira, & disputons à qui doit appartenir la disposition des biens, & des dignitez , & si vous me pouuez môstrer que cela soit propre d'un homme mortel , ie vous accorderay , que ce que vous redemandez à ceste heure , a esté quelquefois vostre. Quand vous estes sorty du ventre de vostre mere , ie vous ay receu tout nud, necessiteux , & ayant besoin de toutes ces choses: ie vous ay aidé & secouru de mes facultez & richesses , & ay tousiours esté (qui est occasion que vous ne me pouuez à ceste heure souffrir) prompt & deliberée à vous fauoriser. ie vous ay esleué trop delicatement, & tousiours esté tresliberale en vostre endroit , & ne vous ay rien espargné de tout ce qui estoit en ma puissance. A ceste heure il me prend enuie de reserrer la main & la retirer: vous

C iij.

CONSOLAT. DE PHILOS.

me deuez remercier, cōme celuy quis'est
aydé & seruy du mié: & ne pouuez plus
vous plaindre comme si vous auiez per-
du le vostre. Pourquoi plorez vous
donc? Le ne vous ay fait aucun effort ny
violēce, les richesses, les honneurs, & tel-
les choses semblables, sont en ma puissā
ce: estans mes seruantes, elles me reco-
noissent pour dame. Et pourtant elles
viennent avecques moy; & quand ie
parts d'un lieu, elles me suyuent. l'oserois
bien vous affermer, que si ce que vous
plaignez d'auoir perdu, eust esté vostre,
vous ne l'eussiez iamais perdu. Vous
semble-il iuste & raisonnable que moy
seule doie estre empeschée d'vser de
mes droicts? Il est permis au ciel de fai-
re & monstrier de beaux iours, & puis
les cacher & couvrir des tenebres de
la nuit. Il peut bien encor tantost
honorer la terre de fruiets, & la cou-
ronner de fleurs, tantost la troubler
& confondre de geles & de pluies. c'est
le propre de la mer de se monstrier ores
bonace, pour deceuoir; & ores se
monstrier horrible & espouventable
de flots & vagues tempestueuses. Et

l'insatiable conuoitise des hommes me
voudra assubiectir & lier à la constan-
ce , & me faire ferme & stable con-
tre mon naturel? C'est ma force , c'est
ma puissance , c'est le ieu que ie sçay
ioër. ie fais sans cesse tourner vne rouë:
& mon plaisir est de voir les choses
haultes abbaissées, & les basses esleuées.
si ce ieu vous plaist, montez: mais avec
tel party, que quand l'ordre du ieu le
requerra , vous ne serez point marry
de descendre, & ne penserez point que
lon vous face tort ou iniure. Serez vous
seul qui ne conoistrez point ma na-
ture? Ne sçauiez vous pas que Cræsus
Roy de Lydie , vn peu auparauant es-
pouuentable à Cyrus, est tout soudain
misérablement prins de luy & ietté au
feu , ayant seulement esté preserué de
mort par la pluie du ciel? Ne vous
souuenez vous pas que Paulus Æmy-
lius Consul, plora & receut si grand
ennuy & fascherie des miseres & in-
fortunes du Roy de Perse, qu'il auoit
vaincu & faict son prisonnier? Que
lamentent & crient autre chose les
tragedies , sinon que la fortune sans

C iij

CONSOLAT. DE PHILOS.

discretiō, & d'un subit & desreiglé changement renuerse s'en dessus dessous les Royaumes les plus heureux? N'avez vous pas appris quand vous estiez ieune, que sur le fueil de la porte de Iupiter, il y a deux tonneaux, l'un plein de biens, & l'autre de maux; & que iamais il ne respand de l'un sur l'autre, qu'il n'y melle & verse aussi de l'autre? Que diriez vous, si vous auiez eu meilleure part & plus en celuy des biens? Et puis ie ne me suis pas encor du tout esloignée de vous, & ceste mienne inconstance & non assuree nature, vous doit donner occasiō de mieux esperer. Mais afin que vous ne vous trauailliez point d'auantage, & que vous ne perdiez le sens, ayant à viure en vn royaume commun à tous les hommes, viuez selon vos droicts, & vsez de vostre propre raison: Cōsiderāt que,

POEME II.

Bien que l'auengle Deesse
Pleue des biens à largesse,
Et sans se laisser la main,
Qu'avec le bout tousiours plain.

De sa corne qui est grande,
Prodiguement elle espanse
Autant de biens & de fruiet
Qu'on void d'astres à minuiet,
Ou que de sablon assemble,
La mer courroucée ensemble.
Celuy qui en auroit tant,
Ne seroit content pourtant,
Et voulant plus outre atteindre,
Ne cesseroit de se plaindre.

Combien que Dieu ait des cieux
Liberal payé les vœux
De ceux qui venir desirent
A l'honneur où ils aspirent,
Iamais on n'est riche assez
Et les trefors amassez
A peu de valeur on prise.
Car l'ardente conuoitise
Le bien acquis engloutit,
Et en ouure l'appetit,
Qui en devient plus auide.

Donc avecques quelle bride
Tiendroir-on bien arresté
Ce desir precipité,
Veu que celuy qui est riche,
Brusle encor & devient chiche,
Et craint pauvre devenir?

CONSOL. DE PHILOS.

*Il faut donc pour vray tenir,
Que sa faim insatiable
Rend sa vie miserable,
Puis qu'entre les biens qu'il voit
Pauvre tousiours il se croit.*

SOM. DE LA III. PROSE.

La Philosophie redargue l'iniquité des complaints de Boëce: puis fait vn narré des biens & prosperitez, desquelles iouissant il s'estimoit heureux, ne considerant pas que les biens de fortune, transitoires & perissables, ne contiennent rien qui puisse meriter titre de felicité: attendu qu'ès choses de ce monde, ne se trouue aucune stabilité. ce qu'elle prouue, d'autant que rien n'est engendré, qui ne soit corruptible & caduque. Ioint que l'homme mesme, duquel vn bien petit de temps peut dissoudre la nature, par la separation du corps & de l'ame, ne trouue rien de constant en soy. à plus forte raison, les accessoires accompagnans son estre mortel, ne le peuuent rendre heureux. si qu'il n'importe, que la fortune fuyant abandonne l'homme; ou que l'homme mourant la delaisse. car quoy que ce soit, elle se monstre tousiours inconstante & tromperesse.

SI donc la fortune vous tenoit ce langage, vous demeureriez muet, & n'aurez pour certain que luy. respondre. Pourriez vous alleguer quelque chose avec raison pour la defence de vostre droict : dictes le. Vous avez liberré de parler. Lors ie luy diz. Tout ce que vous avez dict semble beau, pource qu'il est orné de la douceur des persuasions de rhetorique, & de l'agreable harmonie de musique : Mais il ne delecte & ne plaist que tant que l'on l'oit, & que l'on l'entend, & les miserables affligez sentent leur mal plus avant. & pourtant quand on cesse d'entendre & d'oyr ces choses, l'ennuy & la fascherie qu'ils ont enracinée au dedans, trouble plus fort & agraue l'ame. Il est vray (dit-elle) aussi ne sont-ce pas encor icy les remedes de vostre mal, mais biē petits preparatifs & fomentations pour adoucir aucunement la force & l'opiniastreté de la douleur. Puis quand il sera temps, ie vous donneray des remedes qui penetreront plus avant, & à fin que vous ne vous persuadiez d'estre miserable hors de propos, dites moy

C vj

ie vous prie, auez vous oublié quelle estoit vostre prospérité, & le moyen comme vous l'avez obtenuë ? Le ne veux point parler, qu'apres la mort de vos parens l'estant demeuré orphelin, vous auez esté nourry & esleué par personnes d'autorité, & puis esleu & choisi pour estre allié avec les principaux de la ville. Vous sçauiez que l'on doit estimer d'auantage & faire plus de compte de ces belles alliances, que de parenté que l'on puisse auoir. Et ceux à qui vo^s auez esté allié vous ont aimé d'auantage, & tenu plus cher que leurs propres parens. Qui ne vous estime-roit tresheureux & bien fortuné, estant allié avec personnes si illustres, & de si grand credit & autorité: ayant espousé vne femme chaste & pudique, qui vous a faiët de si beaux enfans, & tant bien nez ? Le ne veux point vous resouuenir des dignitez & magistrats, que vous estant encor fort ieune auez obtenus, & qui vous ont esté decerneez, car ce sont choses trop communes, bien que des plus vieux en ayent esté refusez. Mais ie veux bien

venir au comble de vostre felicité, où aucun autre n'a iamais peu arriuer. car s'il y a quelque fruit que l'on puisse tirer des choses mortelles, qui merite d'estre compté pour heur, quelle quantité de maux pour grande qu'elle puisse estre, pourra iamais vous arriuer, qui ait pouuoir de vous arracher de la memoire ceste heureuse iournee, en laquelle vous veistes tirer de vostre maison, du consentement & par tant de gens de bien Senateurs, deux de vos enfans Consuls, avec l'applaudissement & resiouissance de tout le peuple? Et lors qu'eulx presens en plain Senat, sceustes si bien dire & discourir des loüanges du Roy, que vous en rapportastes beaucoup d'honneur, & la reputation d'estre autant homme de bon entendement, comme excellent Orateur? Et quand encor au theatre assis au milieu des deux Cōsuls vos enfans, vous peustes rassasier & contenter l'esperance & l'attente du peuple d'un present de triomphe, ie pense qu'avec vos paroles vous ayez charmé la fortune, ayant bien sceu lors que plus elle vous caressoit & fauorisoit de ses delices, luy tirer vn pre-

CONSOLAT. DE PHILOS.

sent que iamais auparauant homme priué n'auoit peu obtenir d'elle. Voulez vous donc venir à compte avec elle? Ceste-cy est la premiere fois qu'elle vous a regardé detrauers, & d'un œil despité, & si vous voulez exactement considerer la ioye & contentement, avec l'ennuy & le desplaisir que vous avez receu, encor ne pourrez vous nier que vous ne soyez heureux: & si vous pësez ne l'estre point, pource que les choses pour lesquelles vous vous estimiez tel vous ont abandonné, vous ne pouuez à ceste heure pour ceste mesme occasion vous reputer miserable, d'autant que cela que vous pensez qui vous face tel, vous laissera aussi quelquefois. Et quoy? ne faites vous que d'entrer à ceste heure si inopinément au theatre de ceste vie, que vous croyez qu'il y ait quelque constance & fermeté aux choses humaines? veu qu'un bien petit moment de temps deffaict & dissout l'homme mesmes, & encor que l'on ne doie auoir foy aux choses de fortune, & que l'on ne s'en puisse asseurer, si est-ce que quand bien cela seroit, que le dernier iour de la vie de l'hōme seroit touf-

iours comme la mort de fortune, & la fin de vostre felicité, si iusques alors elle ne vous auoit point abandonné, & que elle eust tousiours demeuré avecques vous. Que trouuez vous donc à dire, ou que vous la laissiez en mourant, ou que en vous fuyant elle vous abandonne?

POÈME III.

Aussi tost que le Soleil
Au char ses cheuaux attelle,
Commencant à son reſueil
Sa course continuelle,
Les astres vestus de feu,
Qui sont la nuit leur carriere,
S'obscurcissent peu à peu,
Et cedent à sa lumiere.

Quand Zephyre a reuerſy
Des bois la feuille, nouvelle,
Le vent brulé de midy
Plombé de rage cruelle,
Souffle vn feu 'e son gosier,
Qui les verds rameaux despoille,
Et de l'espineux roſier
La belle fleur il enrouille.
Souuent de la mer void lon

CONSOLAT. DE PHILOS.

*L'onde calme & gracieuse,
Puis au courroux d'Aquilon
Tost deuenir furieuse.*

*Puis que si peu l'vniuers
En vn estat continue,
Mais en changemens diuers
Soudainement se remue:*

*Si tu veux assure toy
Aux biens que donne fortune,
Mais par immuable loy,
Rien n'est ferme sous la Lune.*

SOMMAIRE DE LA PROSE IIII.

Boëce se resouuenant de son miserable estat present, ne peut oublier le passé. & de faict c'est vne souuenance qui cuit & trauerse infiniment l'esprit. Mais la Philosophie luy remontre par vne comparaison des prerogatiues qui luy sont encores entieres, avec celles qu'il a perdues, qu'il ne se peut dire miserable, puisque la vraye felicité ne peut consister és choses foruites, qui manquent des vrayes conditions qui peuuent qualifier vn estat heureux. Puis enseigne que tel estat ne se trouue point en ce siecle, que plus l'homme y est heureux, plus aisément vne legere aduersité l'atterre: que par consequent, toute beatitude foruite n'est que amertume & pleine de miseres. & que puisque nostre ame est immortelle, nous deuons aspi-

ier à vn autre bien souuerain, stable & permanent à iamais.

PROSE III.

TO V T ce que vous auez dit (dis-je alors) ô nourrice de toutes les vertus, est bien veritable, & ne puis nier que le cours de ma prosperité n'ait esté tressoudain. Mais entre toutes les trauerses de fortune, il n'y a rien qui puisse trauailler d'auantage, ny plus me faire douloir que le souuenir d'auoir esté autresfois plus heureux & mieux fortuné: Si (dict-elle) vous croyez. & tenez pour veritable ceste opinion, qui est faulse pourtant, & que pour ceste occasion vous souffriez peine, vous n'en pouuez avec raison attribuer la faute aux choses. Mais si ce vain & fresse nom de felicité vous peut esmouuoir, ie vous prie voyons ensemble de combien & de quels grands biens, vous auez eu la fruition & iouissance. Si dōc ce que vous auez tousiours tenu le plus cher & le plus precieux entre toutes vos fortunes plus fortunées, vous est diuinement conserué entier & inuiolablement gardé: pouuez vous avec

CONSOLAT. DE PHILOS.

raison ayant encor tout le meilleur, vous plaindre & lamenter de vos calamitez & miseres? N'avez vous pas encor vostre beau-pere Symmachus, homme de si bonne vie, tant accompli & si sage & vertueux, qu'il est reputé la gloire & l'ornement de tous les hommes de nostre temps? s'il estoit en peine, quelle chose ne feriez vous point pour l'en tirer? Ce sage personnage oublie à ceste heure, & laisse là toutes ses affaires pour solliciter les vostres, & y donner quelque remede. Ne l'ayant point, s'il estoit possible de l'auoir, n'abandonneriez vous pas vostre vie? Vostre femme si vertueuse & tant recommandee pour sa pudicité & modestie, en laquelle reluisent autant qu'il est possible les vertus du pere, ne vous est elle pas conseruée? Je confesseray bien que vostre felicité peut veritablement diminuer, la voyant si ennuyée de viure, & s'affoiblissant de iour en iour pour les larmes qu'elle ierte, & la douleur qu'elle reçoit de vostre misere, & toutesfois elle s'efforce de retenir encor, & reseruer l'esprit, pour vostre respect, & afin de vous seruir. Que diray-je de ces deux

Consuls vos enfans? Ausquel tant qu'il
 est possible en l'aage où ils sont, relui-
 sent les vertus, aussi bien de leur pere cō-
 me de leur ayeul. Puis donc que le plus
 grand soin qu'ayent les hommes, c'est de
 se conseruer la vie, ô que vous estes heu-
 reux (si vous le sçauiez bien conoistre)
 vous estans ces choses demeurees que
 l'on tient plus cheres que la vie mesme!
 Effuyez donc deormais ces larmes. car
 fortune ne vous est pas en tout contrai-
 re, & la tempeste & l'orage ne sont pas
 si grands, qu'ils ayent peu arracher les
 ancrs qui tiennent encor assez, pour
 vous donner à ceste heure quelque con-
 solation, & vous faire esperer quelque
 chose de bon à l'aduenir. Je prie Dieu
 (dis ie) qu'elles puissent tousiours tenir
 ainsi fermes, car tant que cela sera, aille le
 reste comme il pourra, nous nous effor-
 cerons de voguer. Mais vous pouuez
 bien iuger pourtant, combien ma re-
 putation est diminuée, & si mon hon-
 neur n'est pas en hazard. Ah, ah, (dit
 elle) pour le moins auons nous auancé
 quelque chose, puisque vous ne des-
 esperez du tout de vostre condition.

CONSOLAT. DE PHILOS.

Mais ie ne puis pas souffrir vos importunes & fascheuses lamentations. vous vous plaignez & tourmentez si estrange-ment de ce qu'il manque quelque chose à vostre felicité, & qui est celuy si parfaictement heureux qu'il n'ait debat en quelque sorte, avec la qualité de sa condition & de son sort ? sçachez que la fruition des biens de ce monde est angois- seuse, & miserable. car ou on ne l'a pas toute, ou on ne l'a pas pour tousiours. il s'en trouue quelqu'un qui a grâd reue- nu & est riche; mais il a honte d'estre issu de bas lieu : vn autre est assez remarqué pour sa noblesse : qui est si necessiteux qu'il auroit plus agreable de viure inco- neu. Il s'en trouue à qui l'un & l'autre ne default point, qui se desplaist du celi- bat & de viure hors mariage : vn autre content d'auoir pris femme s'attriste de n'auoir point d'enfans, & de laisser la iouyffance de ses biens à des heritiers e- strangers. Il y en a encor quelqu'un qui est bié aise d'auoir lignée, mais il est mar- ry de quelque defect qui s'y trouuerra. Brief il est mal-aisé que lon puisse estre d'accord en tout, avecq' la condition de

sa fortune : car il n'y a celuy qui n'ait quelque default, lequel toutesfois il ne pense point auoir iusques à ce qu'il l'ait esprouué : & puis s'éstât apperceu, il en a horreur. Et d'auantage ceux là qui ont toutes leurs aises, sont si sensibles & ont le sens si subtil, que si toutes choses ne leur reussissent à souhait, & comme ils desirent à poinct nommé, n'estans accoustumez que rien leur defaille, sont abbatuz & terracez pour le moindre accident qui leur peut arriuer : tant il faut peu de chose pour oster la perfection de la beatitude, à ceux qui se pensent les plus heureux, & mieux fortunez en ce monde. Et cōbien pēsez vous qu'il y en a qui s'estimeroiēt heureux & estre arriuez au ciel, s'il leur estoit escheu la moindre partie de ce qui vo^r reste encor de vostre fortune? Ce mesme lieu que vous appelez Exil, est le pays de ceux là qui y habitent, & n'y a rien de miserable sinon ce que lon croid estre tel. Comme aussi toute condition est heureuse, & toute fortune bōne à qui la sçait porter avec patience & se resouldre de l'édurer. Qui est celuy tant heureux qu'il voudra, quād il se fera

CONSOLAT. DE PHILOS.

vne fois rengé à impatience, qui n'ait en-
 uie de changer d'estat? O de combien
 d'amertumes est meslé ce peu de dou-
 ceur, que l'on peut recueillir de l'humai-
 ne beatitude! Car bien qu'elle se monstre
 fauorable à qui en a la iouissance, si ne la
 peut il retenir, ny garder de partir lors
 qu'elle le veut laisser. Il est donc fort ap-
 parent, combien est miserable la beatitu-
 de des choses mortelles, qui ne peut ny
 demeurer tousiours avec ceux qui re-
 çoiuent tout pour bien, ny donner par-
 fait contentement aux affligez. Pour-
 quoy donc, ô miserables mortels cher-
 chez vous au loing la felicité que vous
 auez dedans vous-mesmes? l'erreur & l'i-
 gnorance vous trouble bien & vous cō-
 fond. Mais ie vous veux monstrier en peu
 de paroles le sommaire de toute felicité.
 Dites moy ie vous prie, y a-il quelque
 chose qui vous soit plus chere que vous
 mesmes? Vous me respondrez que non.
 vous ayans d'oc vous mesmes, vous pos-
 sederez la chose que vous ne voudriez ia-
 mais perdre, & que la fortune ne vous
 pourroit oster. & afin que vous cognois-

siez que la beatitude ne consiste point aux choses fortuites, considerez cecy, si la beatitude est le souverain bien de la nature capable de raison. Ce qui se peut oster à ceste nature là n'est pas le souverain bié, parce que ce qui ne se peut oster est plus excellent & plus digne, que ce qui se peut oster. Il est donc tout certain que l'instabilité de la fortune ne peut aspirer à comprendre ou recevoir la beatitude, & oultre celuy qui est porté de ceste caduque felicité, ou il sçait qu'elle est variable, ou il en est ignorant. s'il ne le sçait, quelle fortune luy peut estre heureuse en son aueugle ignorance? s'il en est assuré aussi, il est force qu'il craigne de perdre ce qu'il ne doute point qui ne se puisse perdre. Et la continuelle crainte ne le laisse point estre heureux. Mais à l'auenture pētera il qu'il ne faudra point se soucier de l'auoir perduë: ce sera donc vn bien fresse & petit bien, puis que l'on se soucie si peu de la perte d'iceluy. Et d'auantage, outre que vous sçauiez de vous-mesmes, vous auez encor plusieurs raisons & demonsttrations, qui vous font croire que l'ame est immortelle. Or estât.

CONSOLAT. DE PHILOS.

certain que la fortuite felicité prend fin
par la mort du corps, vous ne pouuez
donc douter que si on reçoit d'elle quel-
que beatitude, que tout le genre humain
par la mort ne tombe en misere. Mais si
nous sçauons bien que plusieurs ont cer-
ché le fruiet de la beatitude non seule-
ment par la mort: ains encor par beau-
coup de peines & tourmens, comment
vous peut ceste vie rendre heureux, la-
quelle finie ne vous peut faire misera-
ble?

P O E M E I I I I.

CEluy qui se veut pouruoir
D'une demeure assuree,
Et qui sage veut auoir
Une maison de durée,
Qu'il se garde de bastir
Sur quelque montaigne haulte,
S'il ne veut se repentir
Bien tost apres de sa faulte.
Pource qu'agité du vent,
Et le fouldre de tempeste
Le menace, trop souuent,
Estant voisin de son feste,
Sur la

*Sur la rive de la mer
Ne faut non plus qu'il bastisse,
S'il ne veult veoir ruiner
En peu de temps l'edifice.*

*Qui là seroit en danger
Estant fondé sur le sable,
De quelquefois submerger,
Ou de n'estre iamais stable.*

*Qui voudra donc seurement
Se bastir vne demeure,
Faut assseoir le fondement
Sur vne roche bien dure,*

*Qui soit à l'abry des vents,
Et qu'on ne doute l'outrage,
Ny les menaces du temps,
La tempeste ny l'orage.*

*Afin que chez nous logez
Que nostre ame ne s'estonne
De voir les cieux enrager,
Que la mer monte ou qu'il tonne.*

SOM. DE LA V. PROSE.

Voici desormais de plus pregnantes raisons pour persuader à Boëce qu'il ne faut beaucoup appeter les richesses, qui ne sont bonnes, ny au regard d'elles mesmes, d'autant que le possesseur n'en deuient point plus homme de

D

CONSOLAT. DE PHILOS.

bien: ni au regard du possesseur, d'autant que s'il les garde, il en deuient auare: s'il les distribue, elles quittent leur maistre, & ne peuuent trespasser de l'vn à l'autre sans appauvrir l'vn des deux. Ni pareillement les pierres precieuses, d'autant que ce qu'elles ont de plaissant & d'exquis est le propre des pierres, non des hommes. Ni de rechef la bonté ni beauté des champs non plus que celle des fleurs ou des estoilles, qui sert à delecter la veüe de l'homme: ioint qu'il faut peu pour contenter nature. Somme, tout ce qui ne peut estre proprement nostre, n'est point souhaitable. comme quantité de meubles exquis, d'autant qu'on les admire plustost par leur matiere, ou par l'industrie de l'ouurier, que par celuy qui les possède. comme aussi, nombre de suyuans & valets: lesquels estans bons & vertueux, ces belles qualitez sont de leur propre, & ne les pouuons reputer estre de nos biens. D'auantage c'est faire tort à nostre Createur, de rechercher si exactement les choses exterieures, & negliger cequ'il nous a donné de propre, sçauoir est la droicte Raison, qui est vne parcelle de l'esprit diuin, infuse au corps de l'homme, au moyen de laquelle, par le benefice de l'intellect, il est fait semblable à Dieu.

PROSE I.

MAIS puis que le remede de mes raisons commence à trouuer pla-

ce en vous, il me semble qu'il sera bon d'en vser d'icy en auant de plus forts & puissans. Or sus donc, presupposons que les biens de fortune ne sont ny caducques ny transitoires, qu'y a il tant en eux, ou que vous puissiez pour tousiours nommer vostres, ou tout bien veu & considéré qui ne soit chose vile & de peu? Les richesses sont elles estimees ou pour raison de celuy qui les possede, ou pour elles-mesmes? Qui est le meilleur, ou de l'or massif, ou vne quantité de deniers tous comptans? qui certainement sont plus beaux à despendre qu'à garder, d'autant que l'auarice est ce qui rend l'homme odieux, & la liberalité le fait illustre. Or ce qui va ainsi de l'un à l'autre, ne se laisse iamais posseder d'aucun pour tousiours. Fauldra-il donc tant estimer & faire cas des deniers, qui nous abandonnent, & nous fuyent, quand nous voulons exercer liberalité? Si tant d'or & d'argent qu'il y a au monde, estoit en la puissance d'un seul, les autres n'en seroient-ils pas pauvres & indigents? La voix certainement peut bié estre ouyede plusieurs tout ensemble. Mais les richesses ne peu-

D ij

uent estre communiquées à beaucoup, sinon diuisées & séparées: & encor si cela aduient, il est necessaire qu'elles rendent ceux là pauvres & miserables, desquels elles se sont departies. O que petites & vaines sont donc les richesses, que plusieurs ne peuuent auoir toutes, ny estre possedées d'aucun, sans laisser les autres necessiteux. Mais à l'adventure la splendeur des pierres precieuses attire les yeux & les delecte, si en telle lueur il y a ie ne sçay quoy de singulier qui plaise, c'est la lumiere, & ceste lumiere est propre des pierres & non pas des hommes: & ie m'estonne comme on les peut tant admirer. Car quelle est la chose à qui defaillant le mouuement de l'ame, la composition & conionction des membres, qui puisse estre avec raison trouuée belle, d'une nature animée & raisonnable? Je suis content que les pierres precieuses ayent tant par la grace de Dieu leur facteur, que par leur varieté & distinction, quelque partie de beauté, elles ne meritent pas pourtant d'estre prisées & estimées de vous n'estans rien au respect de vostre excelléte nature. La beau-

té des champs vous plaist elle? Pourquoi
 non? (dis-je) N'est-ce pas vne belle par-
 tie d'un tres-bel ouvrage? Nous nous res-
 iouyffons bien de voir la mer bonace &
 tranquille, & nous regardons avec ad-
 miration le ciel, le soleil, & la lune: Mais
 quoy (dict-elle) quelqu'une en ces cho-
 ses vous touche elle? Osez vous bien
 vous enorgueillir & glorifier de la beau-
 té d'icelles? Dictes-moy, vous parez vous
 à la primeuere de diuerses fleurs, ou l'esté
 produisez vous de beaux fruiçts? Pour-
 quoy vous laissez vous ainsi raurir de vai-
 ne ioye, & que vous sert d'embrasser les
 biens estrangers au lieu des vostres pro-
 pres? Iamais la fortune ne pourra faire
 que ces choses soient vostres, que la na-
 ture a tant esloignées de vous. Il est bien
 vray que les fruiçts de la terre sont pour
 la nourriture des choses animées: Mais si
 cela vous suffit qui vous oste le besoin,
 & dont il suffit aussi à Nature: il ne faut
 point que vous vous trauailliez pour
 auoir si grande affluence des choses
 de fortune: Car de peu & de moins en-
 core nature se contente, & si vous la vou-

CONSOLAT. DE PHILOS.

lez charger & importuner de choses superflues, ce qui y sera de trop, ou luy sera nuisible, ou au moins luy sera fascheux & desplaisant. Mais à l'aventure penserez vous que ce soit quelque chose de beau, d'estre bien paré, & auoir nombre de belles robbes & grande quantité de riches meubles. Quant à moy, s'il y a quelq̃ beauté en ces choses qui resiouisse & qui plaise: ie seray plustost rauy pour la matiere dont elles seront faictes, ou pour l'industrie de l'ouurier, que pour ccluy qui les portera. Estre bien suiuy & auoir apres soy vne longue suite d'hommes à vostre seruice, cela vous peut il faire heureux? Il est certain que si telles gens sont vicieux & mal conditionnez, que c'est vne charge tres-pernicieuse & dommageable pour la maison, & fort ennemie du maistre: mais aussi s'ils sont gens de bien & vertueux, pourquoy voulez vous compter parmy vos biens & faire vostre la bonté d'autrui? Vous voyez donc cela n'estre de vos biens, que vous estimez & reputez vostre bien: & si en ces choses il n'y a rien de beau que

l'on doïue desirer, pourquoy ou s'attristera l'on de les perdre, ou se pourra l'on resjouir de les auoir? Car s'ils sont beaux de nature: cela que vous importe? Puis que ce qui a quelque perfection de soy, vous doit aussi bien plaire n'estant point à vous, comme s'il estoit vostre? Et les choses ne sont pas prisees pour estre entre vos richesses: Mais pource que vous les auez estimees de valeur, vous les auez voulu auoir parmy vos richesses. Que desirez vous donc de la fortune, pour en faire si grand cas? Rien autre chose à mon aduis, qu'avec vne grande abondance chasser la necessité & l'indigence, & il vous arriue tout au rebours, pource que pour conseruer beaucoup de richesses, & administrer beaucoup de biens, il vous fault de l'aide. Et est tout certain que ceux là ont necessité de plusieurs choses, qui en possèdent beaucoup: & les autres au contraire n'ont faulte de rien, qui sçauent mesurer leur abondance par ce qui deffault à nature, & non par la superfluité de leur conuoitise. N'auuez vous donc de vous mesmes aucun

D iij

bien qui vous soit propre, qu'il vous en
 faille chercher ailleurs, & en choses du
 tout eslongnées de vous ? L'ordre des
 choses est-il si confus & si changé, que
 l'on voye cest animal qui est diuin par le
 merite & benefice de la raison, auoir o-
 pinion de n'estre ny orné, ny ne pouuoir
 estre illustré, si ce n'est par la iouissance
 & possession des choses inanimées ? Les
 autres animaux se contentent de ce qu'ils
 ont de propre à eux: & vous autres qui
 par le moyen de l'intellect, estes sembla-
 bles à Dieu, vous voulez decorer & em-
 bellir vostre si excellente nature de cho-
 ses viles & de peu, & ne vous apperceuez
 pas de l'initure que vous faictes à vostre
 createur, qui a voulu que les hommes
 surpassassent & fussent plus excellens
 que toutes les choses terrestres, & neant-
 moins vous abaissez vostre dignité
 sous les choses plus basses & infimes.
 Si le bien est plus precieux que celuy du-
 quel il est réputé bien, quand vous iu-
 gez que les plus viles choses du monde
 sont vos biens, par vostre iugement
 mesmes vous vous soubsmettez à tel-

les choses. Mais il n'est pas hors de propos. Car telle est la condition de la nature humaine, que lors seulement qu'elle se cognoist, ell' est plus digne & plus excellente que toutes choses : & lors aussi qu'ellen'a pas la cognoissance d'elle mesme, ell' est moindre que les bestes irraisonnables. Car les bestes ont par nature de ne se cognoistre point : mais cela procede aux hommes de vice & d'une mauuaise habitude. Vrayment cest erreur est grand, & qui comprend beaucoup de choses, de croire que l'on puisse estre orné & décoré d'ornements & choses estranges. Mais cela ne peut estre. car si quelque chose est belle non de soy, mais par ce qui luy est apposé & dont elle est parée, ce parement & ornement est bien loué & prisé: Mais la chose qui en est couuerte & cachée, est tousiours laide & demeure sale & orde. Et quant à moy ie ne puis pas auouer que cela se doive nommer bien, qui nuit à celui qui le possede. Suis- ie menteur? vous me respondrez que non. Or il est tout certain que les richesses ont souuent-

D.v

CONSOLAT. DE PHILOS.

fois donné beaucoup de nuisance à ceux qui les ont possédées. Car les meschans, pource qu'ils voudroient auoir, & qu'ils conuoient celuy de l'autrui, n'estiment que ceux là gens de bien & bien habiles, qui ont amassé & possèdent plus grande quantité d'or, d'argent & autres choses precieuses. qui est cause qu'ils traouillent & molestent ceux qui en ont pour leur arracher leurs biens & s'enrichir de leurs despouilles: & vous mesmes n'estes à ceste heure affligé ny menacé du danger, que pour vos richesses: où si vous faisiez le sentier de ceste vie pauvre pelerin & destitué de tous moyens, vous marcheriez librement vostre chemin, sans crainte des volleurs & brigans. N'est-ce pas donc vne belle beatitude & vne grande felicité, que d'auoir beaucoup de richesses, si l'on ne peut plus estre en seurerésoudain que l'on commence à deuenir riche?

POEME V.

HEureux le siecle premier,
 Que l'on estoit coustumier
 De se contenter du fruit,
 Que la terre auoit produit,
 N'estant l'humaine franchise,
 Lors aux delices sous-mise,
 Qui en sa faim se passoit
 Du seul gland qu'elle amassoit:
 Et auoit pour tout bruillage,
 L'eau prise au prochain riuage,
 N'ayant gousté la meslange
 Du miel, & de la vendange.

On n'vsoit pour vestement
 D'habitx tainctx diuersement.
 Le somme estoit gracieux
 Soubx quelque arbre spacieux,
 Qui estoit la couuerture,
 Et liét la molle verdure.

On n'auoit veu sur les eaux
 Floter encor les vaisseaux.
 On n'auoit veu passer
 De port en port l'estranger,
 Pour de toute chose exquisite
 Assouuir sa conuoitise.

On n'auoit ouy parler
 De battre ou de quereller,
 De coups, de fureurs, d'allarmes,

D vj

CONSOLAT. DE PHILOS.

Ny de sang teindre les armes.
 Qui eust voulu le premier
 S'avancer les manier;
 S'il eust veu de sa colere
 L'horreur estre le salaire,
 Et pour le sang resspandu
 N'estre autre loyer rendu?
 Pleust à Dieu que tout pareil
 Nostre siecle fut au vieil!
 Mais l'ardante convoitise
 D'en avoir nous tyrannise,
 Et ce soing insatiable
 Fait l'homme estre miserable.
 Puisse meschamment perir
 Qui premier voulut ouvrir
 La terre, & qui l'or caché
 A de son ventre arraché
 Le premier, & les richesses
 Qui ne donnent que tristesses!

SOMMAIRE DE LA
 PROSE VI.

Les choses qui aduenans aux meschans les
 empirent encor d'auantage, & qui n'ameliorent
 point les bons, ne sont pas fort desirables. tel-
 les sont les dignitez & puiffances, fragiles & de
 peu de force, attendu qu'elles ne peuuent esten-

dre leur vertu sur les ames, ains seulement sur les corps & sur les biens corporels. Outreplus, leur imbecillité se manifeste en ce, que par icelles nul ne peut empescher que quelqu'un n'ait autant de pouuoir sur luy, comme il en a sur vn autre. ce qu'il prouue par exemples. La mesme conclusion se peut faire de tous autres biens de fortune, lesquels, s'ils auoyent en soy quelque bien naturel & propre, ne se lairroient iamais posseder par meschantes gens. Somme, ce qui est naturellement bon, effectue ce qui luy est particulier; comme la vertu fait le vertueux, la musique le musicien, &c. mais les richesses ne font point l'homme riche, attendu qu'elles ne restreignent point son auarice. & ainsi des autres biens de fortune, esquels il appert que le souuerain Bien ne peut consister.

PROSE VI.

MAis que doi-je dire des magistrats, dignités & puissances, dont vous faites si grand cas, & que vous esleuez iusques au ciel à force de loüanges, & que vous reputez estre le souuerain bien, ignorans quelle doit estre la vraye dignité, & quelle la vraye puissance? Car si elles sont decernées à vn homme meschant & de mauuaise vie, quels feux &

flammes vomies du Montgibel peuuent tant faire de meurtres ? & quels deluges peuuent apporter tant de ruynes, & de dommages que ceux cy n'en facent encor d'auantage ? Le croy certainement que vous n'ignorez point que noz ac-uâciers n'ayent desiré d'abolir la puissance Consulaire, qui estoit vn commencement de liberté, pour les insolences des Consuls & leur arrogance. Et pour ceste mesme occasion auoient auparauant exterminé & ietté hors de la cité le nom de Roy. Et si quelque-fois (comme il arriue peu souuent) ses dignitez & puissances sont données aux gens de bien : qu'y a-il en elles autre chose qui plaise ou agree, sinon la bonté de ceux qui en sçauent bien vser ? Car les vertus font honorer & reuerer les dignitez, & les dignitez ne rendent pas la vertu plus honorable. Mais quelle est ceste belle puissance & autorité que vous desirez tât ? Ne considerez vous point. (ô terrestres animaux) qui sont ceux à qui vous voulez presider & commander ? Que si entre les souriz vous en voyiez vne qui se voulust attribuer droict & puissance sur

les autres, vous pourriez-vous garder de rire? Mais considerant seulement le corps, y a il chose plus debile & infirme que l'homme, lequel non pas seulement l'esguillon d'une mouche, mais encor la morsure de ces petits animaux, qui se coulent & rampent par tout, peut bien tuer & faire mourir? Et en quelle sorte peut aucun auoir droict & vser de puissance sur vn autre, si ce n'est seulement en son corps, ou bien en choses qui sont encor moindres que le corps, qui sont les dōs de la fortune? Auez vous donc pouuoir de commander, à l'esprit qui est libre? & pensez vous qu'il soit en vostre puissance de destourner vne ame bien asseurée & appuyée de raison, de son repos & de sa tranquillité? Il y eut vn Tyran iadis, qui se persuadoit de pouuoir contraindre par force de tourmens, vn homme libre de luy declarer ceux qui estoient alencontre de luy conspirateurs, & qui auoient conittré sa mort. Mais ce fut en vain. car il se tronçonna luy mesmes de ses dents la langue, & la cracha au nez du Tyran qui le tourmentoit, faisant ainsi tesmoignage de sa ver-

tu de cela mesme que le Tyran reputoit
matiere de sa cruaulté. Mais que peut
quelcun faire à vn autre, que luy mesme
ne puisse encor souffrir de quelcū? Nous
auons leu que Busyris, qui estoit coustu-
mier de tuer ses hostes, fut à la fin luy
mesme tué par Hercules. Regulus ayāt
pris plusieurs Cartaginois prisonniers,
les mit aux fers : Mais il fut bien tost a-
pres prins & enchainé luy mesme. Pen-
sez vous donc que la puissāce que quel-
qu'un peut exercer alēdroit d'un autre,
& de laquelle vn autre peut vser enuers
luy, soit quelque chose qui vaille, & de
quoy lon doie faire compte? Et d'auā-
tage, si les dignitez & puissāces auoient
quelque biē qui leur fust propre & natu-
rel, iamaïs elles ne seroiēt tenues ny pos-
sedées par les meschans. car les choses
qui sont contraires & opposites l'une à
l'autre ne se peuuent vnir ny demeurer
ensemble. D'autant que nature ne peult
souffrir que les choses qui se repugnent
& contrarient, se puissent assembler. Or
estant clair & manifeste que le plus sou-
uent les meschans tiennent les dignitez,
il faut donc conclure qu'elles n'ont au-

cune bonté d'elles mesmes ny de leur nature, puis qu'elles se laissent estre & souffrent demeurer avec les meschans. Ce que l'on peut encor dire & iuger avec raison des dons de fortune, qui sont plus prodigalement & avec d'avantage d'abondance & de superfluité, possédez par ceux qui sont les plus vicieux. & est aysé de iuger (ce me semble) & n'en peut l'on douter : Que cestuy là ne soit fort robuste qui a la force, & l'autre estre adroit qui a l'adresse. comme la musique, il est certain qu'elle fait l'homme musicien, la medecine le Medecin, la rhetoricque le rhetoricien. pource que la nature de chacune chose, fait ce qui luy est de propre, & ne se peut mesler avec des effects contraires à sa nature : mais d'elle mesme se bannit & s'estrange des choses qui luy sont aduerses & opposites. Les richesses ne peuvent en façon du monde contraindre l'insatiable auarice, ny la puissance ne pourra iamais faire que cestuy-là soit maistre de luy mesme, que les voluptez retiennent lié & garroté de chaines & liens indis-

CONSOLAT. DE PHILOS.

solubles. Et les dignitez qui sont données & contribuées aux vicieux & méchans, ne les rendent pas seulement indignes d'icelles, mais plustost les publiét & font veoir par tout telz. Et d'où procede cela? Je le vous diray Vous autres mortelz vous vous plaitez d'appeler les choses par noms faux & impropres. Et l'effect se monstre du tout contraire à la vertu que vous leur attribuez. D'où vient que ceste richesse, ceste puissance, & ceste dignité ne se peuvent ainsi nommer. & le mesme peult on conclure de toutes les autres choses de fortune, qui ne doiuent estre aucunement desirées, n'estans icelles aucunement bonnes de leur nature, comme il est manifeste, puis qu'elles ne se communiquent iamais aux bons, ny ne rendent ceux là meilleurs qui les possèdent, & en ont la iouissance.

POEME VI.

L'On sçait assez quell' horreur,
Combien de maux, de dommage,
Celuy là en sa fureur.

*Vomist forcené de rage,
Qui premier le feu pour rien
Mist dans Rome, & qui la vie
Rauist aux plus gens de bien,
Pour assouvir son enuie.*

*Qui ne se peult pas saouller
D'auoir fait mourir son frere,
Qui osa bien se souiller
Encor au sang de sa mere.*

*Qui vid le corps estendu,
Refroidy, pasle, & sans ame,
Et tant de sang respendu,
Sans faire vne seule larme.*

*Qui peust bien sans se douloir,
Estre iuge de sa honte,
Sans estre esmeu, ny vouloir
Autrement en faire compte.*

*Toutesfois il contenoit
Les gens en obeissance,
Et les peuples gouuernoit
Sous le ioug de sa puissance:
Ceux là qu'au matin peult veoir
L'Aurore yssant de sa couche?
Les autres que void au soir
Le Soleil quand il se couche:
Ceux à qui la grand' ardeur
Fait la couleur bazannée,*

CONSOLAT. DE PHILOS.

*Et ceux là que la froideur
Horrible toute l'année.*

*Il ne fut oncques meilleur
Pour auoir tenu l'Empire,
Ains semble que la grandeur
L'ait pluſtoſt faiçt eſtre pire.*

*L'autorité ne peut pas
De ſa malice diſtraire
Ce Neron, & ne ſcent pas
Le retenir de mal faire.*

*Quelle eſtrange nouueauté
Peut plus faire de nuysance,
Qu'une extreme cruauté
Vnie avec la puiſſance?*

SOMMAIRE DE LA VII. PROSE.

Icy la Philoſophie refute la vanité de la gloire mondaine : premierement par, les eſtroits limites dans leſquels elle eſt rangée: ſecondement, par la diuerſité des nations eſquelles elle n'eſt point diuulguée: tiercement, par la variété des mœurs, par leſquelles diuers peuples iugent diuerſement d'une meſme choſe: quartement, par la breſueté de ſa durée, qui ne permet qu'elle ſe perpetue. Puis monſtre que les gens vertueux ne ſe doiuent point beaucoup guermenter pour vne gloire ſi legere & friuole, qui n'engendre qu'une vaine arrogance és cœurs des hommes, de laquelle les Sages doiuent eſtre eſloignez.

ioint que l'ame estant immortelle , dissoulte du corps , va chercher sa demeure és cieux, & met à nonchaloir toutes choses terrestres. dont s'ensuit qu'elle n'a rien de commun avec cette gloire terrienne.

PROSE VII.

Vous mesmes (dis-ie alors) sçavez bien que l'ambition de la conuoitise des choses mortelles n'a pas eu sur moy beaucoup de puissance. Mais j'ay bien cherché & désiré d'auoir moyen & matiere de faire quelque chose, afin que la vertu ne vieillist muette & sans estre exercée. Vrayment (dit-elle) la conuoitise de la gloire, & la reputation d'auoir seruy & profité à la republicque, est bien vne chose qui peut remettre & retiter à soy vn gentil esprit & de bonne nature. Mais encore n'est-ce pas là que gist la derniere perfection de la vertu. Car considerez combien ceste gloire là est vaine, debile, & de petite estendue. Tout le circuit de la terre (comme vous sçavez par les demonstrations d'Astrologie) n'est qu'un poinct, eu esgard au grand espace du ciel. C'est à dire, que si on veut conferer la terre

CONSOLAT. DE PHILOS.

à la grandeur du globe celeste, elle n'est d'aucune espace ou grandeur. Or en ceste consideration du monde de la partie qui se peut habiter, & qui est cogneuë de nous, ainsi que vous sçauiez par les raisons de Ptolomee, à peine est-ce la quatre partie: si encor de ceste quatriesme partie, vous tirez par imagination ce qui est couuert de la mer, & est inondé des palus, & l'estenduë de ce pais qui est pour la trop grande chaleur de desert & inhabitable, à peine peut-il demeurer vne trespetite & tresestroite place aux hommes pour habiter. En ce petit espace donc, qui est comme le poinct d'un poinct, cloz & renfermez, vous pensez d'agrandir vostre memoire, & de faire conoistre vostre nom. Et que peut auoir de grand ou de magnifique ceste gloire renfermee & retenue en si petits limites? D'auantage ce petit encloz habitable, est habité de plusieurs & diuerses nations toutes differētes & demœurs, de langues, de coustumes de toutes façons de viure. Ausquelles soit ou pour la difficulté des chemins, ou la diuersité du langage, ou pour

ce que le commerce n'y est point en vſage, & que l'on n'y trafique point, tant s'en faut que la reputation des hommes particuliers y puiſſe arriuer, que la gloire & la renommee des plus grandes villes & plus fameuſes citez n'y peut pas ſeulement atteindre. Et meſmes au temps de Marcus Tullius (cōme luy meſme le teſmoigne en certain lieu) le bruiēt de la ville de Rome n'auoit point oultrepaſſé le mōt de Caucaſe, & toutesſois elle eſtoit deſlors fort grande, crainte, & redoutée des Parthes & autres nations de ces cōtre'es là. Vous voyez donc combien eſt petite & contraincte de tous coſtez ceſte gloire, que vous vous trauaillez tant de croiſtre & augmenter. Penſez-vous que là où n'a peu atteindre la reputation du nom de Rome, que la gloire d'un hōme Romain y puiſſe arriuer? Et puis les mœurs & institutions des natiōs ſont ſi diſſemblables, & ſi diſcordantes, que ce qui eſt louable aux vnes, aux autres eſt digne de ſupplice. qui fait que ſi aucun ſe delecte & ſe plaiſt de publier ſa renommee, & de faire parler de luy, il ne luy eſt pas à

CONSOL. DE PHILOS.

L'auenture vtile ne proffitable que son nom soit conu de beaucoup de peuples. Chacun donc se contentera que sa gloire s'estende entre les siens, & que ceste tant celebrée renommée d'immortalité soit restrainte & retenue dans les fins & limites d'un seul pays. Combien pensez vous que l'oubliance & la penurie de bons escriuains nous ont fait perdre la memoire d'hommes illustres & fort renommez en leur temps, qui demeurent enseueliz dās les tenebres d'oubly? Mais encor de quoy seruent les lettres & escritures? Puis qu'à la fin la vieillesse & le temps les confōme avec leurs auteurs, & les fait oublier du tout. Et vous autres quand vous pensez d'allōger la memoire de vous, & faire parler de vous à l'aduenir, vous croyez de vous rendre immortelz: Mais si vous voulez auoir respect, & l'esgaler à l'espace infini de l'eternité, quelle occasion auez-vous de vous resiouyr du temps que durera vostre reputation? Car si vous faices comparaison d'un seul moment de temps avec dix mil ans, pource que l'un & l'autre temps est determiné: il y aura quelque pro-

que p^{ro}portion , bien qu'elle soit tres-inegalle: Mais ce nombre d'années encor tant multiplié que vous voudrez, ne se peut en façon du monde egaller à l'éternité. Car les choses finies quand elles sont comparées les vnes avec les autres, il y a quelque proportion. Mais entre le fini & l'infini, il n'y peut auoir aucune comparaïson. Qui est cause que la renommée d'un certain temps tant long que vous voudrez , respect à l'éternité qui ne vient iamais moindre, est, ie ne veux pas dire trespetite, mais véritablement nulle. Tout ce que vous faictes de bon, est pour plaire & pour agreer au peuple, ou pour en estre honoré, & en rapporter vne vaine louange: Et ne voulez pour guerdon & recompense de vos œuvres, sinon que l'on parle de vous, & que l'on vous louë. Mais il vous en arriuera tout ainsi qu'il fait à vn certain personnage, qui non pas pour estre homme de bien ny vertueux; mais pour vne legere arrogance & opinion de vaine gloire, s'attribuoit faulxement le nom de Philosophe. mais il fut bien tost descouuert,

E

CONSOLAT. DE PHILOS.

pource qu'un autre voulant sçavoir & faire preuve s'il estoit tel, l'attaqua d'injures, estant bien assuré que s'il estoit vraiment Philosophe, il n'en feroit compte, & les endureroit patiemment. Mais il ne se pult que bien peu de temps contenir: ains sortant hors de soy, soudain qu'il se sentit poursuivre & injurier, demanda à celuy qui le picquoit de parole, s'il auoit point cogneu qu'il fust Philosophe. Lequel luy fait response en se moquant & le reprenant de son impudence: Je m'en fusse apperceu, dit-il, si tu te fusses teu. Dictes moy ie vous prie que reuiet-il aux excellens homes del'honneur que nous leur faisons, & de ce que nous publiõs, que par leurs vertus & haultes entreprinſes, ils se sont acquis de la gloire & de la reputation? que leur sert la renommee apres la mort que le corps est dissouls? Car tous les homes meurent quât au corps, mais l'ame demeure immortelle, & les raisons de Philosophie nous defendent de croire autrement. En ce cas il est tout certain qu'il ne peut receuoir aucun plaisir de sa gloire apres la mort, d'au-

tant qu'il n'est plus, & n'y a de luy aucune chose : Et aussi l'ame pure qui se iuge elle mesme, estât deliurée de la prison terrestre, va libre au ciel, ne fait plus compte des choses mortelles. Car iouyssant de soy mesmes au ciel, elle se delecte seulement d'estre tirée & separée des choses terrestres.

POEME VII.

Quiconque trop curieux
Se farde de vaine gloire,
Et recherche ambitieux,
D'eterniser sa memoire,
Comme si ce fust vn bien
Sur tout autre desirable,
Et qu'on ne peust de semblable
Avoir ny souhaitter rien.

Qu'il voye le ciel voulté,
Estendu en grand espace,
Et a sous luy limité
La terre en si peu de place:
Il rougira qu'en si peu
Que peut la terre comprendre
Encor ne peut-il estendre,
Son renom qu'en quelque lieu.

E ij

CONSOLAT. DE PHILOS.

Que sert il donc s'oublier,
 D'une gloire tromperesse,
 Pour denouer le collier,
 Qui dès le berceau nous presse?
 Car soit que d'un braue nom
 Mention par tout on face,
 Ou que d'une illustre race
 S'oye par tout le renom:

La mort desdaigne l'honneur,
 Il ne luy chault de la gloire,
 Rien ne luy est la grandeur,
 Ny des haults faicts la memoire.
 Il faut soit pauvre, soit roy,
 Mourir quand il en est heure,
 Vn seul exempt ne demeure
 De ceste seuerre loy.

Et quoy maintenant qu'a-on
 Des reliques de Fabrice,
 Et qui a il de Caton,
 Ou de Brute que l'on puisse
 Remarquer:maugré le vueil,
 Le grand au petit ressemble,
 Puis que la mort les assemble
 Egallement au cercueil.

Car encor que de quelqu'un
 Le nom soit dedans l'histoire,
 Peinct deuant l'œil du commun,

*Et que l'on chante sa gloire;
 De quoy peult cela servir,
 Sinon de faire conoistre,
 Qu'on a eu quelque fois estre,
 Et qu'il a fallu mourir?
 Nyle marbre elabouré,
 Dont l'on anime vne image,
 Nyle renom honoré,
 Qui suynt le trespas, de l'aage
 Ne peut surmonter l'effort.
 Car la fin qui doit ensuyure,
 Aux images & au cuyure
 Est vne seconde mort,*

SOM. DE LA VILL. PROSE.

Afin qu'on ne pense que la fortune ne con-
 tienne en soy rien de bon, la Philosophie
 mōstre icy quel est ce biē qu'elle y remarque:
 & prouue que l'aduersité est plus expediente
 que la prosperité. La premiere raison est, que
 la prosperité nous deçoit, quand elle nous ap-
 paroist sous espee de quelque felicité. La
 seconde que l'affliction nous redresse à la re-
 cherche de nostre vray bien, duquel la feli-
 cité nous auoit detracquez. La troisieme,
 que l'aduersité nous fait reconoistre ceux
 de l'amitié desquels nous pouuons vrayment
 faire estat.

E iij.

MAis afin que vous ne pësiez point que i'aye guerre mortelle, & que ie sois ennemye de la fortune à toute outrâce : Je vous veux bië dire qu'il est tel- le fois que ceste trompeuse & variable fait bien quelque chose pour les hom- mes ; mais c'est quand elle se manifeste, qu'elle se demasque le visage, & qu'elle confesse ses ruses. vous n'entendez peut estre pas ce que ie veux dire. C'est chose estrange. car ie trauaille & ne puis pour- tant me faire entendre, ny vous faire comprendre ma conception. mais ie vous diray quant à moy, que i'ay ferme opinion que la fortune aduerse pro- fite d'auantage, & est plus vtile aux hommes, que celle qui les flatte & les mignarde. Car quand elle se mōstre fa- uorable sous ombre de telle quelle feli- cité, ell' est menteuse & vous trompe. Mais elle vous rëd assurez, la cognois- sant par son changement inconstante & muable. Ceste là vous deçoit, & ceste cy vous instruit; & par la cognoissance d'v- ne vaine & fresse felicité, deslie les es- prits que l'autre tient liez & attachez à

ie ne ſçay quelle eſperance de biens trō-
peurs & menſongers. Se monſtrant ar-
rogante, lâbile, & ignorâte elle meſme,
où l'autre eſt ſobre, raffize, & plus ſage,
pour auoir ſouuent eſprouué des aduer-
ſitez. Et pour dire en vne parole, la proſ-
pere avec ſes careſſes vous fait deſuoyer
& deſtourner du chemin de la vraye fe-
licité & du ſouuerain bien; & l'aduerſe
ſouuentesfois nous radreſſe, & comme
avec vn croc nous y retire & nous y re-
met. Cela à voſtre aduiſ ſe doit-il eſti-
mer peu, la fortune aſpre & contraire
deſcouure & fait cognoiſtre le cœur des
vraiz & fidelles amys, & fait diſcerner
& diſtinguer le viſage des amys certains
& aſſeurez des fainctz & diſſimulez?
Pource que quand elle nous laiſſe, elle
tire avec elle ceux qui ſont amys de la
fortune, & no⁹ laiſſe ceux qui ſont vray-
ment noſtres. Combien auriez vous a-
cheté cecy, auant qu'elle vous euſt tour-
né le dos, & qu'il vous fuſt arriué
aucune diſgrace, & lors que vous e-
ſtiez à voſtre opinion plus heureux?
Ceſſez donc de penſer à vos richel-
ſes perdues, puis que la perte d'icelle

E iiij

CONSOLAT. DE PHILOS.

est occasion que vous ayez recouuré
vos vraz & fidelles amis , qui sont les
richesses que lon doit tenir plus cheres,
& qu'il faut estimer d'avantage.

POEME VIII.

CE qui fait l'ordre tenir
A l'année variable,
Et pareille reuenir,
Avec vn changement stable,
Et sans se deposseder,
Les saisons s'entreceder.

Et les peres elements
Qui ont qualité contraire,
En leurs accordz differens,
Ferme trefue ensemble faire,
Que Phebus le iour conduit,
Et sa sœur regne la nuit.

Que la mer en son gyron,
Tient prisonnieres ses ondes,
Et iamais ne les voit-on,
Errer par tout vagabondes,
Que ce que le ciel contient,
Soubz vne loy se maintient.

C'est amour qui a soucy
De bien regir toute chose,
Au ciel il commande aussy,
Et de la terre il dispose,

*Et dedans la mer il peut
Commander ainsy qu'il veut.*

*Et s'il cessoit d'ordonner,
Et de temperer le monde,
On verroit se ruyner
Bien tost la machine ronde,
Qu'un lien tient en accord,
Que denour' oit le discord.*

*C'est luy seul qui entretient
Tous les vertueux ensemble,
Et qui les peuples contient,
Les unit & les assemble,
Et soubz le ioug d'amitié,
A l'un à l'autre lié.*

*C'est luy qui d'un saint lien,
D'un feu pudic accompagne,
Soubz les fermes loix d'Hymen,
L'homme à l'espouse compagne:
Qui maintient & nous fait voir
Les amys en leur deuoir.*

*Si l'amour veut gouverner
Voz espritz, race mortelle,
Comme il fait d'accord mener
Au ciel sa dance eternelle,
Qui se tourne egalement,
Vous viurez heureusement.*

Fin du second Liure.

E v



LA CONSOLATION
DE PHILOSOPHIE,
PAR SEVERIN BOËCE.

LIVRE TROISIÈME.

SOMMAIRE DE LA

I. PROSE.

Deformais la Philosophie voyant Boëce en bon train & bien préparé, luy propose de plus graues remedes qu'auparauant ; à sçauoir des raisons qui contrarient à la commune opinion des hommes ; & prouue que la vraye felicité ne consiste point és biens extérieurs, qui ne sont qu'une image de la vraye beatitude. Or pour la faire mieux apprehender à son homme, elle luy allegue diuerses opinions touchant cette faulx felicité, afin que par la conference d'icelles, il puisse plus aisément conoistre qu'elle est celle sur qui nous pouuons asseurer nostre souverain bien.

PHILLOSOPHIE auoit desia cessé de chanter, qui m'auoit par la douceur de ses vers si bien charmé l'ouye & rendu si deliberé de l'escouter, que i'estois comme rauy, & ne me souuenant de rien autre chose, j'attendois si elle passeroit outre & continueroit d'auantage. Mais voyant son silence ie luy dis : O souveraine consolation des esprits plus affligez, que i'ay prins de plaisir en la grauité de ces beaux discours, & en la grace de vostre chantlic me sens à ceste heure assez suffisant & capable pour resister aux traueses de la fortune, & ne crains point ces remedes desquels vous auez cy-deuant parlé, qui sont plus aspres & plus forts : mais enuieux de les ouyr, ie vous en fais priere & requeste en toute instance. Je m'en suis bien apperceu (dit-elle) quand ie vous ay veu si coy & attentif à m'escouter, & me suis tousiours bien assurée de voir quelque-fois vostre esprit si bien disposé, comme vous l'auetz. Et pour vous en dire la verité, c'est moy qui le vous ay rendu tel. Et pour certain, les cho-

E vj

ses qui restent à dire sont telles, que mises en la bouche & vn peu essayées, il semble qu'elles poignent & soient aucunement aspres, mais quand on les a bié auallées, on les trouue fort douces & suauës. Et quant à ce que vous dites que vous estes enuieux de les ouir: hélas de quelle ardeur seriez vous espris & enflammé, si vous sçauiez où nous auons desia commencé de vous acheminer & conduire? Et où (dis-je.) A la vraye beatitude (dit-elle.) Car encor que vous la cognoissiez bien, & en vostre esprit la desiriez, c'est toutesfois comme par vn songe. Pource qu'estant du tout tourmenté & enclin à regarder & contempler les semblances & simulacres d'elle, vous ne la pouuez pas bien comprendre elle mesme. Et pour Dieu (dis-je alors) ie vous prie sans attendre d'auantage, me faire cognoistre ceste vraye félicité, & en quoy elle cōsiste. Le le feray tres-volontiers (dict-elle) mais premierement ie me veux efforcer de vous desaigner en paroles & vous former celle, de laquelle vous faites plus grand compte. Afin que quand

vous aurez bien cogneu la faulſe felicité, vous puiſſiez quand vous tournerez les yeux de l'autre coſté, bien comprendre la vraye.

POÈME I.

Qui voudra profit tirer
 D'un champ deuant inutile,
 Premier que le labourer
 Pour le rendre plus fertile,
 Faut deſſerter les buiſſons,
 Sercler les mauuiſes herbes,
 Afin qu'au temps de moisſons
 Il ſoit bonne en belles gerbes.
 On gouſte plus de douceur
 Au roux labour de la mouche,
 Quand d'une amere ſauueur
 On a le gouſt en la bouche.
 Apres un temps pluuieux,
 Une tempeſte, un orage,
 Les aſtres ſemblent des cieux
 Nous eſclairer d'auantage.
 Une obſcure & triſte nuit
 De ſon horreur effroyable,
 Fait que le ſoleil conduit
 La clarté plus deſirable.

CONSOLAT. DE PHILOS.

*Il te fault ainsi iuger
Quel l'imparfaict bien peut estre,
Et puis de toy l'estranger,
Pour mieux le parfaict cognoistre.*

SOM. DE LA II. PROSE.

La principale fin de tous hommes est de paruenir au souuerain bien. Ceste fin est double: l'vne, par laquelle, l'autre, pour laquelle toutes choses se font. Chacun vise à la dernière sous vne raison, entant que c'est vn bien rassasiant l'appetit de l'homme. L'autre, est vne operation par laquelle les humains s'efforcent d'arriuer à leur felicité. Ceste beatitude se poursuit par diuerses voyes, selon que les operations des mortels sont differentes. De là viét que la plus grand'part se detracquent tellemēt qu'au lieu d'arriuer où ils pretendent, ils tournent le dos à leur butte: & trompez en leurs imaginations, fondans leur felicité principalement sur l'vn de ces cinq poinets, richesses, honneurs, puissances, gloire, voluptez, n'apprehendent iamais ce bien auquel ils aspirent, lequel est triple, vtile, delectable, honnest. qui se diuersifiē selon que les affectiōs des personnes sont diuerses, tendans routes neantmoins à la perception d'vn souuerain bien.

PROSE II.

LOrs ayât vn peu la veuë baissée, & cō
me si elle se fust rassemblée & retirée
du tout au siege de son ame, elle cōmēça
ainsi: Tout le soing & la sollicitude des
pauures mortels, est de se trauailler &
affliger pour choses diuerses, & pour e-
studes du tout differens, & bien que
chacun d'eux procede de façons & par
voyaes du tout dissemblables: neantmoins
tous s'efforcent d'arriuer à vn but & à
vne fin, qui est la beatitude: & la beati-
tude n'est autre chose qu'un bien, outre
lequel on ne desire rien plus: & verita-
blement est le premier & le souuerain
bien de tous, & comprenant en soy tous
les autres. car s'il luy defailloit quelque
chose, il ne pourroit estre souuerain,
pource qu'il y auroit encor hors de luy
quelque chose desirable. Il est donc tout
certain que la beatitude est vn estat &
vne condition parfaicte, à laquelle tous
les biens sont rengez, & se rapportent v-
niz ensemble, & to' les mortels s'estudiēt
d'attaindre (comme nous auons dict) à

CONSOLAT. DE PHILOS.

cest estat & à ceste condition, encor que par voyes toutes dissemblables, & façons du tout différentes. car l'entendement des hommes est naturellement, & par luy-mesme desireux & conuoiteux du souverain bien: mais il en est destourné par faulse opinion, qui au lieu du vray luy fait embrasser le faulx. D'où vient qu'aucuns se persuadans que n'auoir besoin d'aucune chose soit le souverain bien, trauaillent seulement pour acquérir des richesses. D'autres iugeans que le plus digne soit & consiste à estre honoré, mettent tout leur entendement par le moyen des magistrats & dignitez à se faire respecter & hōnorer. & n'y a point faute de ceux qui croient & constituent la vraye felicité à auoir beaucoup de puissance: & ceux là veulent commander eux-mesmes, ou s'accoster des grands & de ceux qui regnent & ont autorité. Mais ceux qui croient que la meilleure chose de toutes, soit la renommée, sont soigneux ou en temps de guerre, ou en temps de paix, de faire parler d'eux, & perpetuer la gloire de leur nom: Mais il y en a vne infinité qui mesurent le fruit

du bien, par le plaisir & par la volupté, & pensent que le souverain bien soit aux voluptez, & à se donner du bon temps. Il s'en trouue encor quelques vns qui cōfondent & changent les occasions & fins d'iceux biens les vns avec les autres. Cōme ceux qui desirent les richesses pour auoir plus de puissance, ou plus de plaisir & de volupté: ou conuoient de pouuoir beaucoup, ou pour s'acquérir des richesses ou pour auoir plus de reputation. En ces choses donc & autres semblables, l'estude & l'intention des hommes se traueille & s'employe. Comme l'on recherche la noblesse & la faueur du peuple, qui semblent donner vne certaine gloire & splendeur: Tout ainsi que l'on desire la femme & les enfans, pour en receuoir plaisir & contentement. Quant aux amis que l'on se traueille d'acquérir, c'est véritablement vn travail honnestes & resfainct. Mais cela ne doit point estre mis au rang des choses de fortune, ouy bien de vertu. Toutes les autres choses, on les desire ou pour auoir plus de puissance, ou pour en receuoir quelque delectatiō. Et est assez manifeste de soy-mesme, que

CONSOLAT. DE PHILOS.

les biens du corps se referent & se rapportent aux biens dont nous auons parlé cy dessus. Car la disposition & la taille de la personne, apporte ce semble quelque puissance: la beauté & l'adresse, renommée, & la santé, plaisir. Il est donc tout notoire que souhaitant quelqu'une de ces choses, on desire la beatitude: car chacun iuge cela estre le souuerain bien, qu'il recherche d'auoir, & souhaite plus que toute autre chose. Or auons nous dit cy deuant que la beatitude n'est autre chose que le souuerain bien. D'où vient que chacun iuge cest estat & condition de beatitude, qui est plus enuiee & desirée que toutes les autres. En cecy donc vous est proposée la forme & le modèle de l'humaine felicité, qui est les richesses, les honneurs, la puissance, la gloire & les voluptez, & considerant seulement cela Epicurus, & voyant que toutes ces choses apportent quelque contentement & delectation à l'esprit de l'homme, constitua par consequence le souuerain bien aux voluptez, Mais ie veux retourner au soing & à la sollicitude des hommes, l'en-

tendement desquels (bien que ce soit avec vne memoire obscurcie & voilée) cherche & court tousiours apres le souverain bien. Mais en la mesme sorte que les yurongnes, qui ne sçauent quel chemin ils doiuent tenir pour retourner en leur maison . Vous me pourriez demander, Vous semble-il que ceux-là errent qui s'efforcent de n'auoir besoin d'aucune chose? Car il n'y a rien qui puisse tant accomplir ny rendre parfaicte la beatitude qu'une condition abondante de toutes choses, & qui n'ayant besoin de rien de l'autrui, est à elle-mesme suffisante. Vous semble-il que ceux-là faillent, lesquels iugent que ce qui est meilleur que toute autre chose, se doit aussi honorer & priser par dessus tout? Non vrayemēt. Pource que tout ce que les mortels s'estudient & se trauaillent d'acquérir, il n'est pas à croire que ce soit chose mauuaise, ny que l'on doie reietter. L'autorité doit-elle estre nommée entre les biens? quoy donc? faut-il croire que ce qui est manifestement plus excellent que toute autre chose, soit chose de peu & de quoy l'on ne doie faire compte? Direz vous.

CONSOLAT. DE PHILOS.

que la gloire de la renommée soit à des-
priser? Il n'est pas possible qu'une chose
tres-excellente ne soit aussi iugée tres-di-
gne, de tres-grande reputation, & que
la beatitude ne soit angoisseuse, triste, ny
subiette à douleurs & fâcheries, qu'est-il
besoin de le dire? puis que iusques aux
plus petites choses, on ne desire seule-
ment que ce qui delecte en le possédant,
& qui donne plaisir à qui en a la iouys-
sance. & est cela même que les hommes
desirent tant, & ne recherchent pour au-
tre respect les richesses, les dignitez, les
royaumes, la gloire, & les voluptez, que
pource qu'ils pensent par le moyen d'i-
celles, qu'ils auront contentement, hon-
neur, autorité, reputation, & plaisir.
C'est donc une chose bonne que les hom-
mes vont cherchant par tant de diuers es-
tudes, en quoy il est aisé à cognoistre
combien est grande la force de la natu-
re. Car bien que les opinions soient di-
verses & differentes, toutesfois toutes
sont d'accord en l'amour du souverain
bien..

POÈME II.

IE veux d'une douce voix
Chanter avec quelles loix
Nature les choses guide
Dessous une ferme bride,
Pour conserver ce grand tour
En son eternal séjour
D'un nœud si ferme accrochées,
Que iamais ne sont laschées.

Le Lyon souffre lier
Son col d'un riche collier,
Et de la main de son maître
On le void doucement paistre.
Mais lors qu'il est despité,
Et qu'on l'a trop irrité,
Ayant receu quelque atteinte,
Il perd ceste douceur sainte:
De sa force il se souvient,
Et rompt le piège où il tient.

Ainsi le petit oyseau
Qui de rameau en rameau
Chante au touffu d'un bocage,
S'on le reserre en la cage,
Et qu'on luy donne à manger
Pour en priné le changer,

CONSOLAT. DE PHILOS.

Bien qu'une main curieuse
 Par plaisir soit fort soigneuse
 Le paistre & l'entretenir
 Pour cuyder le retenir,
 S'il apperçoit d'aventure
 Les bois ramez de verdure,
 Il ne fait que voleter
 Dedans la cage, & ietter
 La pasture qu'on luy baille,
 Et pour eschapper trauaille.

L'arbre que l'on tire à bas
 Par le coupeau, ne tient pas
 Courbé, mais il se redresse
 Quand libre sa branche on laisse,
 L'on ne faut iamais de veoir
 Phæbus retourner au soir,
 Qui tout eschauffé se baigne
 Dedans les ondes d'Espagne,
 Mais par vn autre chemin
 Son char reuiert au matin.

Tout ce qui a prins naissance
 S'en retourne à son essence,
 Et par diuers mouuement
 Recherche son element.
 Tant qu'à la fin il paruienne
 Où stablement il se tienne,
 Comme d'un cercle deioinct

Les bouts ensemble on rejoinct.

SOM. DE LA III. PROSE.

La Philosophie enseigne maintenant en particulier ce que cy dessus ell' a generale-ment proposé, Que la felicité ne git point és choses par quelques-vns faulxement estimées estre le souuerain bien : d'autant qu'elles n'accomplissent pas leurs promesses. Et premièrement elle prouue que les richesses ne donnent point tel contentement qu'elles semblent promettre, & pour lequel on les desire, attendu que la felicité est vn bien tres-suffisant de soy-mesme, & auquel rien ne manque. or le riche au milieu de son affluence est tousiours indigent. Secondement, qu'elles sont indigentes, attendu qu'elles ont besoin d'escorte pour leur conseruation. Tiercement, qu'elles ne tollissent point l'indigence à leur possesseur, attendu qu'il ne laisse d'estre suiet aux passions de faim, de soif, de froid, & autres necessitez.

PROSE III.

ET vous (ô terrestres animaux!) tout ainsi que seulement en figure & quasi comme en songe, vous conoissez quel est vostre principe: aussi auez vo' conoissance (sinon du tout parfaicte) telle au-

moins que vous la pouuez auoir, à quoy tend & quelle est la fin de la vraye beatitude, & là comme au souuerain bien l'entendement humain vous guide & achemine naturellement. Mais diuerses sortes d'erreurs vous en destournent & vous en retirent aussi. Considérez ie vous prie si par ces choses, par lesquelles les hommes pensent attaindre & obtenir la beatitude, ils peuuent arriuer à la fin à laquelle ils aspirent, & paruenir où ils pretendent. Car si les richesses, les honneurs, & autes telles choses peuuent faire qu'il semble qu'aucun bien ne manque à ceux qui les ont, Nous confesserons ceux-là heureux qui les peuuent acquerir. & si aussi elles ne peuuent satisfaire à tout ce que l'on s'en promet, & qu'au contraire ils ayent faute de beaucoup de biens, n'est-il pas aisé à iuger qu'en eux se retrouve non la vraye, mais seulement vne fausse & simulée beatitude? Je demande donc prenuerement à vous mesmes qui n'agueres estiez très riche, si entre tât de richesses vous n'avez iamais esté troublé ou passionné en vostre esprit pour quelque desplaisir ou iniure que vous ayez receuë.

receuë. Veritablemēt (dis-ie) ie n'ay point
souuenance d'auoir iamais esté si libre
d'esprit, ny si resolu, que ie ne me sois
tourmenté & donné fâcherie de quel-
que chose. Mais respondes moy (dict-el-
le.) Cela ne vous est-il pas aduenu, ou
pource que vous n'auiez pas ce que vous
eussiez voulu auoir, ou pour auoir ce que
vous eussiez voulu n'auoir point? Vous le
sçauiez biē (dis-ie.) Vous desiriez dōc (ce
dit-elle) ou la presence de cestuy-cy, ou
l'eslongnement de cestuy-là. Ie le confes-
se (dis-je.) A ceux-là (dit-elle) la chose que
ils desirent ne manque elle pas? Elle leur
manque (dis-ie.) Cestuy-là (dit-elle) qui a
besoin de quelque chose, ne peut en tout
ny par tout auoir suffisance, ny estre con-
tent en soy-mesme. Nō (dis-ie.) Vous dōc
(dit-elle) quelque riche que vous fussiez
souffriez ceste insuffisance. Il est tout cer-
tain (dis-je.) Les richesses donc (dit-elle)
ne peuuent ny faire que celuy qui les pos-
sede soit content & ait en soy-mesme
chose qui luy suffise, ny faire qu'il ne soit
indigēt & n'ait besoin de quelque chose,
cōme ceux-là qui se traueillēt à les amas-
ser s'asseurent & se promettent quand ils

les auront acquises. D'avantage il faut bien cōsiderer que les richesses n'ont aucune nature particuliere qui soit propre d'elles-mesmes, pour empescher qu'elles ne puissent estre prinſes & ostées à ceux qui les possèdent contre leur volonté. Je le confesse (dis-je.) Et pourquoy ne le cōfesseriez vous (dit-elle) puis que nous voyōs tous les iours ceux qui ont plus d'autorité & de puissance, les oster à ceux qui sont meindres maugré eux? Car d'où procedent tant de debats & procès, & quel'on oyt tant de plainctes aux cours, si ce n'est que les biens qui ont esté ostez à aucuns ou par force, ou par tromperie, sont redemandez? Il est vray (dis-je.) Dōc tout homme riche (dit elle) aura besoing d'ayde estrangere pour garder ses biens. On ne sçauroit nier cela (respondis-je alors.) Et toutesfois (dit-elle) il n'en auroit point de besoin, s'il n'auoit point de biens qu'il eust crainte de perdre. Il n'y a point de doubte (dis-je.) Donc la chose (dit-elle) luy est succedée tout au rebours. Pour ce qu'où il persuadoit que les richesses peussent d'elles-mesmes rendre les hommes suffisans & pleins de toutes choses,

elles les laissent plustost necessiteux & indigens de l'aide d'autrui. Mais par quel moyen est ce que les richesses peuvent chasser la necessité & l'indigence? Pourquoy les riches ne peuvent ils auoir faim? n'ont ils iamais soif, leurs membres ne peuvent ils point sentir le froid en hyuer? Vous me direz que ceux-là ont dequoy rassasier leur faim, estancher leur soif, & chasser le froid. Il est vray. Mais c'est ainsi que l'on peut bien remedier aux necessitez, & non pas les chasser du tout. Et l'indigence qui abboyetousiours, & tousiours demande, n'est iamais pleine: & par ainsi il est necessaire qu'il reste encor quelque chose à remplir. & tout ainsi que la nature se contente de tres-peu, trop ne peut suffire à l'auarice. Et pourtât si les richesses ne peuvent oster les necessitez, & au contraire qu'elles rendent necessiteux ceux qui les ont, vous n'avez point occasion de croire qu'elles vous puissent donner contentement.

POÈME III.

F ij

CONSOLAT. DE PHILOS.

Si l'or en telle abondance
 L'homme alloit amoncelant,
 Et qu'il eust en sa puissance
 Vne source d'or coulant,
 Qu'il vist ses maisons remplies
 Des plus precieux tresors,
 Et des perles mieux choisies,
 Apportez des rouges bors:
 Qu'il peust d'un labour utile,
 De cent boeufs appariez
 Fendre la terre fertile,
 Pourtant onc vous ne pourriez
 Le veoir auoir suffisance:
 Et encor il ne peut pas
 Ses tresors ny sa cheuance
 Emporter à son trespas.

SOMMAIRE DE LA PROSE IIII.

Voicy quatre belles raisons pour tesmoi-
 gner que les dignitez & magistrats ne con-
 tiennent point le souuerain bien, attendu que
 elles aussi ne conferent pas l'honneur & reue-
 rence qu'elles promettent. Premièrement, par-
 ce que bien-souuent les meschans les occupēt,
 pour lesquelles ils ne sont point plus venera-
 bles, ni respectez. Secondement, elles descou-
 urent les vices & imperfections des mal-viuās,
 par lesquelles ils sont rendus contemptibles.

Tiercement, elles s'auiilissent par l'opinion des hommes. car ceux qui sont esleuez en honneur combien qu'ils soyent respectez par les leurs, toutesfois les estrangers n'en font pas beaucoup d'estat. Quartement, par vicissitude & changement de temps elles viennent en desdain & mespris, comme cette ancienne, illustre & souveraine dignité Consulaire à Rome, & plusieurs autres, mesmement modernes.

PROSE IIII.

MAIS les dignitez (me direz vous) font respecter & rendent dignes d'honneur & reuerence ceux qui les obtiennent. Les magistrats ont ils bien tant de force, qu'ils puissent loger les vertus en l'esprit de ceux-là qui les exercent, & en chasser le vice? veritablemēt leur coutume n'est pas telle, & ne sçauent pas bānir la malice, mais plustost la manifester, & de là vient que bien-souuent nous sommes marriz & indignez de voir les magistrats estre tenus & exercez par les meschans. Et pour ceste occasiō Carulus voyant assis entre les Senateurs vn Nonius, ne se peut pas tenir de le taxer, & le desdaignant par vn Epigramme le feist cognoistre tel, que si en luy se fussent assem-

blez tous les vices du monde, l'appellant le contrefaict, & l'escroüellé. Voyez donc quel deshonneur & quel blasme apportent les dignitez aux meschans. & pour certain leur meschanceté feroit moins cognüe, si leurs estats ne les manifestoyent, & faisoient cognoistre à vn chacun. Mais vous pourriez vous ranger (encor que vous y fussiez contrainct par beaucoup de dangers) à estre compaignon de Decoratus, exerçâs tous deux ensemble vn mesme magistrat, le cognoissant homme vicieux & bouffon treidangerieux? & de vray, il n'est pas possible que nous puissions iuger ceux-là dignes d'honneur pour raison de leurs magistrats & offices, lesquels nous cognoissons du tout indignes d'iceux. Si vous voyez aucun doiüé de sâpièce, pourrez vous le iuger indigne de sâpience? ou d'estre reueré & respecté pour raison d'icelle? Non certes, car la vertu a vne certaine propre & particuliere dignité, dont elle remplit & fait capables ceux ausquels ell' est iointe. Et pource que les honneurs populaires ne peuuent faire cela, il est manifeste qu'ils n'ont d'eux-mesmes aucune beau-

ré ne dignité. En quoy il faut aduifer d'auantage, que si aucun est d'autant plus vil & abieët qu'il est blasmé de plusieurs, ne pouuans les dignitez faire respecter les meschans, elles font qu'ils soient plus blasmez & calomniez, les descourant & faisant cognoistre à vn chacun. mais ils s'en sçauent bien venger. car ils rendent bié le semblable aux Magistrats, les souillans & diffamás de l'ordure de leurs meschancetez. Mais afin que vous cognoissiez ceste vraye reueréce, ne pouuoir aduenir par le moyé de ces dignitez, notez cecy, si aucun qui auroit esté plusieurs fois Consul, alloit de fortune en pays estrange, & par les nations barbares, pensez-vous que tel honneur le peust à l'endroit de ceux-là faire venerable? Et toutesfois l'on ne peut douter que si les dignitez auoient d'ellesmesmes tât de pouoir qu'en quelque lieu que ce fust ils ne s'eslongneroient iamais de tel office, cōme le feu en quelque lieu que l'ōle mette est tousiours chaud: mais d'autât que nō leur propre vertu, mais vne fausse persuasīō des hōmes leur attribue cela, elles s'éua-

CONSOLAT. DE PHILOS.

nouyſſent ſoudain qu'elles ſont parue-
nues à ceux-là qui ne les eſtimēt ny tien-
nent pas pour dignitez. Il eſtvray (me di-
rez vous) que cela arriue entre les natiōs
eſtranges, mais encor entre celles-là où
elles ſont nées, elles ne durent pas touſ-
iours. C'eſtoit anciennement vne grande
authorité que d'eſtre Maistre du Palais:
ce n'eſt à ceſt' heure qu'un nom preſque
de rien: & l'ordre de Sénateur, vne gran-
de charge. Si quelque'un le temps paſſé
euſt pris le ſoing des viures du peuple
par vne chere année, on le tenoit pour un
grand perſonnage. Y a-il à ceſt' heure of-
fice plus abiecte? Car comme nous auōs
dict cy deuant, cela qui n'a de foy ny de
ſa nature aucune dignité ou honneur qui
luy ſoit propre, ains ſeulement par opi-
nion de ceux qui en vſent, tantost reçoit
splendeur, & puis tout ſoudain la pert.
Doncques ſi les magiſtrats ne peuēt fai-
re reſpecter les hommes, ſi par la corrup-
tion des meſchans qui les exercent, ils
enlaidiſſent, ſi par ſucceſſion de temps
ils delaiſſent d'eſtre honorables, ſi par
l'opiniō des perſonnes ils auiliſſent, quel-
le grande beauté y-a-il que l'ō puiſſe de-

LIVRE TROISIÈME. 65
firer, s'ils n'ont aucune d'eux-mêmes,
& s'ils n'en peuvent apporter à ceux qui
les possèdent?

POÈME IIII.

Combien qu'on vist Nérō de pourpre revestu,
Et qu'il ornast son chef de pierres précieuses,
Il estoit toutesfois de vices combattu,
Ce qui rendoit ses mœurs aux peuples odieuses.
Des Magistrats de Rome aucuns il decoroit,
Magistrats qui rendoiēt iadis un hōme insigne
Quand il estoit choisi: mais lors il n'honoroit
Ceux qui le recevoiēt d'une main tant indigne.
Qui doncques penseroit avoir quelque bon heur,
Quand d'une main indigne on reçoit quelque
honneur?

SOM. DE LA V. PROSE.

La puissance & faueur des Princes n'est ba-
stante pour feliciter l'homme, attendu qu'elle
ne luy fournit pas ce qu'elle promet, à l'occa-
sion dequoy l'on la recherche. Premièrement,
eux mesmes ne la possèdent pas, veu qu'ils ne
sont suffisans d'eux-mêmes pour conseruer
leurs Estats. Secondement, elle est de trop pe-
tite estendue. Et d'autant qu'un seul ne peut
dominer tout le monde, là où defaut la puis-
sance rendant l'homme heureux, là mesmes au
reciproque se fourrera l'impuissance les rendât

F V

CONSOLAT. DE PHILOS.

miserables. Tiercement, elle est tousiours annexée avec crainte & desiance, qui les empesche d'estre heureux. Quartement, elle ne trouue aucune assurance nulle part. & plus cette puissance est puissante, moins elle a de seureté.

PROSE V.

LEs Royaumes ou la faueur des Rois peuuét ils rendre vn hōme puissant? Pourquoy non, si ceste felicité luy peut tousiours durer? mais l'antiquité nous a laissévn infinité d'exemples, & en auons encor vn grād nombre de nostre temps, de tant de Rois qui d'heureux sont deuenus tres-miserables. O la belle puissance qui ne se peut seulement pas elle mesme conseruer! Mais si ceste puissance de regner est beatitude, n'est-il pas necessaire que si elle deffaut en quelque chose la felicité diminue, & qu'elle soit d'autant miserable? & encore que les Empires de ce monde s'estendent bien loing: si est-ce pourtant qu'il y a beaucoup de nations qui ne sont commandées d'aucun Roy, & de ce costé que deffaut la puissance, qui est cause de la felicité, par ce mesme endroit entre l'impuissance qui apporte

la misere, de laquelle il est necessaire que les rois ayent & souffrent la plus grande partie. Dionysius tyran de la Sicile, ayant esprouué à quels dangers luy & ses semblables estoient sous mis, disoit la peur des Rois estre semblable à celle là qu'ont ceux qui ont vne espée nue sur leur teste, laquelle ils craignent qu'elle doive à tous propos tomber, & les tuer. Quelle est donc ceste puissance laquelle ne peut ny chasser les morsures du soing, ny cuiter les esguillons de la crainte ? il n'y a point de propos de dire qu'ils ne voudroient pas viure en plus grande seureté. ils le voudroient bien, mais ils ne peuvent: & puis ils se vantent d'estre puissans. Iugez vous cestuy-là puissant, qui ne peut faire ce qu'il voudroit bien ? qui a vn nombre de satellites & gardes autour de luy ? qui a plus de peur de ceux qu'il veut espouuenter, qu'eux n'ont pas de luy ? qui se remet du tout à la puissance de ceux qui le seruent ? Qu'est il besoing que ie dispute à ceste heure de ceux qui ont la faueur des Rois, ayant fait voir que les rois mesmes sont si peu de chose ? Et bié sou-

Fvj.

CONSOLAT. DE PHILOS.

uent à tels mignons la faueur est cause de leur ruine, soit que les Rois soient bien fortunez, soit qu'ils soient en affliction. Neron cōtraignit Seneque son maistre à eslire de quelle mort il voudroit mourir. Antonius Empereur feit par ses soldats mettre en piéces Papinianus, lequel de tous ses courtisans auoit plus de credit: & tous deux voulurēt renoncer à leur authorité & quitter leur faueur, & Seneque mesmes offrit à Neron ses richesses, & feist ce qu'il peut pour se pouuoir retirer. Mais ny l'un ny l'autre ne peut faire ce qu'il auoit entrepris, estans traynez à leur ruine, par leur grāde authorité. Quelle puissance dōc est ceste là qui fait craindre celuy qui l'a, qui ne rend point assuré celuy qui la veut auoir: & de laquelle on ne se peut desfaire quand on a enuie? Pensez-vous qu'elle soit maintenue par les amis, lesquels nō la vertu, mais la fortune a fait vostres? Assurez-vous que l'amy que la felicité vous aura dōné, l'infortune le vous rendra ennemy. & quelle peste peut auoir plus de pouuoir pour faire nuyssance, qu'un familier qui vous soit ennemy?

POÈME V.

Qui veut se dire puissant,
 Qu'il maistrise sa colere,
 Et le vice delaisant
 Les passions mette arriere,
 N'assuiettissant seruil
 Son chef sous vn ioug si vil.
 Car soit que depuis l'Indoie
 Iusques au barbare Syhte
 On obeisse à tes loix,
 Et qu'on voye vne grand' suite
 De gens asserviz à toy,
 Qui tous t'ont donné la foy
 Si tu n'as l'esprit rassis
 De passions franc & libre,
 Et que de mordans soucis
 Tu n'ayes l'ame deliure,
 Toute autre puissance auoir,
 Ne se peut nommer pouuoir.

SOMMAIRE DE LA VI. PROSE.

La gloire mondaine ne fait rien pour parvenir à la beatitude, soit celle que la propre vertu de quelqu'un luy peut acquerir; soit celle qu'avec sa naissance il tire de la noblesse

CONSOLATION DE PHILOS.

de sa race. Car si la reputation que nous emportons par vne commune opinion, nous est iniustement acquise, nous craignons que le sujet n'en soit manifesté. Si c'est avec iuste raison; la Philosophie n'estime pas que la faveur populaire mérite d'estre colloquée parmy les biens qui consistent en operation vertueuse. Quant à la gloire de noblesse, il n'y a rien de si gauche ni de moindre estime qu'elle, si la vertu ne l'accompagne, attendu qu'aucun ne vult mieux que son prochain, fors celuy qui a la plus belle ame, & l'esprit plus capable de bonnes & louables actions.

PROSE VI.

Quant à la gloire il est assez manifeste combien elle est trompeuse & chose vaine. & pourtant le poëte tragique auoit bien raison, qui disoit la gloire ne seruir d'autre chose aux peureux mortels que de leur enfler & remplir les oreilles. plusieurs ont prins la grandeur de leur nom & de leur renommée d'une sorte & non-vraye opinion du vulgaire. Y a-il chose plus deshonneste que cela? car ceulx qui se sentent à tort priser & estimer, il est force qu'ils ayent honte des louanges qu'on leur donne, & qu'ils en rougissent. & bie

qu'ils les eussent meritées par leurs œuvres, que peuuent telles loüanges appor-
ter à la conscience de l'homme sage, qui
mesure son bien & le iuge non par l'o-
pinion du vulgaire, mais selon la verité
& selon la cōscience. Et si c'est vne cho-
se si belle d'auoir fait parler de soy, &
auoir acquis beaucoup de reputation, il
fault croire que ne l'auoir point fait, soit
chose vilaine & deshōeste. & estant ne-
cessaire, comme i'ay n'aguères dict, qu'il
y ait plusieurs nations ausquelles la re-
putation d'un seul homme peut arri-
uer; il aduiét que celuy que vous estimez
tant, n'a ailleurs reputation quelcon-
que. Outre plus ie ne pense pas qu'il
faille faire cas de la bienvueillance du
peuple: car ce n'est pas chose qui pro-
cede de iugement, ny qui soit pour touf-
iours durer. Qui est celuy qui ne sçache
bien que c'est vne chose vaine & inuile
que le nom de noblesse? que si vo^s la re-
ferez à la vertu d'autrui, elle n'est point
vostre, pource qu'il ne semble point
que la noblesse soit autre chose qu'une
certaine loüange procedant des merites
de vos predecesseurs. Que la loüan-

ge fait la noblesse, il est necessaire que ceux qui sont louez soient nobles, & pourtant la noblesse d'autrui ne vous peut illustrer, si vous n'estes illustre de vous mesme; & s'il y a aucun bien en noblesse, ie pense à mon iugement estre celuy là seul, qu'il est besoing aux nobles de ne forligner point & d'enfuiure la vertu de leurs predecesseurs.

P O E M E VI.

Tous les humains sont
De mesme substance,
Et sans respect ont
Egale naissance:
Car vn seul pere commun
Donne la vie à chacun.
Il donne au Soleil
La clarté cogneuë,
Et nous monstre à l'œil
La Lune cornuë,
Les astres il loge aux cieux,
Les hommes en ces bas lieux.
Et l'esprit tiré
D'essence diuine,
Il tient reserré

De dans la poitrine.

*Dont tous sont également
Les hommes naitz noblement.*

*Y a il pourquoy
Faire tant de mine,
Et estre en esmoy
De vostre origine:
Et vous vanter glorieux
De voz illustres ayeux?*

*Si vous pensez bien
A vostre naissance,
Et qu'il n'y a rien
Qui n'ait son essence
De Dieu, des humains facteur,
Et de toute chose authœur?*

*Qui du genre humain
Penserez vous estre
Infame ou vilain,
Sinon que son estre
Il delaisse, & soit suivant
Le vice, vertu fuyant?*

SOM. DE LA VII. PROSE.

Si la felicité gisoit en voluptez, il s'ensuy-
uroit vne grande absurdité. car les bestes en
seroient participantes. Ainfin ne peut elle con-
sister ny és plaisirs illicites, attendu les in-

CONSOLAT. DE PHILOS.
conueniens qui en reüssissent : ni és licites,
veu les ennuys & fascheries que le mariage
traîne quand & soy.

PROSE VII.

QVe diray-ie des voluptez du corps
dont l'appetit est plein d'angoisse,
& le rassasiement plein de repentance?
combien de maladies, & combien de
douleurs intolerables quasi comme vn
fruiet de leur meschanceté apportent
elles au corps de ceux qui en iouyssent?
Ie ne sçay point quel plaisir leur action
peult auoir : mais qui voudra se resou-
uenir de ses delices passées, il cognoi-
stra que l'issuë des voluptez est tristesse
& fascherie. Et si telles voluptez peu-
uent rendre l'homme heureux, rien
n'empeschera que les bestes ne se puis-
sent aussi dire heureuses, qui n'ont au-
tre soing que de saouler leur appetit, &
se remplir en leur desir. Ce seroit à la ve-
rité vn treshonnest plaisir, que celuy
que l'on reçoit de sa femme, & de ses
enfans : & est contre nature, ce que

quelqu'un disoit, que les enfans estoient
 les bourreaux. Car la condition des en-
 fans telle qu'elle peult estre, il n'est
 point besoin de vous ramentevoir com-
 bien elle poingt & touche au vif: vous
 l'avez autresfois esprouvé, & n'estes à
 ceste heure pour ceste occasion en pe-
 tite fascherie: Mais ie serois bien de
 l'opinion d'Euripide, qui dit que c'est
 un heureux malheur de n'auoir point
 d'enfans.

POÈME VII.

Tout humain plaisir
 A de sa nature
 De soudain saisir
 D'une aspre poincture,
 Et tousiours affliger ceux
 Que l'on void voluptueux.

Tout ainsi void l'on
 La volante abeille,
 De son aiguillon
 Faire la pareille,
 Laisant pour peu de douceur
 Un esguillon de douleur.

CONSOL. DE PHILOS.

SOM. DE LA VIII. PROSE.

La Philosophie monstre en cest endroit de combien de maulx sont enuoloppez ses biens esquels aucuns ont posé leur souueraine felicité. Premièrement, qui voudra faire montjoye d'or & d'argent, sera blasmé de rapine & concussion. car (dit l'Ethique) l'homme pecunieux est violent. Secondement, c'est chose dure de se soumettre à autrui pour en esperer des honneurs. & ainsi des autres consequemment. Outre plus, c'est chose trop frivole de faire estat des biens & facultez corporelles, attendu qu'en la plus part d'icelles les bestes nous surpassent. Aussi la beauté est vn bien de fort peu de valeur : veu qu'elle n'est que transitoire & superficielle.

PROSE VIII.

IL ne faut donc plus doubter que qui prend tel chemin pour aller à la vraye beatitude, se perd & se fouruoye ; & tel sentier ne le peult mener ny conduire où il pense d'aller. & ie vous veux monstrier en combien de maux il est enuoloppé. Car vous traueillerez vous d'ammasser de l'or & de l'argent, si pour

l'auoir il le faut oster à vn autre à qui il appartient? Vouldrez vous vous rendre illustre par le moyen des magistrats & dignitez, pour supplier & courtoiser ceux qui les donnent? cherchez vous d'estre honoré & respecté d'auantage que les autres en vous humiliant & abaissant pour demander les honneurs? Desirerez vous d'auoir beaucoup de puissance pour estre suiet aux embusches & aguets de ceux à qui vous commanderez, & estre soubmis à vne infinité de dangers? vouldrez vous acheter de la gloire par vne infinité de travaux, & ne viure iamais asseuré? viurez vous en voluptez & en delices? Vous serez donc blasmé d'un chacun. car qui est celuy qui ne se desdaigne & se desplaist de faire seruice à chose si vile & abiecte qu'est le corps? Mais que ceux là s'appuyent d'une debile possession, & se fortifient de peu de chose, qui font tant de cas des biens du corps. Car pourrez vous iamais en grandeur surpasser les Elephans, en force vaincre les Taureaux, & courir plus legerement que les Tygres? Regar-

CONSOLAT. DE PHILOS.

dez l'espace du ciel, sa fermeté & sa légèreté ; cessez quelquefois de vous amuser à ces choses basses. & toutesfois le ciel n'est point tant admirable pour le respect de ces choses, qu'il est pour le regard de la raison, qui le regit & gouverne: mais la grace de la beauté est si fautive & fuit plus légèrement que les fleurs de la primeuere. Et si comme dit Aristote, nous auions les yeux d'un Lynce, que nous peussions voir à trauers les corps opposez à nostre veüe, voyans les entrailles ne iugerions nous pas que le corps d'Alcibiade seroit chose tresvilaine & deshonneste, la superficie duquel nous semble si belle? Ce n'est donc point la nature qui fait que vous semblez beau, mais la foiblesse des yeux qui vous regardent. Or estimez les biens du corps tant que vous voudrez: mais sçachez aussi que tout ce que vous y pourrez voir se peut légèrement dissoudre de la moindre chaleur d'une petite fleur tierce: Et partât sans cōclure que les choses lesquelles ne peuuent produire les biens que l'on s'en promet, & que l'on en espere, ne peuuent estre

parfaictes : & pour n'estre tous les autres biens comprins en ces choses là, elles ne peuuent estre le chemin ni le sentier à la vraye beatitude, ny ne peuuent rendre l'homme bien-heureux.

POEME VIII.

Bon Dieu combien l'ignorance
 Fait les hommes fouruoyer,
 Et peut, tant a de puissance,
 Du droit chemin desuoyer!
 Ne pensez pas l'or qu'on prise
 Des arbres verds arracher:
 N'allez point la perle exquise
 Dessous le pampre chercher.
 Vous ne tendez aux montagnes
 Pour le poisson amasser,
 Ny aux humides campagnes
 N'allez aux biches chasser.
 Les hommes ont cognoissance
 Des endroits plus recellez,
 Où les perles ont naissance,
 Et les poissons escaillez.
 Mais encor usqu'à ceste heure
 Trompez ils ne scauent pas

CONSOL. DE PHILOS.

*Le lieu où ce bien demeure,
Qu'en vain ils cherchent cy-bas.*

*Car ce bien au ciel reside,
Et l'homme est deceu aussi,
Qui autrepart qu'au ciel cuyde
Le pouuoir trouver icy.*

*Que faut-il donc que ie prie
Pour les hommes insenséz?
C'est que leur faim assouue
Soit de tresors amassez:*

*Et vestus de gloire vaine,
Asin qu'ils cognoissent mieux
Que la richesse est certaine
De ce bien qui est aux cieux.*

SOM. DE LA IX. PROSE.

Après auoir discoursu de l'erreur de ceux qui constituent leur beatitude és biens corporels & de fortune, la Philosophie vient à monstrier quelle est la vraye felicité à laquelle le Sage aspire. Premièrement elle maintient que toutes les suffisantes beatitudes imaginaires sont tromperesses, & n'effectuent ce qu'elles promettent en apparence. Secondement, elle remarque la cause de la faulse felicité, & la declarant fait conoistre que la suffisance, puissance & reuerence, la gloire & le plaisir, ne sont de faict qu'une seule chose. & monstre
en suite

en suite comment les hommes les separent & diuisent l'une de l'autre abusiuemēt; attendu qu'elles sont indiuisibles, quoy que differentes de noms: & quiconque cherche vne partie d'une chose indiuisible, ne rencontrera iamais ni cette partie ni la chose mesme dont il cherche la partie. Aussi quiconque desire l'une des cinq choses susdites, les souhaite toutes entāt que touche la beatitude. Et d'autant que ceste beatitude est Dieu mesme, elle est indiuisible. par consequent, toutes les cinq ne sont qu'une indiuisiblement. Mais iacoit qu'aucun les pourchasse toutes coniointement, toutefois il n'y trouuera point de solide ni de souuerain bien. & combien qu'en general il y cherche sa felicité, si est-ce qu'il peche en la particularité, la pensant trouuer en des biens temporels & passagers. Or les causes & la forme de la faulse beatitude conuës, il est aisé de recueillir en quoy consiste la vraye & parfaite: pour laquelle aconsumure, l'innocation du nom de Dieu est necessaire, seul & seur fondement de toutes bonnes œuures.

PROSE IX.

QV'IL suffise d'auoir donc iusques à ceste heure d'escrire la forme de la faulse & mensongere felicité; & ayant bien cogneu & veu quelle elle est, il est temps de monstrier quelle est

G

CONSOL. DE PHILOS.

*Le lieu où ce bien demeure,
Qu'en vain ils cherchent cy-bas.*

*Car ce bien au ciel reside,
Et l'homme est deceu aussi,
Qui autrepart qu'au ciel cnyde
Le pouuoir trouuer icy.*

*Que faut-il donc que ie prie
Pour les hommes insenséx?
C'est que leur faim assouuie
Soit de tresors amassex:*

*Et vestus de gloire vaine,
Asin qu'ils cognoissent mieux
Que la richesse est certaine
De ce bien qui est aux cieux.*

SOM. DE LA IX. PROSE.

Après auoir discoursu de l'erreur de ceux qui constituent leur beatitude és biens corporels & de fortune, la Philosophie vient à monstrier quelle est la vraye felicité à laquelle le Sage aspire. Premièrement elle maintient que toutes les suffisantes beatitudes imaginaires sont tromperesses, & n'effectuent ce qu'elles promettent en apparence. Secondement, elle remarque la cause de la faulse felicité, & la declarant fait conoistre que la suffisance, puissance & reuerence, la gloire & le plaisir, ne sont de fait qu'une seule chose. & monstre
en suite

en suite comment les hommes les separent & diuisent l'une de l'autre abusiuemēt; attendu qu'elles sont indiuisibles, quoy que differentes de noms: & quiconque cherche vne partie d'une chose indiuisible, ne rencontrera iamais ni cette partie ni la chose mesme dont il cherche la partie. Aussi quiconque desire l'une des cinq choses susdites, les souhaite toutes entāt que touche la beatitude. Et d'autant que ceste beatitude est Dieu mesme, elle est indiuisible. par consequent, toutes les cinq ne sont qu'une indiuisiblement. Mais iacoit qu'aucun les pourchasse toutes coniointement, toutefois il n'y trouuera point de solidenī de souuerain bien. & combien qu'en general il y cherche sa felicité, si est-ce qu'il peche en la particularité, la pensant trouuer en des biens temporels & passagers. Or les causes & la forme de la faulse beatitude conuēs, il est aisé de recueillir en quoy consiste la vraye & parfaite: pour laquelle aconfuyure, l'innocation du nom de Dieu est necessaire, seul & seur fondement de toutes bonnes œures.

PROSE IX.

QU'IL suffise d'auoir donc iusques à ceste heure d'escrire la forme de la faulse & mensongere felicité; & ayant bien cogneu & veu quelle elle est, il est temps de monstrier quelle est

G

la vraye. Je voy bien, dis-je, qu'il n'est pas possible ny que les richesses ayent suffisance, les Royaumes puissance, les dignitez reueréce, la gloire reputation, ny les voluptez cōtētement. Auez vo^{us} bien entendu, dict-elle, les occasions pourquoy il est ainsi? Il me semble, dis-je, les auoir veuës, mais seulement comme par vne petite fente: & ie desirerois fort que vous me les feissiez plus particulièrement connoistre. Il est fort ayse & facile, dict-elle, pour ce que ce qui est de sa nature simple & indiuisible, l'erreur des hōmes le separe, & du vray & parfait, le meine & conduit au faux & imparfait. Car pēsez vous que qui n'a besoin d'aucune chose, ait besoin de puissance? Non, dis-je. Vous auez bien respondu, dict-elle. car si aucune chose est en quelque partie de petite & debile force, il est necessaire qu'elle ait de ce costé là besoin de l'ayde d'autrui. Il est ainsi, luy respondis-je. La suffisance & la puissance, dict-elle, ne sont-elles pas d'une mesme nature? Il le semble ainsi, dis-je. Vous semble il, dict-elle, que telle chose doieue estre desdaigné,

ou bien recherchée plustost que toutes autres choses ? On ne peut douter de cela , dis-je. Adiouſtons encor à la puissance , & suffisance , la reuerence , dict-elle : de sorte que nous iugions que ces trois choses ne soient qu'une seule. Adiouſtons , dis-je. car nous voulons aduouër ce qui est vray. Pensez-vous (dict-elle) que cela soit vilain & abiect , ou bien illustre & noble ? mais aduisez bien ce que desia vous m'avez accordé , que ce qui n'a besoin d'aucune chose , est trespuissant & digne de tresgrand honneur & reuerence. Que si la noblesse luy defaut , & que de soy-mesme il ne se puisse rendre illustre , il est en quelque sorte vil & mesprisable. Ie ne puis que ie ne confesse , dis-je , que cela ne soit illustre. Il s'ensuit donc , dict elle , que la gloire , & la noblesse ne different en façon du monde , des trois choses deuant dites. Il est bien vray , dis-je. Or est-il tout manifeste , dict-elle , que ce qui n'a besoin d'aucune chose , qui peut tout de soy-mesmes , & qui est digne d'honneur & de reuerence,

CONSOLAT. DE PHILOS.

soit encor occasion de plaisir & de ioye. Je ne pourrois, dis-je, penser que parmy choses semblables se puisse mesler & couler la douleur & fascherie. Et pourtant faut necessairement confesser, qu'estans bien certaines les choses deuant dictes, elles soient encore accompagnées & remplies de ioye & d'allegresse. Ouy, dict-elle: & d'auantage il est encore necessaire pour ces mesmes raisons, que la suffisance, la puissance, la noblesse, la reuerence, & le plaisir soient de noms du tout dissemblables, mais pourtant d'une mesme substance, & nullement differente. Il est necessaire, dis-je. Cela donc, dict-elle, qui est seul & simple de sa nature, a esté diuisé & separé de prauement par les hommes: & quand ils se trauaillent, & s'efforcent d'acquiescer vne partie de chose qui n'a point de parties, ils n'en peuvent posseder vne portion, d'autant qu'il n'y en a point, & si ne peuvent s'acquiescer toute la chose mesme, qu'ils ont affectée. Et pourquoy dis-je, celuy qui pour fuyr pauvreté recherche d'auoir des richesses, ne se soucie pas d'estre

puissant, & veut plustost estre veu homme de peu, & incongneu, & se priuer encore de quelques plaisirs de nature, que de perdre l'or & l'argent qu'il s'est amassé? Et cestuy là ne peut auoir par ce moyen suffisance : Car il est abandonné de pouuoir, combatu d'ennuis & fascheries, rendu abiect pour sa turpitude, & faict incogneu pour l'obscurité de sa race. Mais celuy qui desire seulement d'auoir beaucoup de pouuoir, distribue prodigalement les richesses, desdaigne les voluptez, & les honneurs, qui sont priuez de puissance, n'estime rien la gloire : & encor à cestuy là, comme vous pouuez voir, manquent plusieurs choses. Pour ce qu'il aduient quelquefois, qu'il a encore besoin de ce qui luy est plus necessaire, & qu'il se sent espoint d'angoisses, & traouillé d'une infinité de soin : & ne pouuant chasser de luy ces choses, il ne se peut dire puissant, qui est ce qu'il desiroit le plus. On peut en ceste mesme façon discourir des honneurs, de la gloire, & des voluptez. Pource qu'estant vne seule de ces choses, le mesme

CONSOLAT. DE PHILOS.

que toutes ensemble; quiconque cherche d'en auoir vne quittât les autres, ne peut seulement paruenir à celle là qu'il recherche d'auoir. Que seroit-ce donc, dis-ie, si quelqu'un desiroit de les auoir toutes? Cestuy là, dict-elle, voudroit atteindre au but de la souveraine beatitude; mais il ne la pourroit pas trouuer en telles choses. Car cōme nous auons dict & monsté, elles ne peuvent faire ny donner ce que l'on attend d'elles, & ce qu'elles promettēt. Non, dis-ie. Il ne faut dōc pas chercher, dict-elle, la vraye beatitude en ces choses, de chacune desquelles separément l'on se promet d'auoir ce que l'on desire. Je le confesse, dis-ie, & n'y a rien plus vray que cela. Vous auez donc bien entendu, dict-elle, la forme, & quelle est la faulx felicité. Or tournez à ceste heure les yeux de vostre entendement de l'autre costé, & vous verrez bien tost quelle est la vraye, que nous auons promis de vous monstrier. Il me semble, dis-ie, qu'elle doit estre cogneuë, & manifeste, & mesmes aux aucugles, & l'aez assez declarée tantost: voulant monstrier & fai-

re veoir quelle estoit la faulſe. Car, ſi ie
 ne me trompe, telle eſt la vraye & par-
 faiſte felicité, qui donne ſuffiſance à
 l'homme, le rend puiſſant, le fait reue-
 rer, luy apporte de la reputation, &
 le tient ioyeux. Et afin que vous co-
 gnoiſſiez que i'ay bien conſideré tout
 ce que vous avez dit : Je ne doute au-
 cunement que telle ne ſoit la vraye &
 parfaicte beatitude, qui ſeule peut
 vrayement donner vne de ces choſes,
 pource que routes enſemble ne ſont
 qu'une meſme. O mon nourriſſon, dict-
 elle, que ie vous eſtime heureux d'auoir
 ſi ſaincte opiniõ, pourueu que vous ad-
 iouſtiez. Et quoy? diſ ie. Penſez vous,
 dict-elle, qu'entre les choſes mortelles
 & caduques l'on puiſſe trouver vne tel-
 le condition? Non, diſ-ie. car vous m'a-
 vez faiſt entendre qu'oultre ceſte con-
 dition lon ne peut rien deſirer d'a-
 uantage. Ces choſes, dict-elle, ſem-
 blent ſeulement apporter aux pauvres
 mortels les images & ſimulacres du
 bien, & quelques biens imparfaits: mais
 elles ne peuuent en façon du mon-
 de apporter le vray & parfaict bien.

G iiij

CONSOLAT. DE PHILOS.

Je le confesse, dis-ic. Ayant donc cognéu, dit-elle, quelle est la vraye felicité, & ce qui la represente faulxement, il reste que vous sachiez les moyes de l'auoir, & de l'acquerir. C'est ce que j'attends il y a long temps, dis-ic. Mais, dit-elle, puisque, comme il plaist à Platon en son Timee, l'on doit implorer la grace & l'ayde de Dieu, & mesmes aux choses moindres, qu'estes vous d'aduis que nous deuions faire, affin que nous meritions de trouuer le siege, & la residence de ceste souueraine beatitude? Il fault, dis-ic, inuoquer le Pere de toutes choses, sans lequel l'on ne peut bié fonder vn commencement, de quoy que ce soit. Vous auez bien dict, dit-elle, & soudain elle commença à chanter ainsi.

POEME IX.

Createur de toutes choses,
 Qui tout regis, tout disposes,
 Et par ordre les maintiens,
 Les gouuerne & les retiens:
 Tu fais que les temps se suivent,
 Et que les saisons arrivent,

*A leur tour, & tout seul stable,
Fais toute chose muable.*

*Ne faut arriere de toy
Chercher la cause pourquoy
As en diuerse maniera,
De la matiere premiere
Tiré les formes, & fait
Vn ouurage si parfait
En tout & en ses parties
Sur les Idées basties,
Qu'en ton intellect diuin
Encloses tu tiens, affin
Que ce bel œuvre accomplisses,
Et beau comme toy le fisses,
A ce n'estant incité
Que par ta seule bonté.*

*Toy qui d'éternelles chaines,
Tous les Elemens enchaines,
Et qui les faiz conuenir,
Et liex se maintenir,
Par vn nombre qui assemble
Le chaud & le froid ensemble,
Le sec & l'humidité:
Qui a le feu limité,
Et qui garde que la terre
Dedans les abyssmes n'erre,
Et l'ame qui deffoubz toy,*

G v

CONSOL. DE PHILOS.

Donne à ce monde la loy,
 Tu as dedans le ciel close
 Dont la course elle dispose,
 Et s'espend en faicts diuers
 Aux membres de l'vniuers:
 Qui par des cercles se tourne,
 Puis en soy mesme retourne,
 Et de l'intellect diuin
 Va costoyant le chemin,
 Qui sans du sentier se tordre
 Les Cieux il meine en leur ordre.
 De luy leur naissance ont pris.
 Les ames de moindres pris
 Dont les bestes se remuent,
 Et les plantes s'esuertuent
 De croistre & produire aussi.
 Mais tu as plus de soucy
 De celles dont tu animes
 Les hommes que tu estimes.
 Car sur ton char argenté
 Tu les mets à ton costé,
 Et peuples de ceste race
 Tout ce que le ciel compasse
 Entre ses bras azurez,
 Puis tu les reprens aprez.
 Sois moy donc Seigneur profite,
 Et fais Pere que ie puisse

L'esprit aux cieux esleuer,
 Et que ie puisse trouuer
 Du parfait bien la fontaine
 Et la clarté souveraine,
 Que mes yeux enluminez
 Ne soient jamais destournez
 De toy, dissouls le nuage :
 Retourne donc le visage,
 Et soient mes yeux obscurcis
 Par ta splendeur esclarcis.
 Car tu es des gens de bien,
 Calme repos, paix, soustien;
 Et leur but est de te voir,
 Pour guide & nocher t'auoir.

SOM. DE LA X. PROSE.

Parce que beaucoup de personnes n'esti-
 ment point y auoir d'autres biens en nature
 que ceux qu'ils peuuent apprehender par leur
 sensualité, la Philosophie prouue que de faict
 il y en a vn souverain : puis monstre qu'en
 Dieu seul gist la vraye & parfaite felicité,
 non comme chose distincte de luy, comme
 accidēt de son sujet, car il est la meisme beati-
 tude, qui ne differe en riē de lui, autrement il ne
 seroit le souuerain biē, ce qu'ō ne scauroit dire
 sans blasphemē. D'auantage, ce qui formelle-

G vj

CONSOLAT. DE PHILOS.

ment est le principe de toutes choses, c'est le souverain bien, qui ne peult auoir de principe. Tel est Dieu. par consequent il est formellement le souverain bien. Or le souverain bien est la beatitude. & pourtant Dieu est formellement la felicité mesme. Que si la beatitude différoit d'auec Dieu, attendu que l'un & l'autre ne sont qu'un souverain bien; il y auroit deux souverains biens, desquels l'un ne seroit pas l'autre. & l'un manquant à l'autre, pas vn des deux ne seroit parfait ni souverain bien. car parfait est ce à quoy rien ne manque. Il fault donc necessairement que la beatitude ne soit autre chose que Dieu mesme. Dont s'ensuit de rechef, que tout homme heureux est Dieu: attendu que la beatitude est la diuinité mesme, & que par acquisition de beatitude les hommes sont faits heureux.

PROSE X.

PVis que vous auez des-jà veu la forme, & la semblance du bien imperfect, & quel est aussi le vray & perfect: il ne sera point hors de propos, de vous monstrer en quoy consiste ceste perfection de felicité. Et me semble que premierement nous deuons chercher si vn bien, tel que nous l'auons cy-

deuant décrit, se pourra trouuer, ou nō, aux choses de nature : Affin que nous ne soyons trompez & deceuz par vne vaine imagination, nous persuadant contre verité, l'estre d'une chose, laquelle on ne peut nier qui ne soit, & que tel bien est comme vne source & vraye fontaine de tous les autres biens. Car tout ce qui est imparfait, est dit imparfait, par defect & diminution du parfait. D'où vient que si en quoy que ce soit, il se trouue quelque imperfection, il est necessaire qu'elle ait aussi ie ne sçay quoy de parfait. Car otez toute la perfection d'une chose, on ne peut imaginer, ny penser d'où elle peut proceder, ny qui est cause de l'estre de telle imperfection. D'autant que nature ne prend iamais commencement des choses qui ont quelque defect, mais procedant des entieres & accomplies vient & s'escoule en ces choses basses, infimes & infructueuses. Et si, comme nous auons cy deuant prouué, il y a quelque vaine & imparfaicte felicité, l'on ne peut aussi doubter qu'il n'y en ait vne parfaicte & asseurée. Ceste conclusion est bien vraye & necessaire, dis-je. Mais, dict-elle, con-

siderez en ceste sorte où elle peut habiter. La commune imagination, & conception des hommes aduoüe que Dieu est souverainement bon, & autheur de toutes choses. Car ne pouuant comprendre chose meilleure, que Dieu, on ne peut nier qu'il ne soit bon, n'y ayant rié meilleur que luy. & la raison veut que Dieu estant tout bon, en luy soit encor le bien parfaict. Car s'il n'estoit ainsi, il ne pourroit estre le principe de toutes choses, pource qu'il y auroit autre chose plus excellente, en laquelle seroit le bien parfaict, & qui sembleroit estre precedente, & plus ancienne: d'autant que les choses parfaites & accomplies sont premieres que les imparfaites, & où il y a quelque default. Mais il faut confesser, d'autant que l'on ne peut proceder en l'infini, le souverain Dieu estre remply du parfaict, & souverain bien. Or nous auons mis la vraye beatitude, au bien parfaict. Il fault donc croire qu'en Dieu seul est la vraye beatitude. Ie vous entends bien, dis-ie, & est impossible de vous pouuoir contredire. Mais ie vous prie considerez, cōme avec bonne raison & saintement nous a-

nous conclud Dieu estre remply du sou-
 uerain bien. Et en quelle sorte? dis- ie. A-
 fin que vous ne pensiez, dict elle, & que
 vous n'imaginiez Dieu pere de toutes
 choses, auoir prins d'ailleurs, & hors de
 soy le souverain bien, duquel no^r disons
 qu'il est remply, ou l'auoir ainsi naturel-
 lement, que vous estimiez que la substā-
 ce de Dieu qui a la beatitude & celle de
 la beatitude qui est possedée de luy, soient
 substances diuerses. Car si vous pensez
 que ceste beatitude soit hors de luy, &
 qu'il l'ait prise d'ailleurs: Il faut que vous
 confessiez que celuy qui donne est plus
 excellent que celuy qui reçoit. Mais nous
 confessons, comme il est bien raisonna-
 ble, que Dieu est plus excellent que tou-
 tes autres choses. Et s'il l'a de sa nature:
 mais que pourtant il soit different de sa
 propre substance, quand nous parlons de
 Dieu, auteur de toutes choses, qui pour-
 ra imaginer celuy qui a sceu si bien vnir
 & ioindre ensemble ces choses diuerses,
 sçauoir est Dieu & le souverain bien? Et
 puis ce qui est different de quelque cho-
 se, n'est iamais la chose de laquelle il dif-
 fere. Et pourtant ce qui est de sa nature

CONSOLAT. DE PHILOS.

different du souuerain bien, n'est pas le souuerain bien. Or n'est-il pas licite ny bien seant de penser cela de Dieu. Car il est tout certain qu'il n'y a rien de si excellent, que luy: d'autant qu'il n'est pas possible, que la nature de quelque chose que ce soit, puisse estre meilleure que son principe. Donc l'on peut conclure avec raison, que qui est le principe de toutes choses, est encor de sa nature, & de sa propre substance le souuerain bien. C'est tresbien conclud, dis-ie. Mais nous auôs dict-elle, confessé que le souuerain bien est la beatitude. Il est vray, dis-je. Il faut donc que nous confessions aussi, dict-elle, que Dieu est ceste mesme souueraine beatitude. Je ne puis, dis-ie, en sorte que ce soit contredire vos premieres propositions, & voy bié que d'icelles il s'ensuit ce que vous venez de dire. Regardons ie vous prie, dict-elle, si nous le pourrions mieux & plus clairement prouuer. Deux biens souuerains, qui soient entre-eux diuers, & differens ne peuuent estre. Car les biens qui sont dissemblables, l'un n'est pas ce qu'est l'autre. Pource qu'à l'un de ceux là, l'autre deffault. & c'est chose manifeste que celuy qui n'est pas parfait,

n'est pas souverain bien. Donc ces biens là qui sont souverains, ne peuvent en façon du monde estre differens. Mais nous auons n'aguères monsté que Dieu, & le souverain bien est vne seule, & mesme chose: & pourtant il s'ensuit necessairement, que la souveraine beatitude, est la souveraine diuinité. Il n'y a, dis-je, chose en effect si certaine, que cela, ny micux appuyée de raison. Et si ne se peut conclure de Dieu plus dignement, qu'ainsi. Or comme les Geometriens ayans monsté leurs propositiōs, en tirent certaines consequences, qu'ils nomment auantages: Je veux de mesmes vous donner vn surcroist & par dessus, que les hommes ayans esté adoptez de la beatitude, & l'ayans acquise, se peuuēt dire bienheureux. Et la beatitude estant la mesme diuinité, il est manifeste q̄ la beatitude red l'homme heureux, cōme la iustice fait l'homme iuste & la sapience le fait sage: il faut pareillement conclure, & pour ceste mesme raison, que qui a acquis la diuinité, est Dieu. Quiconques donc est bien-heureux, est Dieu: & bien que Dieu soit seul de sa nature, si en peut-il estre plusieurs, par participation. Vrayment (dis-je) voila vn

CONSOLAT. DE PHILOS.

fort beau surcroist & par-dessus, ou auantage, comme vous le voudrez nommer. Mais cela est encor plus beau, dict-elle, que nous y pouuons adiouster avec raison. Et quoy, dis-je? Encore, dict-elle, qu'il semble que la beatitude contient beaucoup de choses: A sçauoir si elles sont tellement jointes & vnies ensemble, qu'elles facent le corps de la beatitude, comme composé de plusieurs & diuerses parties: ou bien s'il y en a vne seule qui contienne & comprenne en soy la substance de la beatitude, & à laquelle toutes les autres se referent. Je voudrois fort, dis-je, que vous me peussiez declarer, & faire resouuenir de ces choses. Ne croyons nous pas, dict-elle, que la beatitude soit vn bien? Ouy vraiment, dis-je & le souverain encore. Il faut, dict-elle, dire cela de tout le reste. Car la mesme souveraine suffisance, la souveraine puissance, la reuerence, la noblesse, & la volupté sont iugées beatitude. Que voulez vous dis-je, conclure par là? A sçauoir, dict-elle, si la suffisance, la puissance, & les autres choses encore, sont comme les membres & parties de la beatitude:

ou si toutes se rapportent à vn seul bien, comme à vn chef. l'entends bien, dis-je, que vous proposez ce qu'ó doit chercher: mais ie voudrois bien oyr vne fin, & vne resolution de ce que vous ne determez point. Apprenez, dict-elle, avec discretiõ comme cela se doit entendre. Si tous ces biens-là estoient membres de la beatitude, ils differeroient entre-eux. Car telle est la nature des parties, que plusieurs & diuerses choses font vn corps. Mais nous auons cy-deuant monsté, que tout cela n'est qu'une mesme chose. Ils ne peuét donc estre parties. Autrement la beatitude seroit composée d'un membre, ce qui ne peut estre. Il n'y a point de doute en cela, dis-je: mais i'attends le demeurant. Il est tout certain & manifeste, dict-elle, que tout se rapporte à vn bien: pour ce que l'on cherche d'auoir suffisance, d'autant que l'on le iuge bien: & le mesme croit-on de la puissance, & faut penser le semblable des honneurs, de la gloire, & des voluptez. Le but donc & l'occasion de desirer toutes choses, c'est le bien. Car ce qui n'a en soy ny apparence, ny en effect aucun bien,

CONSOLAT. DE PHILOS.

n'est en aucune sorte desirable: & au contraire les choses qui ne sont bonnes d'elles mesmes, ny de leur nature, toutesfois si elles en ont quelque apparence, & sont reputées telles, elles sont desirées, comme vraiment bonnes. Et pourtant la cause & le principal fondement, pourquoy les choses sont desirées, n'est pas à tort reputée estre le bien: & la chose qui fait desirer vne autre, est desirable sur toutes. Comme si quelqu'un pour sa santé vouloit monter à cheual, cestuy-là ne desireroit point tant le mouuement qu'il pourroit faire estant à cheual, comme l'effect de la santé. Puis donc que toutes choses sont desirées pour bien, elles ne sont pas plus desirées, que le bien mesme. Mais d'autant que nous auons dict, que toutes choses sont desirées pour le respect de la beatitude seulement: c'est donc la seule beatitude que l'on desire. & pourtant il est manifeste, que ce n'est qu'une mesme substance, que du souverain bien, & de la beatitude. Je ne voy point, dis-je, pourquoy quelqu'un puisse nier cela. Mais nous auons monstre, dict elle, que Dieu & la vraye beatitude ne

sont qu'une mesme chose. Il est vray,
dis-je. Je puis bien donc, dict-elle, seure-
ment conclure, la substance de Dieu n'e-
stre aucune autre chose, que le souverain
bien.

POÈME X.

Vous tenez que la conuoitise
Tient en ses laqs arrestez
Et qui n'auez l'ame esprise
Des mondaines voluptez.
Venez pour vostre misere
Et vos travaux allegier,
Voicy le lieu salutaire
Pour de vous les estranger.
Ny l'or que parmy leur onde
L'Herme & le Tage ont rollé,
Ni dont l'Inde mer abonde,
Le tresor amoncelé,
L'esprit pesant ne resueille,
Beant de la faim de l'or:
Mais son œil plus fort sommeille,
Esblouy de ce tresor.
Ce dont on est tant cupide
Et qui le desir seduit,
Dedans son grand ventre humide,

CONSOLAT. DE PHILOS.

*La terre vous l'a produit.
Mais ceste belle lumiere,
Qui peint le ciel de clarté,
Banit le soucy arriere,
Qui tient le cœur arresté,
Et si quelqu'un sçait cognoistre
Ceste diuine splendeur,
Il croira le soleil estre
Aupres d'elle sans lueur.*

SOM. DE LA XI. PROSE.

La Philosophie ameine maintenant Boëce à la conoissance de ce que n'agueres il confessoit ignorer. Premièrement elle definit le souuerain bien. Secondement, monstre quelle est la fin de toutes choses. Et d'autant que toutes choses desirent n'estre qu'une, (comme n'ayans plus expedient moyen pour s'entretenir, que cette vnion & liaison) & conseruer leur estre en le continuant: s'ensuit que le bien est ce que toutes creatures desirent, d'autant quel'Vn & le Bien sont vne mesme chose. Ce qu'elle prouue premierement par les animaux: Secondement par les creatures vegetables, arbres, herbes & autres plantes: Tiercement par les inanimées & insensibles mesmes, lesquelles neantmoins desirent d'estre, & appetent chacune ce qui luy est propre. Ce qui appert par deux signes. Le premier, Que toutes choses par inclination naturelle tendent à leur

propre lieu, comme les pesantes en-bas, les le-
geres en hault. le deuxiesme: Qu'elles sont soi-
gneuses de conseruer leur propriété naturelle,
par laquelle elles continuent leur estre. Or le
moyen és creatures de conseruer cet estre, c'est
d'estre vnies ensemble. Donc toutes desirant
cette vnté. L'vnté n'est autre chose que le bien
mesme. Partant la fin de toutes choses est d'ap-
peter leur souuerain bien.

PROSE XI.

IE suis, dis-ie, bien d'accord avec vous
en cela. Pource que toutes ces choses
vnies, & attachées ensemble avec bônes
raisons sont toutes apparentes. O que
vous estimerez beaucoup, dict-elle, de
sçauoir, & cognoistre ce que c'est que ce
bien souuerain! Infiniment, dis-ie, pour
ce que par mesme moyen ie cognoistrois
Dieu, qui est le souuerain bien. Ic le vous
feray cognoistre, dict-elle, & avec tres-
bonnes & assurées raisons, pourueu que
vous ayez souuenance de ce que nous a-
uons vn peu auparauât conclud. & arre-
sté. Ic me souuiendray, dis-ie. Ne vous
ay ie pas fait entendre que les choses que
plusieurs desirant, & recherchèt, ne sont

pas pourtant le souverain bien : pource qu'elles sont différentes, & discordantes l'une d'avec l'autre? Et pource qu'à l'une d'icelles defaillant l'autre, il est impossible qu'elles puissent apporter vn bien parfait & accompli: & que lors qu'elles sont vnies ensemble, & composées comme en vne forme & mesme effect, de sorte que la suffisance soit vne mesme chose que la puissance : la reuerence, la noblesse, & la volupté, produire, & en resulter le souverain bien? Et si toutes aussi ne sont vne mesme chose, qu'en quelque sorte que ce soit elles ne peuvent, ny ne doyent estre desirées. J'ay bien entendu cela, dis-je, & n'en peut-on douter. Si donc, dict-elle, ces choses quand elles different l'une de l'autre, ne peuvent se nommer biens : Mais soudain qu'elles commencent à s'unir, & estre vne mesme chose sont biens : n'adient-il pas donc qu'elles sont mises & reputées entre les biens quand elles sont reduites en vn? Il le semble ainsi dis-je. M'accorderez vous dict-elle, que tout ce qui est bien soit bien par participation du bien, ou non? Il le vous accorde, dis-je. Il faut donc, dict-

dict-elle, que par mesme moyē vous m'accordiez que l'vnité, & le bien, sont vne mesme chose. Pource que la substance des choses, dont l'effect n'est point naturellement different, est vne & de mesme. Je ne le puis nier, dis-je. Sçavez vous, dict-elle, que tout ce qui est, & a estre, demeure en son estre, & dure tāt q̄ la chose est vne: & soudain aussi qu'elle n'est plus vne, elle n'est aussi plus en estre, & en mourant se refoud? Cōment, cela dis-je? Cōme aux animaux, dict-elle, quand l'ame & le corps sont vnīs & ioincts en vn, cependant que ils demeurent ensemble, cela s'appelle Animal: mais quand ceste vnité se desioint, par la separation l'un de l'autre, il meurt, & n'est plus Animal. Le corps mesme cependant qu'il se conserue en vne mesme forme seule, par le moyen de la conionction des membres, on y void vne forme humaine. Mais si les parties desunies & separées l'une de l'autre, gastent l'vnité, ce n'est plus ce que c'estoit. Et en ceste mesme sorte, qui voudra discourir toutes choses vne pour vne, il est tout certain qu'elles auront estre, tant qu'elles seront vne. Mais si elles aban-

H

donnent l'vnité, elles meurent aussi tost & se desfont. Quand ie considere beaucoup de choses, il ne m'est pas aduis autrement, dis-ie. Y a-il quelque chose, dict-elle, ayant operation naturelle, qui ne vueille plus estre, desire de mourir, & de se corrompre? Si ie considere les animaux, dis-ie, qui ont selon nature pouuoir de vouloir, ou de ne vouloir pas, ie n'en sçache aucun, s'il n'est contraint extraordinairement, qui ait enuie de se despouiller de son estre, & qui vueille de sa bonne volonté, se precipiter à la mort. Car tout Animal se trauaille pour son salut, & fuyt tant qu'il peut les occasions de sa ruyne, & de son dommage. Mais ie ne sçay que ie doy dire des plantes, & de toutes les autres choses inanimées. Il n'y a (ce me semble) rien, dict-elle, dequoy vous deuiez douter. Car nous voyons les herbes & les arbres prendre naissance tout premierement aux lieux qui leur sont plus conuenables, & plus propres à leur nature, & là ne se seichent, ny ne meurent pas aisément. Les vnes naissent és plaines & cāpagnes, les autres aux montagnes: les lacs en produisent aucunes,

les autres viennent dans les pierres, & y sont attachées. Quelques vnes sont fertiles, qui toutesfois sont produites des arenes steriles, & infructueuses : & si on se vouloit efforcer de les transporter & planter ailleurs, elles se seicheroient tout soudain. Mais la nature donne à chacune chose ce qui luy est conuenable, & se traueille de les conseruer, tant qu'elles peuuent durer. Que diray-ie, que toutes ayans comme la bouche en terre, attirēt la nourriture avec leurs racines, & puis la distribuent, & espendēt par les moëllles, par la force du bois, & puis en l'escorce : ce qui est plus noble, comme la moëlle & le plus tendre, est reserré au dedans, & mis au lieu le plus auant, & entourné d'une certaine fermeté de bois pour sa deffence, & au dehors l'escorce, comme celle qui peut plus facilement endurer les iniures du ciel, & pour seruir de deffence au demeurant ? Mais considerez quelle est la diligence de la nature, à faire que toutes naissent de la semence qu'elles mesmes produisent en abondance. Et qui est celuy qui ne sçait que telles choses ne sont pas instru-

CONSOLAT. DE PHILOS.

ments, pour seulement conseruer vn certain temps leur estre, mais pour le perpetuer par successiues generations: & les choses que l'on croid estre sans ame, ne desirent-elles pas pour ceste mesme raison chacune ce qui luy est propre? Que veut dire que la legereté fait monter les flammes en haut, & le poix contrainct la terre de descendre bas, si ce n'est qu'à chacune de ces choses tels lieux, & tels mouuements leur conuiennent? D'auantage ce qui est propre & conuenable à chacune chose, l'entretient & conserue, cōme ce qui luy est ennemy, & cōtraire, le corrompt & dissoult. Et les choses dures, cōme sont les pierres, sont fermement attachées à leurs parties, tant qu'il n'est pas aisé de les en separer: & les choses liquides, comme l'air, & l'eau, se laissent facilement separer, mais soudain elles se reioignent, & rassemblent aux parties, desquelles elles ont esté diuisées, & séparées: le feu est seul qui ne peut estre diuisé. Mais afin que nous ne parlions point à cest' heure des mouuemens volontaires de l'ame, qui a cognoissance, traittons de l'intention naturelle: comme nous di-

gerons les viandes, sans que nous nous en apperceuions, & respirons en dormant sans le sçavoir. Car l'enuie de se conseruer aux bestes, ne procede pas des mouuements de l'ame: mais cela leur viét des principes de nature. Et la volonté contrainte pour aucune occasion, desire & eslit souuentefois la mort, que la nature fuit, & chasse loing tant qu'elle peut: & au contraire l'action d'engendrer, par le moyen de laquelle se continuét longuement les choses mortelles, & que la nature desire, contraint aussi quelquefois la volonté: tant est grád l'amour qu'ont les choses à elles mesmes, qui ne procede pas des mouuemens de l'ame, mais d'un instinct de la seule nature. car la prouidence diuine a donné principalement aux choses d'elle créées, ceste cause merueilleuse de durer, & de demeurer en leur estre naturellement, tât qu'elles peuuent. & pourtant vous ne pouuez en façon du monde douter, que toutes lès choses qui sont n'ayent vn desir, & appetit naturel de se conseruer en leur estre, & de fuir & eiter ce qui les destruit & consomme. Je le confesse, dis-je, & cognois estre

CONSOLAT. DE PHILOS.

sans doute , ce que ie tenois n'aguères pour peu assésuré. Or, dict-elle, ce qui desire se conseruer, & demeurer en son estre, desire aussi d'estre vn. car sans cela il viendra à rien, & ne sera plus en estre. Il est vray, dis-ie. Donc toutes choses, dict-elle, desirent l'vnité. Ie le confesse, dis-ie. Or auons nous iusques icy faict paroistre , que l'vnité est cela mesme que le bien. Il est ainsi, dis-ie. Donc toutes choses desirent le bien , que l'on peut ainsi definir, le souuerain bien estre , ce qui est désiré de tous. On ne peut imaginer chose plus vraye. car ou tout ce qui est , ne se refere à rien, & priué de chef, erre & flotte à l'auenture, sans estre gouuerné: ou s'il y a quelque chose à quoy tout tende & se refere , ce sera le souuerain bien de tous. Ie me resiouys, mon nourrisson, dict-elle, que vous ayez de vostre entendement donné droict au milieu du point de la verité. ce qui m'a esté manifeste, par cela que peu auparauât vous disiez ignorer. Et quoy, dis-ie? Quelle estoit la fin de toutes choses, dict-elle, qui est véritablement ce que tous desirét, & à quoy ils tendent: & pource que nous auons conclud

que c'est le souverain bien, il est necessaire que confessions iceluy estre la fin de toutes choses.

P O E M E X I.

Celuy qui veut sçavoir que c'est que verité,
 Et sans se desuoier qui la suit à la trace,
 Il doit de son esprit avoir l'œil arresté,
 Et veoir le mouvement qui l'action compasse
 De son ame immortelle, afin de l'enseigner,
 Que dans soymesme il peut trouver toute richesse,
 Et doit tout autre bien hors de soy estranger:
 Lors il descouvrira ce que la nue espaisse
 De l'erreur incertain luy receloit aux yeux,
 Plus clair que le soleil ne flambe dans les cieux.
 Le corps qui dans sa masse a l'esprit enfermé,
 Serré d'obscurité n'a esteint la lumiere
 De ce feu dont l'usage est par art consermé:
 Mais reluire on en void la semence premiere.
 Si ce feu naturel en l'homme ne vivoit,
 Qui feroit que celuy qui est nud de doctrine,
 Respond quand on l'enquiert, à propos, s'il n'avoit
 Quelque estincelle au cœur de la flamme divine?
 Si (ce que dit Platon) il faut pour vray tenir,
 Ce que nous apprenõs n'est rien qu'un souvenir.

H iij

SOMMAIRE DE LA

XII. PROSE.

Voicy le second poinct que Boëce iadis troublé d'esprit ne pouuoit bonnement comprendre, sçauoir est que Dieu par sa bonté conduit & gouerne tout le monde, sans besoing d'aide estrangere, & ce avec beaucoup de douceur, attendu que toutes choses luy obeissent volontairement. Secondement, par sa puissance, veu que rien ne luy peut faire contrequerre ni resistance, comme à celuy qui peut souverainement toutes choses, excepté peché, qui ne peut cheoir en luy: d'autant que le mal est priuation & default de bien, & acte d'impuissance, non de puissance, & n'est d'aucune nature. Toutes lesquelles choses la Philosophie prouue par raisons & paroles de la diuine substance, qu'il faut prendre selon l'interieur de ladiçte substance, non selon l'exterieur, comme ainsi que Dieu conduisant & disposant le monde ne s'emmele point avec aucunes causes exterieures.

PROSE XIII.

IE suis bien (dit-je) de l'advis de Platon, & ceste-cy est la seconde fois que vous me faites ressouvenir des choses que vous venez de dire. Je l'oubliai la premiere fois, quand ie vestis ce mortel habille-ment: & la seconde quand ie fuz accablé de si grande douleur, que ie perdis toute souvenance. Et alors, Si vous prenez bié garde (dit-elle) à toutes les choses cy-deuant confessées, vous n'estes pas beaucoup esloigné de la memoire de ce que vous disiez n'agueres ne sçauoir point. Et quoy, dis-ie? Avec quels tymons, dict-elle, & gouvèrnails se gouvèrne & regit le monde? Je sçay bien, dis-ie, que i'ay confessé mon ignorance, & encore que ie voye ce que vous voulez dire, ie desire neantmoins de l'entendre plus parfaitement. Vous pensiez n'agueres, dict-elle, qu'il n'y eust aucun doute que le monde ne fust regy & gouvèrné de Dieu. Encore le pensay-ie, dis-ie, & ne croy pas que l'on en puisse douter, & les raisons qui me conduisent à ceste creance, ie les vous raconteray fort legerement. Ce mode estant composé de tât de diuerses parties, & si contraires, ne se seroit iamais reduit,

H v

ny cōueni en vne forme, s'il n'y auoit vn qui eust vni & ioinct ensemble tāt de diuerses & differentes choses: lesquelles estans ioinctes & vnies, la nature de tant de choses contraires & discordantes l'vne de l'autre les separeroit & arracheroit d'ensemble, si elles n'estoient contenues & conseruées par vn qui les a vnies & attachées ensemble. & ne faut pas penser que l'ordre de la nature procedast si certainement, ny qu'il peust faire & accomplir ses mouuements si bien disposez & ordonnez de lieux, de temps, d'effets, d'espaces & de qualitez, si vn ferme & immobile ne dispoist & ordonnoit ceste difference & varieté de mouuemens. & cestuy-là qui qu'il soit par le moyen duquel toutes choses créées demeurent fermes en leur estre, & se mouuent, ie le nomme Dieu, nom commun & vsité entre tous. Puis, dict-elle, que vous entendez en ceste maniere ces choses, ie n'auray pas beaucoup d'affaires, iouyssant de la felicité, vo^r faire reuoir sain & sauf vostre pays. Mais retournons à nostre propos, & considerons les choses, que nous auons proposées. N'auōs nous pas mis &

nōbré en la beatitude la suffisance? Ouy
 vrayement, dis-ic. Dieu, dict-elle, n'aura
 dōc besoin d'aide estrāgere, pour gouver
 ner & regir le mōde car s'il en auoit besoin
 il n'auroit point en luy la pleine & entie
 re suffisance. Il faut necessairement qu'il
 soit ainsi, dis-ic. Donc il dispose toutes
 choses par luy mesme seul. On ne le sçau
 roit nier, dis-ic. Nous auons fait voir, dit
 elle, par ce que nous auons cy deuāt dir,
 que Dieu est le fouuerain bien. Il m'en
 fouuiet, dis-ic. Il ordonne donc, dict
 elle, & dispose toutes choses pour le biē,
 puis qu'il les gouuerne par luy-mesmes,
 que nous auons dict estre le bien, & est
 comme vn certain tymon & gouuernail
 qui maintient & conserue la fabrique
 du monde entiere & incorruptible. Ce
 la est bien vray, dis-ic, & me suis biē dou
 té que vous en vouliez venir là. Je le
 croy, dict-elle. car i'ay bien cogneu à vos
 gestes & façons de faire que vous estiez
 pour bien cognoistre & cōprendre
 les choses vrayes: mais ce que ie veux
 encore dire, n'est moins aisé à veoir & à
 entendre. Et quoy, dis ie? Puis, dict-elle,
 que l'on croit, & à bon droict, que Dieu

H vj

CONSOLAT. DE PHILOS.

gouverne toutes choses, & les regit par sa bonté, & que toutes ces mesmes choses, comme nous auôs monsté, courent & tendent à bien. Peut-on douter qu'elles soient regies & gouvernées volontairement, & si elles se meuuent & agissent au desir & au plaisir de celuy qui les dispose, comme obeissantes & suiuetes à leur recteur & gouverneur? Il est nécessaire, dis-ie, autrement il ne sembleroit pas que tel gouvernement fust heureux, si c'estoit comme yn ioug que l'on desdaignast, & non pas le salut des choses qui y obeissent. Il n'y a donc, dict-elle, aucune chose qui gardant sa nature, s'efforce de contrarier à Dieu. Aucune, dis-ie. Et si quelqu'une s'y efforçoit, dict-elle, croyez vous qu'elle peust auancer & profiter quelque chose contre celuy que nous auons dict estre tres puissant, pour raison de sa beatitude? Non, dis-ie. Il n'y a donc rien, dict-elle, qui vueille ou puisse resister à ce souverain bien. Je le pense ainsi, dis-ie. C'est donc, dict-elle, le souverain bien qui gouverne tout par sa puissance, & qui dispose doucement tout par ordre. Que me plaisent, dis-ie, toutes

ces belles raisons que vous avez alleguées pour cōclurre ce que vous venez de dire ! Mais les paroles mesmes dont vous vſez me plaisent encore d'auantage, & me semble que la folie deuroit auoir honte d'elle mesme, de confondre & ruiner telles choses & si grâdes. Vous avez bien entendu, dict-elle, la fable des Geans qui vouloient escheller les cieux : mais ils furent traittez comme ils meritoient par la benigne puissance de Dieu. Voulez vous que nous voyons ensemble toutes ces raisons, & les confrontions l'une avecques l'autre ? A l'adventure en resultera-il quelque belle estincelle de verité. Comme il vous plaira, dis-je. Personne ne peut douter que Dieu ne soit tout-puissant, dict-elle. Nô pas, dis-je, s'il est sain d'entendement. Qui est tout-puissant, dict-elle, il n'y a rien qu'il ne puisse. Non, dis-je. Dieu donc, dict-elle, peut faire le mal. Non jamais, dis-je. Le mal donc n'est rien, dict-elle, puis que celuy qui peut tout ne peut faire mal. Vous mocquez vous, dis-je, me dressant avec voz raisons vn labyrinthe, duquel nous ne sortirons

CONSOLAT. DE PHILOS.

pas aisément? Mais sortez d'où vous estes entré, vous faictes vrayement vne merueilleuse circonuolution de raisons pour la diuine simplicité. Car vous disiez n'agueres commençât à la beatitude, que c'estoit le souuerain bien, & que ceste beatitude estoit située en Dieu: & disputiez ce mesme Dieu estre le souuerain bien, & la pleine & entiere beatitude, & qu'aucun ne pouuoit estre heureux s'il n'estoit aussi Dieu: & puis comme pour vn aduantage & surcroist, en reprenant dès le cōmencement, vous disiez la forme du bien estre la propre substance de Dieu; & outre cela seul estre le souuerain bien que tous desirent naturellemēt. Vous affermiez aussi que Dieu gouernoit l'vniuers avec le tyron de sa bonté, & que toutes choses luy obeissoient de leur propre vouloir, & que le mal n'estoit rien, ny n'estoit d'aucune nature; & auez prouué toutes ces choses, non avec raisons esloignées ny estrangeres: mais avec preuues fort familiares & communes, l'vne faisant foy & demonstration de l'autre. Par là voyez vous que nous ne nous moc-

quons pas, dict-elle, & auons graces à Dieu, que nous auons cy-deuant inuqué, acheué vne grande partie du tout. Pource que la forme de la substance diuine est telle qu'elle ne se communique ny ne reçoit en elle aucune chose d'estrange. Mais comme dit d'elle Parmenide, elle amene toutes choses à leur tour, c'est à dire, qu'elle fait tourner & mouuoir toutes choses contenuës en ce Globe, & elle seule se conserue immobile. Que si nous n'auons vsé de raisons tirées d'ailleurs: mais de celles contenuës au circuit de la matiere que nous traittons, vous ne vous en deuez estonner, ayant appris que les paroles, comme disoit Platon, doivent estre conuenables aux choses que l'on traite.

POEME XII.

H *Eureux qui le clair ruisseau
De la bonté souueraine
Peult voir, & qui le fardeau
De toute affaire mondaine,
De soy reiettant bien loing,
A d'une sainte pensée
Aux cieux la teste haultée*

CONSOLAT. DE PHILOS.

Franç de tout terrestre soing!

*Quand Orphée après la mort
D'Eurydice erroit par Thrace,
Et d'un gracieux accord
Tiroit les bois de leur place,
Oreillez après ses sonz,
Et des eaux le cours liquide
Comme d'une forte bride
Arrestoit à ses chansons:*

*Le cerf tremblant de frayeur
Lors costoyoit au boscage
Le lyon sans avoir peur:
Car il despoilloit sa rage,
Charmé de la douce voix,
Et le lieure au pied viste
Ne se mettoit point en fuytte,
Oyant des chiens les abbois.*

*Mais il ne pult de son chant
Qui avoit sur tout puissance,
Du feu son cœur desseichant
Esteindre la violence:
Et se complaignant des cieux,
Qu'à son secours il n'attire,
Il descend pour charmer l'ire,
Aux enfers des autres dieux:
Et là sa harpe il a pris,
Et chantant d'une voix douce,*

Les Vers qu'il auoit appris,
Il accorde de son poulce.
Car sa mere le mena
Sur le mont à double crouppe,
Et là de la sainte troupe
L'eau à boire luy donna.

Et puis il y adiouste or,
Tout ce qu'amour luy enseigne,
Tout ce à quoy l'incite encor
La douleur qui l'accompagne,
Pour faire plus de pitié,
Aux dieux des ombres affreuxes,
Auec ses chansons piteuxes,
Leur demandant sa moitié.

Du chant le Portier rauy
Tient ses trois gueulles beantes:
Les Furies à l'enuy,
Sont de pitié larmoyantes.
Soudain perdift Ixion
De sa rouë la memoire:
Et n'eust plus soucy de boire
Tantale oyant sa chanson.

Et le Vaultour affamé,
Donn'a tout loisir de croistre
Au cœur souuent entamé,
Desdaignant de s'en repaistre.
Pluton pitoyable alors

CONSOLAT. DE PHILOS.

Dict, ie suis vaincu en somme,
Rendons la femme à cest homme
Que son chant tire dehors:

A condition pourtant
Qu'il ne regarde derriere
Pour voir sa femme sortant.
O loy trop rude & seuer,
Qui vient aux Amans donner
Loy, & contraindre s'efforce
L'amour ! il a plus de force
Que ce qu'on peut ordonner.

Estant encor sur le seuil,
Orphe , Eurydice a veüe
Et iettant sur elle l'œil,
Soudain la pert & la tuë.
A vous de qui insqu'aux cieux
Le desir à mont se dresse,
Ceste fiction s'adresse
Pour vous enhorter à mieux.

Car celuy qui surmonté
Des voluptez & blandices,
Et qui tient l'œil arresté
Sur les mondaines delices,
Le bien qu'il reçoit des cieux,
Il void se perdre en peu d'heure:
Rien de bon ne luy demeure,
S'il s'amuse en ces bas lieux.



LA CONSOLATION

DE PHILOSOPHIE,
PAR SEVERIN BOECE.

LIVRE QUATRIÈME.

SOMMAIRE DE LA
I. PROSE.

Desormais la Philosophie discourt des causes pour lesquelles Dieu souffre qu'en son gouvernement del'Vniuers il y ait du mal , & quelquefois impuni. Or parce que les meschants ne se gouvernent point par le iugement d'une droite raison , mais se laissent emporter aux passions de courroux, de conuoitise , & autres : il leur est aisé de se detracquer de la voye de salut. Et d'autant que les gents de bien parviennent au but que toutes creatures se proposent , à sçauoir au souverain bien : c'est pourquoy leur vertu ne demeure point sans recompense. mais les meschants, qui iamais ne donnent dans ce blanc , ne sont iamais exempts de malheurs; lesquels souuent tolerez en ce monde, attendent d'autant plus griesue vengeance au siecle à venir.

PROSE I.



Vand Philosophie eust mis fin à la chāson douce & harmonieuse qu'elle auoit pronōcée d'vne grace asseurée, & en paroles fort sententieuses : ie ne pouuois encor du tout oublier l'ennuy, & la fascherie que i'auois au dedans. qui fut cause que ie la destournay de la volonté qu'elle auoit de dire encore quelque chose. Et luy diz , O guide & chemin de la vraye lumiere! ce que vous auez iusques à ceste heure dict , & les propos que vous auez tenuz , ne sont moins diuins pour le grand bien que l'on en peut tirer, en les bien considérant, qu'ils sont certains , & asseurez pour les belles raisons que vous auez alleguées. Vous m'avez discouru de beaucoup de choses , qu'encor que la douleur me les eust faict oublier , si n'en estois- ie pas du tout ignorāt. Mais ce qui me tourmente d'auantage , & m'est occasion de plus grand trouble, est que ie ne puis comprendre , qu'e-

stant celuy là tresbon qui regit & gouverne toutes choses, comme il est possible qu'il y ait du mal; ou s'il y en a, pourquoy il demeure impuny. Considererez, ie vous prie, si on ne doit point trouver cela estrange. car ce mal en attire vn autre encor plus grand: pource que si la malice est en regne, & qu'elle soit en credit, la vertu n'est pas seulement frustrée de sa recompense, mais outre cela, elle est reiettée, & mise aux pieds, & parit bien souuent pour la malice, & pour la meschanceté d'autrui. On ne peut trouver trop estrange, que cela se face au Royaume de celuy qui sçait tout, qui a toute puissance, & qui ne peut vouloir ny permettre que les choses bonnes: & me semble que c'est assez dequoy se plaindre & se tourmenter. Mais, ce me dict elle, on se deuroit bien estonner d'auantage, & seroit chose plus horrible à voir que tout autre monstre, si en vne maison bien ordonnée, & d'un tel pere de famille, les ords & sales vaisseaux estoient prizez & estimez, & les precieux souillez & gastez, comme vous croyez: mais il

CONSOLAT. DE PHILOS.

en va tout autrement. Pource que si les choses que nous auons cy-deuant concluës & arrestées se maintiennent bien, vous cognoistrez que par le bon plaisir de celuy, du Royaume duquel nous parlons à ceste heure, les bons ne defaillent iamais de puissance, & les meschans sont tousiours mesprizez & reiettez: que le vice ne demeure iamais impuny; ny la vertu, sans guerdon: que choses heureuses succedent tousiours aux bons; & aux mauuais arriuent tousiours des malheurs & aduersitez, & beaucoup d'autres choses, lesquelles, quand vostre douleur sera vn peu appaisée, vous donneront vne grande assurance. & ayant veu, comme ie vous ay desia monstre, l'image de la vraye beatitude, & cogneu en quoy elle consiste, passant par dessus beaucoup de choses qui ne me semblent point necessaires de dire, ie vous monstreray le vray chemin pour retourner chez vous, & en vostre maison, & attacheray des ailes à vostre entendement, par le moyen desquelles il se pourra esleuer en haut: afin que fuyant toute perturbation d'es-

prit sain & sauf, guidé de moy, par mon
chemin, & sur mon chariot mesmemēt
porté, vous puissiez par mon moyen
retourner & voir vostre pays.

POEME I.

I Ay des aisles fort gentilles,
Si subtiles,
Qu'elles peuvent d'un plein saut
Monter iusqu'au ciel treshaut,
S'une fois l'esprit agille
S'en habille,
De la terre ne luy chant.
Car lors armé de sagesse,
Haut se dresse
Par sus le globe de l'air,
D'où il void sous luy rouller
Mainte & mainte noire nue,
Qui se mue
En eau froide au deualler,
Il surpasse ceste flame
Qui enflame,
Par un mouuement leger,
Le ciel, tant que sans songer
Son chemin tout droit s'addonne,
Et se borne
Où le Soleil vient loger.

CONSOLAT. DE PHILOS.

Et tant fait qu'il accompagne

En campagne,
Saturne, le froid vieillard,
Remirant de toute part
Du ciel la beauté entiere:

De maniere
Qu'il en est fait le souldart,
Et plus outre prend sa voye,
Tant qu'il voye

Encores le firmament.

Là contemple fermement
Mainte estoille y attachée,
Et fichée,

De la nuit riche ornement.

Après que toutes ces choses

Là encloses

Il a contemplé des yeux,
Laisant le dernier des cieux,
Du firmament le dox presse,

Et s'adresse

A vn siege glorieux:

Sur lequel des Rois le maistre,

Tient son Sceptre

Et la tride du grand tour,

D'où il iuge tout l'entour,

De son ceinture qu'il modere,

Et tempere

Par con-

Par continuel retour.

Si vne fois tu peux prendre

Sans mesprendre,

Ce chemin tant souhaitté,

Et dont tu t'estois osté:

Tu auras lors souuenance,

Ta naissance

De tel lieu auoir esté.

Et y voyant ta demeure

Bonne & seure,

Tournant ta venè icy bas:

Tu verras la terre hélas!

Que tu as ores laissée

Enlacée

De mille & mille brouillas:

Tu verras les Rois & Princes

Des Prouinces,

Et les tyrans reffroncez,

Dont les peuples oppressez

Redoubtent tant les audaces,

Et menaces,

De leur vray pays chassez.

SOMMAIRE DE LA II. PROSE.

Il faut noter qu'en la sixiesme Prose du I.
Liure la Philosophie recherchant la cause &
racine de la maladie de Boëce, a descouvert

I

CONSOLAT. DE PHILOS.

Et tant fait qu'il accompagne

En campagne,

Saturne, le froid vieillard,

Remirant de toute part

Du ciel la beauté entiere:

De maniere

Qu'il en est fait le souldart,

Et plus outre prend sa voye,

Tant qu'il voye

Encores le firmament.

Là contemple fermement

Mainte estoille y attachée,

Et fichée,

De la nuit riche ornement.

Après que toutes ces choses

Là encloses

Il a contemplé des yeux,

Laisant le dernier des cieux,

Du firmament le dox presse,

Et s'adresse

A un siege glorieux:

Sur lequel des Rois le maistre,

Tient son Sieptre

Et la tride du grand tour,

D'où il iuge tout l'entour,

De son œuvre qu'il modere,

Et tempere

Par con-

Par continuel retour.

Si vne fois tu peux prendre

Sans mesprendre,

Ce chemin tant souhaitté,

Et dont tu t'estois osté:

Tu auras lors souuenance,

Ta naissance

De tel lieu auoir esté.

Et y voyant ta demeure

Bonne & seure,

Tournant ta venè icy bas:

Tu verras la terre hélas!

Que tu as ores laissée

Enlacée

De mille & mille brouillas:

Tu verras les Rois & Princes

Des Prouinces,

Et les tyrans reffroncez,

Dont les peuples oppressez

Redoubtent tant les audaces,

Et menaces,

De leur vray pays chassez.

SOMMAIRE DE LA II. PROSE.

Il faut noter qu'en la sixiesme Prose du I.
Liure la Philosophie recherchant la cause &c.
racine de la maladie de Boëce, a descouuert

I

CONSOLAT. DE PHILOS.

que faute de conoistre quelle est la fin de toutes choses , il estimeoit les mauuais estre puissans en ce monde; & les bons impuissans. D'auantage, pource qu'il ignoroit par quelle maniere le monde estoit gouuerné, il cuidoit que les choses flotassent à l'auenture sans aucun gouuernail. Et d'autant qu'elle a desia montré quelle est la fin des choses , & comment le monde est conduit & disposé : maintenant elle veult luy donner vn parfaict remede , & detracquer de luy tous les ennuyx & fascheries qui l'ont accueilli pour les causes que dessus. Premièrement elle prouue que les bons ont la puissance de leur costé ; les meschans , l'impuissance. Car toutes les actions humaines consistent en volonté & puissance, desquels si l'un manque , nul effect ne reüssit. Or tant les bons que les mauuais ont mesme intention (quoy que par diuers estudes) d'attaindre à leur souuerain bien. mais les bõs l'obtiennent : les mauuais , non. Dont s'ensuit, que les premiers ont assez de pouuoir pour telle acquisition : les derniers, trop peu de force. En suite elle allegue plusieurs autres raisons qui toutes infirment la condition des meschans , & fortifie celle des bons.

PROSE II.

A Lors dis-ie, Dea vous promettez de grandes choses ! Ie ne doute

pas pourtant que vous n'y puissiez bien satisfaire: mais que tardez vous, n'arrestez point tant celuy que vous avez desia préparé à vous ouyr. Il faut que tout premierement vous sçachiez, dict-elle, que les bons n'ont iamais faute de puissance: & au contraire les meschans sont du tout priuez de pouuoir. Ce qui est aisé de prouuer, l'un par l'autre: Pource qu'estans le bien & le mal contraires: s'il est manifeste que le bien puisse quelque chose, il faut que le mal soit debile, & sans pouuoir. & si la foiblesse du mal est cogneue, la force, & la fermeté du bien sera claire & manifeste. Mais afin que vous adioustiez plus de foy à ce que ie vous diray, i'y procederay diuersement, & tantost en vne sorte, & puis en vne autre, afin de vous mieux asseurer mon propos. Il y a deux choses, par le moyen desquelles toutes les actions, & operations humaines s'accomplissent, la volonté, & la puissance: desquelles si l'une deffault, l'on ne peut rié faire. Car deffailant la volonté, il n'y a aucun qui entreprenne de faire quelque chose contre son vouloir: & quand la puissance n'y

CONSOLAT. DE PHILOS.

est pas, on a pour neant la volonté. D'où vient que si vous voyez quelqu'un qui ait volonté d'aucune chose, à laquelle toutesfois il ne puisse paruenir: vous ne pouuez doubter qu'à cestui là, la puissance ne luy ait failly, pour obtenir ce qu'il vouloit. Cela est bien vray, dis-ie, & n'en peut on doubter. Cestuy là dict elle, que vous verrez auoir accompli ce qu'il vouloit, croirez vous qu'il ait eu faute de pouuoir pour l'executer? Non, dis-ie: Si donc quelqu'un a pouuoir en quelque chose, dict elle, vous direz que l'exécution de ceste chose là sera en sa puissance: & si le pouuoir luy deffaut, aussi vo⁹ le jugerez trop foible pour l'executer. Je le confesse, dis-ie. Vous souuenez vous, dict-elle, que nous auons cy-deuant prouué par les raisons que nous auons alleguées, que toute l'intention de l'humaine volonté, bien qu'elle soit menée & poulcée de diuers estudes, tend tousiours neantmoins à la beatitude? Il me souuient bien, dis-ie, que cela a esté prouué. Ne vo⁹ souuenez vous pas aussi, dict-elle, que nous auons dict la beatitude estre le mesme bien: & en la

forte que la beatitude est cherchée d'un chacun, le bien estre de ceux là mesmes desiré? le ne sçauois, dis-ic, dire que ie me resouuienne de cela, car ie ne l'auois point oublié. Doncques toutes personnes, dict-elle, tant les gens de bien, comme les meschans, d'un accord & d'une mesme intention s'efforcent d'attaindre & de paruenir au bien. C'est necessairement conclud, dis-ic. Mais il est tout certain, dict-elle, que par le bien on est fait bon. Cela est bien certain, dis-ic. Il s'en suit donc, dict-elle, que les bons obtiennent & acquierent ce qu'ils vouloient auoir. Il est ainsi, dis-ic. Et si les meschans, dict-elle, pouuoient obtenir le bien qu'ils desirent, ils ne pourroient plus estre meschans. Si donc & l'un, & l'autre desirent le bien, & que les bons y paruiennent, les autres non: ne direz vous pas que les vns ont eu assez de pouuoir, pour l'obtenir, & les autres trop foibles, pour y attaindre? Quiconque doubteroit de cela, dis-ic, il ne pourroit ny considerer la nature des choses, ny iuger les consequences des raisons. Et encore, dict-elle, s'il s'en trouuoit deux



CONSOL. DE PHILOS.

qui eussent selon nature vne mesme deliberation , & que l'un de ceux là la peust faire & accomplir par le benefice de nature , & qu'il fust impossible à l'autre la pouuoir naturellement executer : mais par vn autre moyen que par l'aide de nature , il n'acheue pas du tout sa deliberation , ains imite seulement , & ensuit l'autre qui l'accomplit : lequel iugerez vous de ces deux là auoir plus de puissance , & estre plus habile ? Encore que j'entende à peu près ce que vous voulez dire , dis-je , si voudrois-je bien vous prier de le me declarer mieux. Mais nierez vous , dict-elle , que le mouuement du marcher soit naturellement aux hommes ? Non , dis-je. Vous ne doubterez non plus , dict-elle , que tel ne soit selon nature l'office des pieds. Je n'en doubteray iamais , dis-je. Si donc quelqu'un , dict-elle , peut aller , & cheminer avec les pieds , & quelque autre à qui les pieds ne peuvent faire cest office naturel , s'appuyant sur les mains s'efforce de cheminer : lequel des deux avec raison pourra l'on estimer le plus habi-

le? Pourſuiuez ce que vous auez enuie de dire, diſ-ſe. Car il n'y a perſonne qui ſoit en doute, que celuy qui peut mieux faire les offices de nature, ne ſoit plus puiſſant, & plus habile que tel qui ne les peut pas faire. Le ſouuerain bien, diſt-elle, eſt vraiment egalement propoſé aux bons, & aux mauuais, & eſt deſiré des bons par vn office & deuoir qui eſt propre & naturel à la vertu, & les meſchans ſe trauaillent de l'acquérir par diuerſes conuoitiſes & deſirs, du tout differens de la nature, pour acquérir le bien. Le croyez vous autrement? Non vraiment, diſ-ſe. Car il eſt auſſi manifeſte ce qui ſ'en enſuyt, ayant des-ja confeſſé que les bons ont puiſſance, il eſt neceſſaire que les meſchans ſoient foibles & imbecilles. Vous l'entendez fort bien, diſt-elle, & cela eſt ſigne que la nature eſt aucunement ſoulagée, & commence à reſiſter au mal. Les mēdecins ont accouſtumé d'eſperer ainſi de leurs malades. Et pour ce que ie vous voy bien deliberé & fort facile à cōprendre, ie vous veux faire icy vn amas de beaucoup de raiſons. Vous

I iiij

CONSOLAT. DE PHILOS.

iugez bien à ceste heure, combien est grande l'infirmité des hommes vicieux, qui ne peuuent paruenir ny atteindre où ils sont conduits & poussez naturellement. Mais que seroit-ce, à vostre aduis, s'ils estoient du tout abandonnez de ce secours de nature, qui est si grand, & presque inuincible, qui doit tousiours aller deuant, seruir de guide, & monstrier le chemin? Consideriez ie vous prie combien est grande l'impuissance de ces hommes vicieux. Car ils ne demandent pas vn petit guerdon, ny vne legere recompense, à laquelle toutes-fois ils ne peuuent atteindre, pour ce qu'ils se perdent, & se trompent au comble & sommaire de toutes choses, ny ne peult à ces pauvres malheureux reüssir aucune chose, de ce pourquoy ils trauaillét tant, & iour & nuict, en quoy la force & la puissance des bons paroist beaucoup. Car, si comme quelqu'vn en cheminant avec les pieds estoit arriué iusqu'au lieu, oultre lequel on ne pourroit passer, ny marcher d'auantage, cestui là seroit réputé fort puissant au marcher : ainsi celuy qui atteint

au but de toutes choses desirables, & outre lesquelles il n'y a plus rien que lon puisse desirer, il est force que cestuy là soit iugé trespuissant : & au contraire les meschans sont foibles & priuez de toutes forces. Car puis qu'abandonnans la vertu ils s'addonnent au vice, n'est-ce pas signe qu'ils sont ignorans quel est le bien ? & quelle chose est plus debile & imbecille que l'aveuglée ignorance ? Ils ont à l'auenture cognoissance du bien qu'ils deuroient suyure : mais transportez de conuoitise se laissent precipiter & trebuscher au mal. Mais leur intemperance par ce moyen les fait paroistre fragiles, ne pouuans resister au mal, ou peut-estre ils cognoissent, & sçauent quel est le bien, & le fuyent pour s'attaquer au vice. Mais en ceste sorte ils ne sont pas seulement impuissans. car outre cela ils laissent d'estre, pource que ceux là qui delaisent & abandonnent leur fin, delaisent aussi d'estre. Ce que quelqu'un pourra trouuer estrange, que nous disons que les meschans, du nombre desquels sont la plus-part des hommes, ne

soient plus : toutesfois il est ainsi. Je
 ne puis pas nier que les meschans ne
 soyent meschans : mais qu'ils soyent
 simplement, ie ne le puis pas confesser
 aussi. Tout ainsi qu'un corps mort, on
 peut dire que c'est un homme, mais ce
 n'est pas un homme simplement : Ainsi
 confessay-je que les hommes vicieux
 sont meschans : mais non pas qu'ils soient
 absolument. Pource que cestuy là veri-
 tablement est, qui se maintient & con-
 ferue en l'ordre de nature, & s'il quitte
 & abandonne cest ordre là, il abandon-
 ne aussi d'estre. Pource que l'estre est
 en la nature, de laquelle il se separe.
 Vous me direz, que les meschans peu-
 vent quelque chose. Je ne vous le nie-
 ray pas : Mais tel pouuoir ne procede
 pas de force ; ouy bien de foiblesse, &
 d'imbecillité. Ils peuuent bié faire le mal,
 lequel ils ne pourroient certainement
 faire, s'ils eussent peu demeurer, & s'ar-
 rester à faire bien. Et ceste possibili-
 té demonstre clairement qu'ils n'ont au-
 cun pouuoir. Pource que si le mal n'est
 rien, comme nous auons cy. deuant con-
 clud, ne pouuans les meschans que le

mal, c'est chose toute claire qu'ils ne peuvent rien. Cela est certain, dis-je. Mais à fin, dict-elle, que vous puissiez entendre quelle est la force de ceste puissance, nous auons cy deuant diffini, qu'il n'est rien si puissant que le souverain bien. Il est ainsi, dis-je, mais le souverain bien, dict-elle, ne peut faire mal. Non, dis-je. Il y aura donc quelqu'un, dict-elle, qui pourra penser, que les hommes peuvent faire toutes choses. Je ne le pense pas, dis-je, si ce n'est à l'adventure quelque fol. Mais les hommes, dict-elle, peuvent-ils faire les maux? Pleust à Dieu, dis-je, qu'il fust hors de leur puissance d'en faire. Il faut donc conclure, dict-elle, que cestuy là seul qui peut faire le bien, estant le bien trespuissant, peut toutes choses: & que ceux qui ne peuvent faire que les maux, ne peuvent pas toutes choses, puis que le mal n'est rien, & si est manifeste, qu'encore ils peuuent moins que les bons, & faut encore adiouster à ce que nous auons nagueres montré, que toute puissance se doit compter entre les choses desirables, & toutes les choses desirables se

CONSOLAT. DE PHILOS.

referer & rapporter au bien , comme au sommet & au but de sa propre nature : mais la puissance de pouuoir commettre vne meschanceté , ne se peut referer au bien , elle n'est donc pas desirable : & toutesfois toute puissance se doit desirer. Il est donc manifeste que la possibilité du mal , n'est pas puissance , & par là appert sans doute , que la puissance des bons est vraiment puissance , & la puissance des mauuais est vne foiblesse & vne infirmité. Et est bien vray ce que dit Platon , que les sages seuls peuuent accomplir ce qu'ils desirent , & les mauuais faire ce qui leur plaist : mais non pas iamais accomplir ce qu'ils desirent. Ils font donc toutes choses , qu'ad ils pensent par le moyé de ce qui leur plaist , paruenir à ce qu'ils desirent. Mais ils n'y peuuent iamais atteindre , pource que les mauuaises operations ne viennent iamais à la beatitude.

P O E M E . II.

M*ettant à part l'apparence ,
Et la pompeuse arrogance ,*

Dont les tyrans & Rois
 Sur leurs haults throsnes de gloire
 Ornez de pourpre & d'ivoire,
 Tant triomphans tu vois:

Que gens armez tousiours gardent
 Et qui de trauers regardent,
 Le cœur de rage plein,
 Tu verras de quelle chaisne
 L'appetit tient & enchaisne
 Leur esprit dans leur sein.

Tousiours vn soin les maistrise,
 Et d'ardente conuoitise,
 Sont leurs cœurs tourmentez,
 Tels venins d'eux se repaissent,
 Et proye aux desirs se laissent,
 Vaincus & surmontez.

La colere les moleste,
 Et vne ireuse tempeste
 Tient leurs cœurs affligez.
 Or' le malheur les crucie,
 Or' vn esprit les manie,
 Et les rend soulagez.

Si quelque grand qu'il puisse estre
 A tant de tyrans pour maistre,
 Ne se doit-il douloir,
 Rendant serue sa franchise
 Et son ame ayant soubs-mise

CONSOLAT. DE PHILOS.
A faire leur vouloir.

SOM. DE LA III. PROSE.

Voici la preuve de cette maxime precedente, Que les bons ne manquent iamais de recompense, ni les mauuais de supplice. Cette recompense accompagnant tousiours les louables & vertueuses operations des bons, c'est d'estre faits dieux. d'autant que le bien qu'ils recherchèt est la beatitude mesme: & que tous les bons, entant qu'ils sont tels, deuiennent heureux: & ceux qui sont heureux, sont faits dieux. Au contraire, le salaire des meschans est, qu'au moyen de leurs malices ne retenàs plus qu'une forme de corps humain, ils sont transformez en brutalitez diuerfes, selon les diuerfes passions qu'ils ont le plus curieusement affectées.

PROSE III.

VOyez vous à ceste heure en quelle fange & ordure se veautrent & fouillent les mauuaises operations, & de quelle clarté & lumiere la bonté reluit & est resplendissante? En quoy il est manifeste que les bons sont tousiours guerdonnez & recompensez, & aux

mauuais ne manquent iamais, ny les supplices, ny les peines: pource que des choses qui se font, cela pourquoy chacune se fait, peut sembler à bon droit en estre le guerdon & la récompense. A celuy qui court en lice, le Laurier pour lequel il court est mis pour guerdon. Mais nous auons faict veoir que la beatitude est le souverain bien, pour lequel on fait toutes choses: il s'ensuit donc que le souverain bien est le guerdon commun proposé à toutes les actions humaines, lequel ne se pourra iamais separer des bōs: pource que cestuy là ne se pourra avecq' raison appeller bon, qui sera esloigné du bien. Et pourtant les bonnes operations ne sont iamais abandonnées de leurs récompenses. Que les meschans donc s'opiniaient & facent mal tant qu'il leur plaira, iamais l'homme sage ne sera priué de guerdon, ny son Laurier iamais ne sechera. pource que la malice d'autrui ne peut oster à vne bonne ame ny la frustrer de son propre ornement. & si l'homme de bien prenoit occasion de sa gloire d'ailleurs q' de luy mesme, quelqu'un ou celuy mesme qui la luy auroit donnée, luy

pourroit oster. Mais pource que son propre ornement est sa bonté propre, quand il cessera d'estre bon, son guerdon luy defaudra. D'avantage si le prix est desiré pource qu'il est reputé bon, qui iugera cestuy-là qui a acquis le bien, ne participer au prix? Quel prix? dis-je. Cestuy-là, dict-elle, qui est le plus grand & le plus beau de tous les autres. Et souvenezvous de cest avantage que ie vous ay cy-deuât donné pour vn principal poinct, & le coneluez ainsi: Estant le souuerain bien, la beatitude, il est necessaire que tous les bons ayent la beatitude: & ceux qui ont la beatitude sont dieux: le prix & guerdon des bons est donc de deuenir dieux. Et iamais le temps ne peut effacer ce prix là, nulle puissance ne le peut diminuer, & la mauaistié mesme ne le peut obscurcir. Or estans ces choses telles, le sage ne peut douter de la peine, qui ne se separe iamais des meschans, & ne les abandonne point. Pour ce que le bien & le mal, le prix & la peine sont du tout contraires: & est necessaire que ce que nous voyons arriuer au pris du bien, responde au contraire à la peine du mal. Or puis que

la bonté est guerdon aux bons, la malice est le tourment des meschans : d'avantage quiconque souffre peine, sans doubte souffre mal aussi : & si cestuy-là se vouloit iuger luy mesme, pourroit-il croire qu'il fust exempt de peine ? Puis que la malice qui est le dernier de tous les maux, ne l'afflige pàs seulement, mais l'infecte du tout. Voyez ie vous prie par le contraire des bons, quelle peine est commise aux meschans. Vous avez n'aguères appris que tout ce qui est, est vn, & mesmemēt que ce qui est vn, est bon. Par ce moyen donc, ce qui est par necessité doit estre bon, & ce qui cesse d'estre bon, cesse aussi d'estre : les meschans donc cessent d'estre ce qu'ils estoient. Il est bien vray que la forme du corps humain qu'ils retiennent encore, monstre qu'ils ont esté hommes : mais s'estans conuertiz en malice, ils ont perdu aussi la nature humaine. & d'autant que la bonté fait sembler les hommes plus que hommes, il est necessaire que la mauuaistié rende moins que hommes, ceux qu'elle a priuez & retiettez de l'humaine condition. S'il aduient donc que vous voyez quelqu'un.

CONSOLAT. DE PHILOS.

qui soit transformé par les vices, vous ne le pourrez reputer homme: celuy qui par force oste les biens d'autrui, & brusle d'avarice, vous direz qu'il sera semblable à vn loup rauissant: l'autre qui est cruel, & n'est point arresté, ains querelle & dispute tousiours, vous le cōparerez à vn chié: vn autre qui se plaist à dresser des aguets, & d'enleuer le bien d'autrui, par fraude & tromperie, est comme le renard: On dit cestuy-là auoir cœur de Lyon, qui ne peut appaiser son ire, & boult de colere: & l'autre qui est paoureux & fuyard, & qui doute des choses que l'on ne doit craindre, est réputé semblable à vn Cerf: Cestuy-là fait la vie d'un asne qui est lér, paresseux & tardif: vn qui sera leger & inconstant, & change de vouloir & de condition d'heure à autre, on ne iugera point qu'il soit different des oyseaux: celuy qui se souille en l'orde & sale luxure, se plaist & delecte en pareille volupté que les pourceaux. D'où vient que ceux qui abandonnent la vertu, abandonnēt aussi d'estre hommes, & ne pouans receuoir la condition diuine, se transforment & changent en bestes.

POÈME III.

L Es legers vaisseaux
D'Ulysse le sage
Errans sur les eaux.
Après long voyage,
Par un grand orage
Ont esté poussez
Le long du rivage,
Rompus & froissez.
Celle qu'on disoit
Avoir pris naissance
Du Soleil, faisoit
Là sa demeure,
Qui eust la science
De si bien charmer,
Qu'elle avoit puissance
Les corps transformer.
Et point n'ignoroit
Des herbes l'usage,
Qu'elle pressuroit,
En certain bruage,
Changeant le visage
Des nouueaux venus,
En forme sauvage,
Estans incognus.

CONSOLAT. DE PHILOS.

L'un d'eux tout soudain
 D'un bouc prend la forme
 L'autre en Africain
 Lion se transforme:
 L'autre se difforme
 De la peau d'un loup:
 L'autre tygre enorme
 Devient tout à coup.
 Mais l'Arcadien
 Print pitié d'Ulysse,
 L'ostant du lien
 Et venin de Circe,
 Qui se coulle & glisse,
 Dans ces gens domptez,
 Par le malefice
 Des lus emhantez,
 En pourceaux changez,
 De gland se repaissent:
 Toujours enfansez,
 Ceres mescognoissent:
 Tant la forme laissent
 De leurs premiers corps,
 Que plus n'apparoissent
 Hommes au dehors.

Mais parmy le cœur
 Au dedans ancrée
 Est quelque vigueur

Encor' reserrée,
 Et est demeurée
 Franche du poison,
 L'ame remparée
 D'humaine raison.
 O que tel sçavoir
 A peu d'efficace,
 De qui le pouuoir
 Les corps seuls efface!
 L'esprit en sa place,
 Immué se plainct
 Du mal que luy brasse
 Le corps en ce poinct.
 Las les vices ont
 Bien plus de puissance,
 Qui au corps ne font
 Seulement offence:
 Mais telle nuisance
 Font de leur venin
 Qu'ils ostent l'usage
 De raison en fin!

S O M. D E L A I I I E.
 P R O S E.

CONSOLAT. DE PHILOS.

En cette Prose la Philosophie prouue trois poincts principalement. Le premier: Que les meschans sont plus miserables accomplissans leurs desirs, que s'ils n'en venoyent point à chef. Le second, Qu'ils sont aussi plus miserables demeurans impunis, que s'ils estoient punis, d'autant que par le chastiment, quelque bien leur reuient: par l'impunité, ils entassent mal sur mal. Le troisieme, Que ceux-la sont plus mal-heureux qui font iniure à autrui, que ceux qui la souffrent. dont elle tire cette consequence, Que l'iniure n'est pas de celuy auquel elle est faicte, mais bien de celuy qui l'inferre. En suite, après vne inuectiue contre les Orateurs & Aduocats, elle conclud, Que la haine ne trouue point de giste en l'ame du Sage qui a plustost compassion des meschans, qu'il ne les hait: attendu que le vice les afflige & tourmente assez en leur ame.

PROSE IIII.

IE confesse (dis-ie alors) & cognois biē, que ce n'est point hors de propos que l'on dit que les hommes vicieux retiennent la forme du corps humain, ils se muent & changent neantmoins en bestes quant à la qualité de l'ame: Mais ie ne voudrois point que leur mauuaise & trop fiere arrogance peust nuire ny por-

ter dommage aux bons. Il est bien ainsi comme vous le desirez, dict-elle, ainsi que ie vous feray voir en vn autre endroit mieux à propos: mais toutesfois si cela leur estoit du tout retranché, que vous croyez leur estre permis & licite, le supplice & la peine des meschans seroit bien allegée. Car il est necessaire, bien que quelques-vns le trouuent estrange, que les meschans soyent plus malheureux quand ils executent leurs mauuaises volontez, que quand ils ne les peuuent accomplir: pource que si vouloir les choses mauuaises est miserable, il est bien d'auantage de le pouuoir, pource que sans cela l'effect de la mauuaise volonté ne reüssiroit point. Et ayant chacune de ces choses son propre malheur, il faut que ceux qui veulēt & peuuent faire vne meschanceté, & l'executēt, soyent affligez de trois sortes de misere. Je suis bien d'auec vous, dis-ie: mais ie desirerois infiniment qu'ils fussent priuez de tel malheur, & que la puëssance de mal faire leur defaillist. Cela, dict-elle, leur defaudra à l'aduëture plustost que vous ne voudriez, ou qu'eux-

mesmes n'esperent pas: car en ce peu que nous auons à viure, l'esprit qui est immortel, ne peut iuger les choses estre longues à venir, quoy qu'elles soyent tardiuës: & bien souuent lors qu'ils attendēt mieux, & qu'ils croient qu'un grand amas de meschancetez les doit rendre cōtents en leurs desirs, ils sont ruinez & destruiçts d'une fin soudaine & non esperée, qui met vn but à leur misere, & termine leurs malheurs. Car si la meschanceté rend les hommes miserables, il faut conclure que tant plus le meschant vit, plus il est miserable: & quant à moy ie les reputerois tref-malheureux, si la mort ne mettoit fin à leur misere. Or si nous auons vrayement conclud des miseres & infortunes, que tant plus le mal dure long téps, & plus il est grand: il faut croire que la misere est infinie qui est eternelle. Alors, dis-ie, ce que vous dites est vn peu estrange & mal-aisé à aduoüer: mais ie cognois bien que par les choses que nous auons cy-deuant accordées, il faut qu'il soit ainsi. Vostre opinion est fort bōne, dict elle. mais celuy qui trouue vne conclusion mal-aisée à accorder,

der, il faut ou qu'il mōstre que l'une des propositions deuant dictē, soit fausse, ou qu'il prouue que la conionction des propositions n'a point assez d'efficace ny de force, pour assez necessairement conclure. Car les choses deuant dictes cōfessées & aduouées, il n'y a point d'occasiō d'impugner & debatre la conclusion qui en resulte: & ce que ie diray à ceste heure ne sembleroit moins estrange, & toutesfois il est necessaire qu'il soit ainsi, veu les choses que nous auons cy deuant dictes. Et quoy, dis-ie? Que les meschans, dict-elle, qui portēt la peine de leur malefice sont plus heureux, que ceux qui sont cōtraints d'aucune peine de iustice. Je ne veux pas dire comme quelqu'un pourroit penser, que les mauuaises mœurs & les coustumes dissoluës s'amendent & se corrigent, estans punies, & qu'elles se changent en biē pour l'apprehension du supplice, ny moins qu'elles seruent d'exemple aux autres de fuir les choses mauuaises, & que l'ō doit desestimer: mais i'estime les meschans qui sont punis, sans auoir esgard à aucune correction, ny respect à l'exēple, estre heureux en vne autre sorte. Et en

K

quelle autre sorte, dis-je, horsmis ces deux? N'auons nous pas accordé, dict-elle, que les bons sont heureux & les meschans miserables? Il est ainsi, dis-je. Si dōc à la misere de qui que ce soit on adioust quelque biē, n'est-il pas plus heureux que celuy la misere duquel est pure & simple, & sans qu'il y ait aucun bien entremeslé? Il le semble ainsi, dis-je. Et si à ce mesme miserable, dict-elle, qui ne participe à aucun bien, outre le mal pour lequel il est desia reputé miserable, il s'y en adioust vn autre, ne doit-il pas estre reputé plus malheureux que celuy, la misere duquel est allegée par la participation de quelque bien? Pourquoi non? dis-je. Les meschans, dict-elle, quand ils sont punis, participent à quelque bien. car la peine est chose bonne, eu esgard à la iustice: & ceux là mesmes quand ils manquent de chastiment, ils ont vn mal de plus, qui est l'impunité, laquelle nous auōs confessée estre mal, quand nous considerons le vice. Je ne le puis nier, dis-je. Les meschās, dict-elle, sont donc plus malheureux quand on leur remet iniustement la peine de leurs fautes, que quand iustement

ils sont punis: Et est assez manifeste qu'il est raisonnable, que les meschans soyent chastiez, & au contraire, inique qu'ils demeurent impunis. Qui nieroit cela? dis- ie. Mais quelqu'un pourroit il encores nier dict-elle, que tout ce qui est iuste, est bon, & que tout ce qui est contre iustice, est mauuais? Ces choses, dis- ie, s'ensuyuent par celles que nous auons cy-deuant conclues. Mais ie vous prie dictes moy vne chose: Apres la dissolution de l'ame & du corps, ya-il quelques peines & tourmens reseruez aux ames? Ouy vrayement, dict-elle, & quelques vnes sont cruellement affligées, pour les punir, & les autres sont plus doucement traictées pour les purger: mais mon intention n'est pas de disputer à ceste heure de ces choses là. Or ce que nous auons iusques à ceste heure peu faire, est, que nous vous ayons faiet cognoistre, que la puissance que vous reputiez mal à propos estre concedée aux meschans, est nulle: que ceux que vous estiez marry de veoir demeurer impunis, iamais ne demeurent sans souffrir chastiment de leurs meschancez: & que le pouuoir de faire mal

CONSOLAT. DE PHILOS.

que vous souhaitez estre nul & finir biẽ tost, n'est pas de durée: & que plus il dure, plus il est miserable, & qu'il le seroit infiniment, s'il estoit eternal. Et outre, que les meschans qui iniustement demeurent impunis, sont plus malheureux que ceux qui sont chastiez iustement. Et pourtant faut conclure qu'ils sont beaucoup plus affligez, quand on pense qu'ils le soient moins. Alors ie luy dis, quand ie considere bien voz raisons, ie ne pense pas que l'on puisse dire chose plus veritable. Mais quand ie retourne au iugement des hommes, qui est celuy qui ne iugera que ces choses ne se doiuent pas seulement croire: ains que plustost on ne les doit pas escouter? Il est vray, dict-elle, pource que les yeux accoustumez aux tenebres, ne peuuent attaindre à la lumiere resplendissante de la verité, & sont semblables à ces oyseaux, la veuë desquels est illuminée par la nuit, & par le iour est offusquée. car quand ils ont esgard nō à l'ordre des choses, mais à leurs propres affections, ils reputent heureux ceux qui ont licence de faire mal, sans en estre repris ny chastiez. Mais voyez ce qu'or-

donne la loy eternelle, Si vous rendez vostre ame conforme, & la faictes semblable aux choses meilleures, vous n'avez point besoin de iuge pour vous donner guerdon & récompense: car vous vous estes vous mesmes vny & ioinct avec les choses plus excellentes, & par le moyen d'icelles fait Dieu. Aussi si vous avez employé vostre entendement & mis toute vostre estude à choses mauuaises, ne cherchez point ailleurs qui vous punisse: pource que vous auilissant & veautrant en choses sales & basses, vous vous estes vous mesme faict beste: comme si vous regardez la Terre & le Ciel l'un après l'autre, ostant tout autre iugemēt, il vous semblera par la seule raison de regarder tantost estre dans le Ciel, & tantost enseuely dans la fange. Mais le vulgaire ne préd pas gardé à toutes ces choses. Quoy donc? suyurons nous ceux-là que nous auons n'aguères monstre estre semblables aux bestes? & si quelqu'un auoit entieremēt perdu la veüe, & n'oublioit encor de l'auoir iamais eüe, tellement qu'il eust opinion que rien ne luy manquast pour estre homme parfaict, cela seroit-il

CONSOLAT. DE PHILOS.

cause de nous faire croire , que ceux qui voyent fussent aveuglez ? Le vulgaire n'accordera & ne consentira iamais, que ceux qui font iniure à autrui, soyent plus miserables & plus malheureux que ceux à qui elle est faicte ? encor que telle opinion soit bien prouuée & appuïée de bonnes & fortes raisons. Je voudrois bien ouyr ces raisons là, dis-je. Meniez vous, dict-elle, que celuy qui est mauuais, ne soit digne de peine ? Non , dis-je. Que les mauuais soient malheureux, dict-elle , cela est cogneu par beaucoup de raisons. Cela est vray, dis-je. Vous ne douterez donc point, dict-elle, que ceux là qui sont dignes de peine ne soyent miserables. Nous sommes d'accord, dis-je. Si donc vous estiez iuge, dict-elle, lequel iugeriez vous digne de punitiõ, ou celuy qui feroit iniure , ou celuy qui la souffriroit ? En cela, dis-je, il n'y a point de doute, que ie ne voulusse que satisfaction fust faicte à celuy qui feroit iniurié , par la peine & le supplice de celuy qui auroit faict l'iniure. Celuy donc qui fait iniure, dict-elle , semble plus miserable, que celuy à qui elle est faicte. Il s'ensuit bien,

dis-ic. Pour ceste occasion donc, di&ct-elle, & pour plusieurs autres raisons tirées de ceste mesme racine, il appert que la turpitude & la villennie rend de sa nature les hommes misérables, & que l'iniure à qui qu'elle soit faicte, n'est pas la misere de celuy qui la reçoit, mais de qui la fait. Si est-ce que les orateurs, dis-ic, font tout le contraire, qui s'efforcent d'esmouuoir & inciter à pitié & commiseration les iuges pour ceux là, qui ont souffert & enduré quelque excés, encor' que l'on eust plus de raison d'auoir plustost compassion de ceux qui ont faict & commis l'excés, lesquels deuroient estre amenez en iugement, tout ainsi que les malades au Medecin par leurs accusateurs: non pas colerez ny courroucez, mais fauorables & attaincts de misericorde & de pitié, à fin de leur retrancher la maladie de la faute par le supplice. Et en ceste sorte la peine de ceux qui entreprennent de deffendre, seroit inutile: ou s'ils vouloient apporter aux hommes quelque profit, & leur seruir, il vaudroit mieux qu'ils

K iiii

CONSOLAT. DE PHILOS.

les accusassent que de les defendre. Et si ces meschans mesmes pouuoient comme à trauers quelque fente, voir la vertu que ils ont abandonnée, & cognoistre que par le moyen du supplice & de la peine, ils peussent chasser d'eux tout vice, & toute turpitude, pour deuenir bons & acquerir bonté, ils ne reputeroient point cela supplice ny peine, & reietteroient l'aide & le secours de ceux qui les voudroient defendre, laissant faire leurs accusateurs, & s'abandonnans à la mercy des iuges. Et ainsi entre les sages on ne trouueroit iamais occasiō de haine. car qui pourroit hayr les bons, si ce n'estoit quelque homme du tout hors d'entendement? & il n'y a point de raison de hayr les meschans. Pource que comme la langueur est maladie du corps, aussi le vice & la meschanceté l'est de l'ame. & comme nous ne reputōs pas ceux qui sont malades en leurs corps dignes d'estre hays, mais plustost que l'on ait pitié & compassion d'eux: A plus forte raison deuons nous estre esmeuz à pitié, à l'endroit de ceux là, qui sont par le vice affligez & tourmentez en l'ame, qui est la plus cruelle & dange-

LIVRE QUATRIESME. 113
reufe maladie, & non pas les trauailler ny
les pourſuiure.

POEME IIII.

HE que ſert tant de débats!
Pourquoy de vos propres mains,
O miſerables humains
Haſtez vous voſtre treſpas?
Si la mort vous appelle &
Elle vous viendra ſaiſir:
Car d'arreſter n'a plaiſir
Iamais ſes chevaux aiſle &.

Ceux que les Lyons, les Ours,
Les Sangliers, & les Serpens,
Trauailent d'ongle & de dents,
Eux meſme abregent leurs iours.

He que ſert iniuſteſt
S'armer, guerroyer, ferir,
Et ſe faire ainſi mourir
L'un l'autre cruellement?

Eſt-ce pour auoir eſté
D'eſtrange condition?

Las! c'eſt maigre occaſion
Pour ſi grande cruauté,

Mais ſi tu as le vouloir,
Rendre aux choſes leurs guerdons,

K v

CONSOLAT. DE PHILOS.

*Il te faut aymer les bons,
Et des meschans te douloir.*

SOM. DE LA V. PROSE.

Parce que Boëce se pleignoit n'aguere, que les biens escheoient aux mauuais, & les maux aux bons: ce qui luy faisoit aussi croire que ces vicissitudes procedoient non de l'ordre de la prouidence de Dieu, mais par hazard & fortuitement: c'est pourquoy la Philosophie deduit icy les causes d'une telle procedure, & enseigne que la creance susdite prouient d'une ignorance des causes de la disposition diuine.

PROSE V.

IE cognois bien, dis-ie alors, par ces choses quelle felicité ou misere est ordonnée & establie aux merites des bōs & des meschans: mais ie m'apperceoy bié qu'en ceste fortune vulgaire il y a aussi bien du mal, comme du bien. Car le sage ne voudra pas plustost estre banny pauvre & calomnié, que splēdide & magnifique par ses richesses, reueré pour les honneurs, estimé pour son autorité

& puissance, & fleurir entre les siens, & demeurer tousiours en sa Cité. Pource qu'ainsi les sages peuuent mieux, & au gré d'un chacun faire leur deuoir & office, d'autât que la felicité de ceux qui gouuernent, est d'une certaine façon, infuse en ceux à qui ils cōmandent, & qui leur sont soubsmis : veu que principalement les prisons, les loix, & les peines de la loy establies pour les meschans, sont plustost deuës à ceux là pour qui elles ont esté inuentées, qu'aux bons. Pourquoi donc ces choses se changent-elles, & se tournent ainsi tout au rebours ? Le trouue estrange que les peines qui sont establies pour les meschans, oppriment & affligēt les bons, & que le loyer deu aux vertueux pour leur bonté, soit rauy des meschans : & voudrois fort sçauoir de vous les raisons d'un tant iniuste mélange & confusion. Car si ie croyois que toutes choses fussent regies & gouuernées fortuitement & à l'aduenture, ie m'en estonnerois moins : & ce qui accroist cest estonnement mien, & qui fait d'auantage m'esmeruiller, c'est Dieu qui regit & gouuerne tout, qui assez souuēt

K vj

CONSOLAT. DE PHILOS.

Donne du bien aux bons, & du mal aux
meschans:&quelquefois au contraire du
mal aux bons,& aux mauuais du bien. si
on ne peut rendre raison de cela,qu'y a-il
qui empesche que l'on ne repute toutes
choses estre conduites,regies & gouuer-
nées par la fortune? Je ne trouue point
estrange,dict- elle, si l'on ne peut donner
raison de l'ordre d'une chose, que l'on la
croye temeraire & fortuite.& encor' que
vous soyez ignorant de la cause d'une
telle dispositiō, puis que vous sçavez biē
qu'un bon gouuerneur ordōne & dispo-
se le monde, ne doutez point que toutes
choses ne soient bien faictes..

POEME V.

CEstuy là qui ne sçait point
Que tousiours autour du pole,
Sans s'en eslongner d'un poinct,
L'Ourse voisine se rolle,
Le Bouvier tost se leuer
Et tard en l'eau se lauer:
Il sera rauy d'esmoy
Pour l'ordre là haut tenuë;
Et s'estonnera pourquoy.

Le Ciel ainsi se remuë:

*Que la Lune estant au plain,
S'obscurcisse tout soudain:*

*Pourquoy les feux estoillez
N'apparoissent estant claire,
Et pourquoy sont desuoillez,
Si tost qu'elle deuient noire:*

(ceste opinion est de l'ancien vulgaire, qui sonnoit, battant poisses & chauderons d'airain, comme pour r'appeller & desengager la Lune, qu'ils pensoient que les sorciers rauissoient du Ciel par leurs charmes, lors qu'elle eclipsoit, & pourtant a dit Virgile conformément à ceste opinion;

Defectus Solis varios, Lunaque labores.)

*Faisant la commune erreur
Bruicts pour reuoir sa lueur:*

*Mais on est rayuy de voir
La mer de vents agitée,
Furieuse s'esmouuoir,
Contre ses bords despitée:
Ny de ses plus chauds rayons,
Phæbus fondre les glaçons.*

*Car de cecy la raison
Est cogneuë & manifeste:
De l'autre l'occasion
Est au vulgaire secrette,
D'un trouble subit espoinct,*

CONSOLAT. DE PHILOS.

De cela qu'il ne sçait point.

*Car tout ce que rarement
Avec soy le temps apporte,
Saisist d'un estonnement
Le vulgaire & le transporte.
Faut l'ignorance hayr,
Pour de rien ne s'esbahir.*

SOM. DE LA VI. PROSE.

La Philosophie deduit icy les causes pour lesquelles les maux auiennent aux bons, & les biens aux mauuais. & monstre premierement en quoy differe la prouidence diuine avec le destin, par la definition de l'un & de l'autre. puis allegue diuerses opinions touchant le destin, qu'il preuue estre subiet à ladite prouidence, non au contraire, comme l'effect à la cause. En suite elle vient à discourir des choses qui sont disposées par le destin: & conclud que celles qui semblent à l'intellect estre confuses, sont raisonnablement ordonnées en la prouidence & gouuernement de Dieu: & que la faute viêt du peruers iugemēt des hommes contraire à celuy de Dieu. Quant à ce que quelques gents de bien ne sont point affligez en ce monde, elle en attribue la cause à l'infirmité de leur esprit, que l'aduersité pourroit empirer; & à la saincteté de quelques vns, lesquels Dieu benit non

seulement au siècle auenir , mais aussi en la vie presente. Au reciproque, il espargne quelque-fois les meschans , d'autant que la prosperité les empesche de commettre d'autres plus pernicioeux crimes , selon que la nature de l'homme est du-tout encline à mal & quelquefois permet qu'ils ayent tout à souhait, pour les rendre d'autant plus inexcusables deuant la majesté.

PROSE VI.

IL est ainsi, dis-je. mais puis que c'est vostre office d'esclarcir & expliquer les causes obscures , & cachées ; ie vous prie de me les declarer , & desuelopper vn peu de ce miracle qui me tient en grand trouble & confusion. Lors se soubstant vn peu, elle me dict : Vous me semonnez d'vne des plus grandes choses que l'on puisse imaginer , & de laquelle on ne peut donner tant de resolution qu'il suffise. D'autant que ceste matiere est telle, qu'vn doute retrainché & resolu, il en naist vne infinité d'autres , comme des restes de l'Hydre , & iamaïs on n'en auroit la fin , si on ne les repoussoit & referroit avec le feu vis d'vn entendement bien sain , non

pas avec le feu elementaire, comme fit Hercule au Serpent Hydre. Car en icelle on a accoustumé d'y chercher de la simplicité, de la prouidence, de l'ordre, du destin, des soudains & inopinez-uenemens de la cognoissance, & predestination diuine, & de la liberté & franchise de la volonté : & vous sçauiez assez combien telles choses sont d'importance, & difficiles. Mais pource que les vous faire cognoistre, est vne partie des remedes, & de la medecine dont vous auez besoin, ie m'efforceray de vous en donner quelques raisons, encore que nous soyons contraincts en vn bié petit espace de téps. Or si vous prenez quelque plaisir en la douceur des vers mesurez, il faut que pour vn temps vo⁹ vous priuiez de ceste volupté, cependant q^{ue} ie vo⁹ mettray par ordre quelques raisons. Comme il vous plaira, dis-je. Lors, comme si elle eust voulu prendre les choses de plus loing, commença à discourir en ceste sorte. La generation de toutes choses, le progrès des natures muables, & tout ce qui a mouuement en quelque sorte que ce soit, prend &

tire les causes, son ordre, & sa forme de la stabilité de l'intellect diuin, lequel vny en la force de sa simplicité ordonne & dispose diuersement de toutes choses, & en diuerses manieres establit vn moyen à chacune pour faire ce qui luy est propre de faire: & ce moyē, si nous considerons la pureté & simplicité de l'intelligence diuine, est nommé Prouidence: mais quand il est referé aux choses qu'il fait mouuoir & qu'il dispose; les anciens l'ont nommé Destin. Et qui vouldra bien considerer en son esprit la force de l'vn & de l'autre; il luy sera facile d'en cognoistre la difference. Car la prouidence est vne ordonnance, & quasi comme vn arrest de tout ce qui doit aduenir, qui est en l'esprit & intellect de Dieu, maistre, & seigneur de toutes choses. Et le destin est vne disposition cōioincte & attachée aux choses muables, par le moyen de laquelle la prouidence tient toutes choses attachées à leur ordre. Car la prouidence comprend & embrasse toutes choses, bien qu'elles soient infinies & differentes. Mais le destin dispose & ordonne:

CONSOLAT. DE PHILOS.

toutes choses selon leur temps, leur lieu & leur forme : de sorte que ceste difference de l'ordre du tēps, reünie & mise deuant l'intellect diuin, est prouidence. Et ceste vnitē diuisée & séparée en tēps, est nōmée destin. Et bien que ces deux choses soient diuerses, elles dependent neantmoins l'vne de l'autre : car l'ordre du destin procede de la simplicité de la prouidence. Tout ainsi que l'artisan ayant comprins en son entendement la modelle & la forme de la chose qu'il entend faire, commence son ouurage, & conduit avec le temps chacune partie l'vne apres l'autre selon son ordre, comme il auoit auparauant simplement proietté en son entendement, & en vn seul moment de temps. Ainsi Dieu a par vn seul moyen estably toutes choses dès le commencement, & les a disposées par sa prouidence, en ce que chacune deuroit faire : & le destin fait & accomplit ces mesmes choses que la prouidence a disposées en diuerses sortes & temps du tout differens. Or soit que le destin s'execute par quelques esprits qui seruent à la diuine prouiden-

ce : ou par l'ame du monde , comme ont dict ceux de l'eschole de Platon: ou par l'operation de la nature , qui est cōme celle qui met en execution la volonté de Dieu: ou par les mouuemens celestes des Astres , ou par la vertu des Anges , ou de la variable industrie des demons , ou d'aucunes de ces choses , ou de toutes ensemble : Il est certain & manifeste que la prouidēce est vne forme simple & immobile des choses qui se doiuent faire. Et le destin vn ordre temporel, & vne liaison muable de ces mesmes choses là , & que la diuine simplicité a disposées pour estre faictes. D'où vient que toutes choses qui sont suiettes au destin , sont aussi suiettes à la prouidence, à laquelle le destin mesmes est souz-mis : & aucunes des choses qui sont souz la prouidence surmontent & vainquent l'ordre du destin. Et sont celles là , qui sont plus proches de la Diuinité, fermement establies , qui surpassent l'ordre fatal des choses muables : comme de plusieurs cercles qui se tournent à l'entour d'vn mesme centre, celui qui est le dernier au dedans de

CONSOLAT. DE PHILOS.

tous les autres , est le plus proche du point, autour duquel il tourne. Et ce cercle là est aux autres qui sont hors de luy, comme vn certain centre, autour duquel ils tournent : & celuy qui est le dernier au dehors, qui fait le plus grand circuit ; d'autant qu'il est esloigné de ce point indiuisible, c'est à dire de son centre, d'autant son tour est-il plus grand. Et si aucune chose se ioint & vnit à ce milieu, qui est le centre, il est nécessaire qu'elle s'vnie à la simplicité du cercle prochain, sans se dilater d'auantage. Semblablement ce qui est plus esloigné & separé du premier intellect, est d'auantage lié & embrassé dans les liens du destin. Et d'autant plus est la chose libre & franche du destin, qu'elle est proche & voisine du souuerain centre de toutes choses: & si elle venoit à s'appuyer à la fermeté du souuerain intellect, venant à cesser son mouuement, elle outrepasseroit aussi la nécessité du destin. Et comme la ratiocination est à l'intellect, ce qui est engendré à ce qui est, le temps à l'éternité, & le cercle à son centre : tel est l'ordre muable du

destin à la simplicité stable de la prouidence. Cest ordre fait mouuoir les Cieux & les Astres, accorde, & tempere les Elementens, & les trāsforme par mutations alternatiues. Et ce meſme ordre renouuelle toutes les choses qui naissent, & qui meurent par ſemblable progrès de part, & de ſemence. Cest ordre contraint auſſi & attache avec liēs & nœuds indiffolubles les actions & fortunes des hommes. Leſquelles choses d'autant qu'elles procedēt des principes de la diuine prouidence, qui eſt immobile, il eſt force qu'elles demeurerēt auſſi fermes & ſans ſe mouuoir. Et par ainſi toutes choses ſont biē gouuernées, ſi la ſimplicité qui demeure ferme en l'intellect diuin produit, & met hors l'ordre des cauſes ineuitables. Et ſi ceſt ordre refrene & cōtraint par ſon immuable nature, meſme les choses muables, qui autrement erreroient temerairement & à l'auenture : qui eſt cauſe qu'encor que toutes choses vous ſemblent confuſes & meſlées, pour ce que vous ne pouuez pas bien comprendre ceſt ordre : toutesſois elles ſont par ſon moyen tellement diſ-

CONSOLAT. DE PHILOS.

posées, qu'elles tendent à bien. Pource
que rien ne se fait iamais pour mal, ie
dis encor par les meschans mesmes, qui
comme ie vous ay bien amplemēt faiēt
voir, cherchans le bien, sont par erreur
destournez : mais non pas que l'ordre
qui fait son mouuement autour du
souuerain bien, qui est son centre,
les destourne, & les face desuoyer
de leur principale intention. Mais, me
direz-vous, quelle confusion plus ini-
que peult estre, que de voir arriuer aux
bons, tantost des aduersitez, & tantost
des prosperitez: & aux mauuais tout de
mesmes, tantost leur succeder toutes
choses prosperes, & tantost aduerses?
Dites-moy ie vous prie, les hommes vi-
uent ils avec telle integrité d'esprit, que
ceux que l'on croit ou bōs, ou mauuais,
qu'il soit necessaire qu'ils soient tels
qu'on les estime? Ne sçauiez vous pas
qu'en telles choses les iugemens des
hommes sont du tout differens? Pource
que ceux là qu'aucuns estiment dignes
de loyer, les autres les reputent dignes
de supplice. Mais posé que quelqu'un
se trouue qui puisse bien discerner le

bon & le mauuais ; pourra-il pourtant veoir ceste intime & intrinseque temperature des esprits , comme l'on fait facilement des corps ? car il n'est moins estrange à vn qui est du tout ignorant de la medecine , de voir qu'à aucuns corps biens sains cōuiennēt mieux les choses doulces , & aux autres les ameres : Et entre les malades aucuns estre gueris par plus légers remedes , & autres par plus rudes & plus forts estre soulagez. dequoy le medecin toutesfois ne s'esbahyt point , pource qu'il cognoist & sçait la temperature des corps , & le moyen qu'il faut tenir pour leur dōner santé. Et à dire vray, en quoy iugerons nous estre & consister la santé des esprits , sinon en la bonté ? & quelle est leur maladie , sinon le vice ? qui est celuy qui les entretient, & conserue en bonté, & qui chasse le vice d'eux , sinon Dieu qui regit, & est le vray medecin des esprits, lequel par le regard de sa diuine providence , void ce qui fait besoing à vn chacun , & donne ce qu'il cognoist luy estre necessaire? Et est-ce dōc

CONSOLAT. DE PHILOS.

chose si estrange, & vn si grand miracle
 q̃ l'ordre fatal, si en faisant quelque cho-
 se on sçait bien ce que l'on fait, pource
 seulement que ceux qui en sont ignoras
 s'en estonnent? Et afin qu'en peu de pa-
 roles ie compréne ce que peut l'humai-
 ne raison en la diuine profundité: celuy
 que vous tenez pour tresiuste, & grand
 obseruateur du droict, est reputé tout
 autre par la prouidence qui sçait & co-
 gnoist toutes choses. C'est pourquoy
 Lucain, qui estoit de noz familiers, di-
 soit que la cause de Cesar auoit pleu aux
 Dieux, à raison de la victoire qu'ils luy
 auoient donnée: & celle de Pompée qui
 auoit esté deffait, auoit pleu à Caton, cō-
 me la iugeant la meilleure. Ce donc que
 vous voyez qui se fait icy outre vostre
 esperance, eu esgard aux choses, est faict
 avec raison & selon l'ordre. Mais à vo-
 stre opinion, il est faict confusement &
 iniquement; de sorte que s'il se trouue
 aucun si bien conditionné, & de si bon-
 nes mœurs, que son iugement soit vn,
 & de mesme avec le diuin; il est si foi-
 ble & debile d'esprit, que s'il luy arriue
 quelque infortune, à l'adquéture cessera-
 il d'aimer

il d'aimer la vertu d'autant qu'il n'aura
 peu par le moyen d'icelle retenir ny
 garder sa fortune. C'est pourquoy Dieu,
 qui est le sage dispensateur de toutes
 choses, espargne cestuy là, que l'aduer-
 sité pourroit faire moins bon, & ne
 veut pas que cestuy là souffre & patisse,
 qui ne l'a pas mérité. La prouidence di-
 uine ne trouuera pas licite, ny raison-
 nable qu'un autre qui sera parfaict &
 accomply en toutes vertus, saint, &
 approchant de Dieu soit touché d'au-
 cune aduersité, ny mesme ne permet-
 tra pas qu'il soit molesté, ny affligé d'au-
 cune maladie corporelle. Pource que
 comme a dit vn tres-excellent person-
 nage en langage Grec, mais de telle sub-
 stance: Les vertus ont composé le corps
 de l'homme de bien, & pourtant l'hom-
 me du tout adonné à Dieu n'endure &
 ne souffre aucunement: il arriue enco-
 re souuent que le gouuernemēt & l'ad-
 ministration des choses est donnée aux
 bons: pource que la malice des mes-
 chans est faicte si grande, & tellement
 accreuë, qu'il est besoing de la reprimer
 & cōtraindre. A aucuns les choses suc-

L

CONSOL. DE PHILOS.

cedent diuersément, en partie heureu-
ses, & en partie aduerses, selon la qua-
lité de leurs esprits. Les autres sont
pincez & molestez des infortunes: à
fin qu'ils ne deuiennent plus insolens
pour leur longue felicité, & qu'ils ne
s'en orgueillissent. Quelques vns en-
core sont affligez de grandes infor-
tunes: à fin que par l'usage & exerci-
tation d'une longue patience, les vertus
de l'ame soient plus fermes & asséu-
rées. Il y en a qui se font cognoistre &
esprouuer tels qu'ils sont, lors que
quelque infortune leur suruient, les
vns en craignant plus qu'ils ne de-
ueroient, ce qu'ils pourroient bien
supporter: les autres mesprisant trop,
& desdaignant plus qu'il ne seroit rai-
sonnable, ce qui leur est impossible de
souffrir & porter patiemment. Il s'en
trouue encore d'autres, qui s'achetent
nom & reputation entre les hommes
par le prix d'une mort honorable:
& quelques vns, qui ont résisté aux
tourmens, & ne se sont laissez vaincre
par les supplices, ont donné par ce
moyen à vn chacun tesmoignage que la

vertu n'est iamais surmontée du mal. &
 ne peut-on doubter que telles choses
 n'arriuent à ceux à qui elles succedent
 pour le mieux, & avec vn merueilleux
 ordre & disposition. Et si aux mauuais
 les choses viennent tantost à souhait,
 & tantost au rebours, ce ne peut estre
 que pour ces mesmes raisons que nous
 auons dictes. Mais on ne peut pas trou-
 uer estrange qu'il leur arriue du mal,
 pource que l'on les en repute dignes, &
 que l'on croit qu'ils ont bien merité le
 supplice & chastiment, lequel destour-
 ne les autres de mal faire, & est cause
 de leur amandement. Les choses pros-
 peres donnent aux bons vn grand ar-
 gument de penser quelle peut estre
 ceste felicité, qu'ils voyent estre serue
 & esclaué des meschans. Et croy enco-
 re qu'é telles choses il y a du respect &
 de la consideration de celuy qui les dis-
 pèse, pource que quelqu'un à l'aduétu-
 re sera de si foible & tresbuchâte natu-
 re, & tant importune, que la pauureté,
 plustost que toute autre chose, le pour-
 roit inciter à faire quelque meschance-
 té : & le moyen que tient la prouidée à

CONSOL. DE PHILOS.

medeciner cestuy-cy, est de luy donner des richesses. Vn autre cognoissant sa conscience souillée & contaminée des pechez, & faisant en luy-mesme iugement de sa fortune aura peut estre crainte de receuoir desplaisir, pour la perte de quelques choses dont l'vsage luy sera fort agreable. Il changera soudain de mœurs, & pendant qu'il craindra de perdre ses richesses, il cessera d'estre vicieux. Aucuns sont par leur mesme felicité de laquelle ils auront mal vsé, precipitez au danger qu'ils ont merité. Autres ont bien la puissance de chastier contre droit : à fin qu'ils soient aux bons occasion d'exercice & d'amendement aux meschans. Car comme entre les bons & mauuais il n'y a aucun pact, ou concorde, ainsi les mauuais entre-eux ne se peuuent accorder : Et ne faut pas s'estonner s'ils ne sont d'accord entre-eux, puis que chacun meschant est repugnant le plus souuent à luy-mesme, & par vn remors de conscience, iuge que les choses qu'il a auparauant faictes ne sont point faisables. En quoy ceste souueraine prouidence a souuentefois

produict des effectz dignes d'admiration, faisant que les meschans des meschans soient deuenus bons. Car comme aucuns meschans ont veu qu'ils supportoient & enduroient choses iniques & iniustes de plus meschans qu'eux, ils ont souuent conceu vne haine mortelle contre tels, qui leur faisoient nuy-sance: de sorte que pour se rendre du tout contraires & dissemblables à ceux qu'ils ont eu en haine, se sont redressez & retournez à faire fruiet en la vertu. Pource que telle est la force de la seule vertu diuine, que le mal-mesme est bié, d'autant que quand on en sçait bien user, il en resulte & reüssit quelque bon effect. Car vn certain ordre embrasse toutes choses, tellement que ce qui desuoie de l'ordre qui luy est assigné de la raison, il se retourne & raddresse encor en vn ordre, bien qu'il soit tout autre: à fin que la temerité ne puisse rien, où regne la prouidence. Et Dieu qui est trespuissant, a faict & cognoist tout ce qui est au monde, preuoid tous les siecles & les gouerne. Et n'est pas permis à l'homme de pou-

voir comprendre en son esprit ny expliquer de paroles toutes les causes & dispositions des œuvres diuines. Et suffise seulement cognoistre que Dieu producteur de toutes les natures, ordonne & dispose toutes choses, les adressant à bien : & lors qu'il veut retenir les choses faictes de luy, & à son image, il reiette & bannyt hors les fins de sa republique tout le mal, par le moyen de l'ordre de la fatale nécessité. D'où vient que les maux que vous pensez estre au monde en si grande abondance, si vous considerez la prouidence qui dispose tout, vous ne trouuerez qu'il y ait mal en quelque lieu que ce soit. Mais ie vous vois desia succomber au faix de ceste question, & que las pour la longueur de mon discours, vous attendez quelque rafraichissement de mes vers. Prenez donc ce breuuage, à fin qu'estant refaict par le moyen d'iceluy, vous soyez mieux disposé à ce qui reste.

POÈME VI.

Si du haut tonant
 L'Empire cognoistre,
 Et quel maintenant
 Son regne peult estre,
 Juger saintement tu veux,
 Esleue l'esprit aux cieux.

Là d'un saint lien
 Aux cieux establie
 A l'ordre ancien
 Chasque estoille vnie,
 Tu verras se contenir,
 Et d'ordre se maintenir.

De ses brillans feux
 Phœbus n'importune
 Le rond froidureux
 Jamais de la Lune,
 Qui fait & poursuit son cours,
 Sans empeschement tousiours.

Et l'Ourse sans fin
 Au pole seiourne,
 Et de son chemin
 Point ne se destourne,
 Qui void aux autres changer,
 Pour dans la mer se plonger.

L iij

CONSOLAT. DE PHILOS.

De l'obscur nuit
Venus est portiere:
Diane conduit
La belle lumiere,
Faisant chacune à son tour,
Or la nuit, & or le iour.
L'amour mutuel
Ces choses tempere,
Et d'ordre eternal
Leurs cours leur fait faire,
Chassant la dissension
Loing de l'astrée maison.
Et ceste vñion
Les Elemens lie,
Par proportion
Les tient & manie,
Si qu'en eternal accord
Se tient tousiours leur discord.
Le sec & l'humour
Par poids se conioignent,
Le froid & l'ardeur
La foy se maintiennent,
Et fait haut le feu voller,
Et la terre deualler.
Le printemps de fleurs
La terre couronne,
L'Esté d'espics meure

Les champs, & l'Automne
 Peint les fruiets sur les rameaux,
 Et l'hyuer verse les eaux.

Cest ordre pouruoit,
 Nourrit & donne estre
 A tout ce qu'on void
 Respirer & estre,
 Puis lasse de les nourrir,
 Les raut & fait mourir.

Et le souverain
 Qui tient toute chose
 Soubs le ferme frain,
 D'ordre les dispose,
 Pere, Seigneur, source, Roy,
 Origine, luge, & Loy.

Et ce qu'il produit
 Vn temps le fait estre,
 Puis il le raut
 En le changeant d'estre,
 Et son mouuement leger
 Rend coy sans plus se bouger.

S'il ne l'arrestoit,
 Et si de sa course
 En rond ne courboit,
 Trop loing de sa source
 En desordre flotteroit,
 Et soudain se desferoit.

L v

CONSOLAT. DE PHILOS.

*Vn commun desir
Naist en toute chose
De se reünir
En sa propre cause,
Et là comme à bonne fin,
Va adressant son chemin.*

SOM. DE LA VII. PROSE.

C'est la conclusion du discours precedent, Que tout euenement (qu'on appelle fortune) est en diuerſes manieres bon, encores que ce soit contre l'opinion commune. attendu que toute fortune tend ou bien à remunerer ceux qui possèdent la vertu : ou bien à exercer ceux qui trauaillent à l'acquisition de la vertu, & proufisent en icelle : ou derechef à corriger ceux qui se detracquent d'elle. Dont s'ensuit que le Sage ne se doit point affliger si quelquefois l'aduersité lui liure quelque assault, laquelle au moyen d'une ferme & constante resistance luy fournit de matiere pour se confirmer en sagesse & vertu.

PROSE VII.

Vous pouuez de ceste heure voir ce qu'il s'ensuit de tout ce que nous auons dict. Et quoy? dis-ie. Que tout euenement, dict-elle, est bon sans

doubte. Et comme est-il possible? dis-
ie. Escoutez comment, dict-elle. Puis
que toute fortune est ou bonne, ou
mauvaise, elle est ou pour recompen-
ser & exercer les bons, ou pour punir
& corriger les mauvais: & ceste là est
toujours bonne que l'on sçait, ou estre
iuste, ou estre utile. Ceste raison est
bien vraie, dis-ie, & telle opinion est
bien ferme & assurée, si on considere
& la providence, & l'ordre fatal que
vous venez de designer. Mais, si vous
le trouvez bon, contons la entre
celles que nous auons vn peu aupara-
uant dites, qui sont paradoxicques, &
cōtre l'opinion d'un chacun. Pourquoi?
dict-elle. Pource, dis-ie, que commu-
nément les hommes ont coustume de
dire assez souuent, la fortune de quel-
qu'un estre mauvaise, & inique. Vou-
lez vous dōc, dict-elle, qu'en cela nous
suyuions l'opinion du vulgaire: afin
aumoins que nous ne soyons point
veuz trop nous eslongner de l'humani-
té? Come il vous plaira, dis-ie. Ne vous
semble-il pas, dict-elle, que cela soit bon
qui aide & profite? Il est ainsi, dis-ie. Et

CONSOLAT. DE PHILOS.

la fortune, dit-elle, ou qui excite, ou qui corrige, ne profite-elle pas beaucoup? Je le cōfesse, dis-je. Elle est donc bōne, dict-elle. Pourquoy non, dis-je? Celle qui exerce, dict-elle, est de ceux qui attachez à la vertu font tousiours guerre contre les choses rudes & fascheuses, & s'esloignans du vice, suyuent le chemin de la vertu. Je ne le puis nier, dis-je. Et quoy? dict-elle, la bonne fortune que les bons reçoient pour guerdon, le vulgaire la iugera-il mauuaise? Non vrayment, dis-je, mais il la reputera bonne, comme elle est à la verité. Et l'autre qui sera aspre & fascheuse & qui corrige les mauuais par vn iuste supplice, dict-elle, les hommes croiront ils qu'elle soit bonne? Au contraire, dis-je, ils la iugeront la plus misérable de toutes. Prenez donc garde, dict-elle, que nous n'ayons selon l'opinion du vulgaire cōclud quelque chose qui ne soit pas croiable. Cōment, dis-je? Par les choses qui ont esté accordées, dit-elle, il ensuit q̄ la fortune telle qu'elle puisse estre, de ceux là qui sont ou vertueux, ou qui sōt au chemin de la vertu,

& qui y peuuent paruenir & l'acquerir, est tousiours bonne: & celle de ceux qui sont meschans & malicieux, est tresmiserable. Cela est bié vray, dis-ie, & si on ne l'oseroit confesser. Et partant, dict-elle, l'homme sage ne doit point trouuer mauuais, ny se courrousser toutes les fois que il doit resister à la fortune, & qu'il la doit combattre: & n'est pas bien seant à l'homme fort & magnanime de se despiter toutes les fois qu'il oyt vn bruit de guerre: Pource qu'à l'vn & à l'autre la difficulté de l'affaire est, à sçauoir à cestuy cy moyen d'acquerir de la réputation, & de croistre sa renommee, & à l'autre, d'asseurer & renforcer sa sagesse. Or puis que cela est appellé vertu, qui appuyé & assuré en les propres forces ne se laisse point vaincre par les choses aduerses & contraires: Vous ne vous estes point mis à suyure la vertu pour vous abandonner aux delices, & vous laisser corrompre aux voluptez. Vous ne trouuerez donc point trop dur, ny fascheux de resister, & auoir tousiours à combattre contre toute fortune, & afin que la mauuaise ne vous abbare trop, & que la bonne ne vous de-

CONSOLAT. DE PHILOS.

coine, prenez vn moyen & vous efforcez
de le garder, de tout vostre pouuoir. Car
tout ce qui ne peut arriuer à vn moyen,
& qui l'outre-passe, desdaigne & mespri-
se la vertu, & ne peut obtenir le loyer, ny
le guerdon de son trauail, ny de sa peine.
Il est donc en vostre puissance de rendre
vostre fortune, telle que vous l'aymerez
mieux. Car toute celle qui est reputée
contraire, si elle n'exercite, ou corrige, el-
le chastie & punit.

POEME VII.

P Ar cinq & cinq ans la guerre
Sur la Phrygienne terre
Le vengeur Atride a faict,
Pour expier le forfait,
Et pour punir l'adultere
Et le tort faict à son frere.

Mais afin que sans sejour
Fest en ses pays retour,
Ayant ruiné la ville,
Fest mourir sa propre fille,
Reiettant toute pitié,
Et paternelle amitié,
Fest ce piteux sacrifice.

Pour auoir le vent propice,
 Que gracieux se rendist,
 Par le sang qu'il espendist.

Ulyse au retour de Troye,
 Errant par l'humide voye,
 Jetta quantité de larmes,
 Pour la mort de ses gens d'armes,
 Et de ses feaux amis,
 Que Polypheme auoit mis
 A mort, & dedans son antre
 En auoit remply son ventre.

Mais en ris changea son dueil,
 Luy ayant creué son œil.
 Les trauaux ont embellie
 Du fort Hercule la vie,
 Les Centaures mis à mort,
 Mau'gré leur cruel effort.

La despoille renommée,
 Du fier Lyon de Nemée:
 Les pommes qu'il fut pillant,
 Au dragon tousiours veillant;
 Et les Harpies outrées,
 De ses flesches acérées,
 Et dehors d'enfer trainé,
 Le chien Cerbere enchainé,
 Puis fait du corps de leur maistre
Les cruels cheuaux se paistre.

CONSOLAT. DE PHILOS.

*Al'Hydre, & à son venin
 Par le feu fit prendre fin.
 Sur les sables de Lybie,
 A Anthè rauit la vie,
 Et le dieu fleuve escorné,
 Feit plonger tout estonné
 Cacus, à plein satisfaire,
 Pult d'Euander la colere.
 L'espaule qui quelquesfois
 Du ciel porteroit le faix,
 Fut de l'escume honnie
 Du sanglier d'Arcadie.
 Puis pour son dernier labeur,
 Du ciel merita l'honneur.
 Suivez donc de pas habilles
 Ce sentier, ames gentilles.
 Pourquoi, ô lasches de cœur,
 Fuyés vous tant le labeur
 De la terre? ayant victoire
 Aux cieux en auez la gloire.*

Fin du quatriesme Liure.



LA CONSOLATION DE PHILOSOPHIE, PAR SEVERIN BOECE.

LIVRE CINQVIESME.

SOMMAIRE DE LA I. PROSE.

De la doctrine cy-dessus exposée touchant la providence & le destin, résulte vne question, sçavoir-mon si quelque chose se fait par cas fortuit. Suyuant cette question la Philosophie determine à quelles choses le mot de cas fortuit sainement entendu peut conuenir. redarguant par mesme moyen les anciens estimans le cas ou accident estre vn euénement temeraire, escheu à l'auenture & non suiet à l'ordre auquel Dieu a par sa providence astreint toutes choses.

PROSE I.

ELLE auoit acheué de parler, & son discours se tournoit à vouloir traiter d'autre chose, & alors ie luy dis: Ceste exhortation est tresbelle & bien digne de vostre autorité: & cognois certainement que ceste question de la prouidence, de laquelle vous parliez n'agucres, est meslée & confuse parmy beaucoup d'autres. & pourtant ie vous demande si vous croyez que l'euenement fortuit soit quelque chose, & ce que vous pensez que ce soit. Le m'aduançe, dict elle, pour m'acquiter de ma promesse, & de vous aplanir le chemin, par lequel vous puissiez estre remené & conduit chez vous. Or bien que la cognoissance de ces choses que vous me demâdez soit tres vtile, elle est toutesfois vn peu eslongnée du fil de nostre discours: & doute que las & traouillé de ces destournemens, vous ne vous trouuiez bien disposé pour acheuer nostre droit chemin. Il ne faut point, dis-ie, que vous doutiez de cela: car la cognoissance de ces choses

auxquelles ie prends si grand plaisir , me
 fera cōme vn repos, & d'auantage estant
 de tous costez vostre dispute assleurée de
 raisons indubitables, on n'aura point oc-
 casion de douter des choses suyuantcs.
 Ie vous satisferay en cela, dict-elle. Puis
 elle commença en ceste sorte: Si aucū dif-
 finit le cas fortuit vn euenement teme-
 raire, non produit de la concatenatiō &
 liaison des causes, i'affirme que vraymēt
 le cas fortuit n'est riē, & ne cognois point
 que ce soit autre chose qu'une voix vai-
 ne & inutile, qui ne respond en aucune
 forte à la chose qu'elle signifie. Car quel
 lieu peut demeurer à la temerité, si Dieu
 contraint toutes choses à vn ordre? Car il
 est tout certain que de rien ne se fait au-
 cune chose, & iamais aucun des anciens
 n'y a contredict, & bien qu'ils ayent ietté
 ceste opiniō, comme vn certain & assieu-
 ré fondemēt de toutes choses, si n'ont ils
 pas entendu du principe agent, mais biē
 de la matiere suiette: c'est à dire de la na-
 ture des causes, qui est le suiuet des formes
 naturelles. Et si quelque chose n'a au-
 cune cause de son estre, il semble qu'elle
 soit formée de rien, & si cela ne peut estre.

le cas fortuit, il ne peut aussi estre tel que nous l'auons n'agueres diffini. Et quoy donc? dis-je, ce qui se peut avec raison nommer cas fortuit, ou aduventure, n'est-ce rien? Encore y a-il quelque chose, bien que le vulgaire ne la cognoisse, à laquelle tels noms conuiennēt. Aristote, dict-elle, qui est de ceux de ma suite, l'a fort bien diffini avec raison, & assez proche de la verité. En quelle sorte? dis-je, Toutes les fois, dict-elle, que quelque chose se fait pour quelque chose, & que de celle-là pour quelques autres causes en naissent d'autres que celles que l'on eseroit qui en deussent naistre, tel euenemēt qui aduient outre l'intencion de l'agent, s'appelle cas fortuit. Comme si quelqu'un beschant la terre pour la labourer, trouuoit vn tresor, on croit bien que cela soit arriué fortuitement, mais cela n'est pas forme de rien. car il a ses propres causes, lesquelles pource qu'elles sont inopinémēt ensemble concurrentes, on le repute fortuit: pource que si le laboureur n'eust point besché la terre, & si le depositaire n'eust là enfouy son argent, le tresor n'y eust pas esté trouué. Voila donc qui est

cause du gain fortuit, lequel prouient des causes qui s'entrerencontrét, & sont ensemble occurrentes, & non pas de l'intention de celuy qui œuvre. Car ny celuy qui cacha l'argent, ny celuy qui laboura le champ, n'auoient point intention que ces deniers là se deussent trouuer: Mais il aduint & escheut qu'où cestuy-là enfouit son tresor, l'autre y bescha. & par là pouons nous diffinir que le cas fortuit, est vn euenement non preueu, qui procede de plusieurs causes, qui s'entrerencontrét ensemble és choses qui se font pour quelque effect. Et cest ordre fait que toutes ces causes se coulent & arriuent ensemble par vne ineuitable liaison, lequel procedât de la fontaine de la diuine prouidence, dispose & ordonne toutes choses en lieux & temps, qui leur sont deubz.

P O E M E I.

D*Es Armeniens rochers
Où en fuyant les archers,
Courbans leur arc par derriere
Laschent la fiesche meurtriere*

CONSOLAT. DE PHILOS.

Dedans l'estomac de ceux
 Qui vont courans apres eux:
 Tigre & Eufrate leur course
 Commencent de mesme source
 Et puis partageans leurs eaux,
 Se fendent en deux ruisseaux
 Baignans diuerses contrées,
 De leurs ondes separées.
 Mais si leurs eaux se mesloient
 Derechef & s'assembloient
 Faisans la source commune,
 Que faisoit à part chacune,
 Qui sur l'un s'embarqueroit,
 En l'autre se trouueroit.
 Se rencontrans sur les ondes
 Les nauires vagabondes,
 Qui croit tel euenement
 Escheoir fortuitement?
 Si cest' onde ainsi meslée,
 Par ses canaux esoulée,
 Naturellement produit,
 Tel accident fortuit:
 Ainsi le sort que l'on cuide
 Errer & floter sans guide,
 A quelque cause de soy
 Qui le retient soubz sa loy.

SOM. DE LA II. PROSE.

C'est vne question touchant le liberal arbitre, sçauoir-mon s'il peut consister avec la providence de Dieu. à laquelle la Philosophie respond que toutes creatures raisonnables ont leur volonté & iugement libre pour au moyen de la raison discerner le bien & le mal. lequel iugement & liberté croist és creatures humaines & diminue selon leurs diuerses fonctions. lesquelles s'addōnans aux vices decheent de la possession de leur propre raison, & de franchises deuient esclaves de leur propre liberté.

PROSE II.

IE considere bien & auouë que tout ce que vous auez dict, est vray. Mais en cest ordre des causes lesquelles dependātes l'une de l'autre, sont bien vnies & attachées ensemble, se trouue il quelque libre & franche volonté? où si la fatale necessité contraint & tient liez les mouuemens de l'esprit humain? Ouy, dict-elle. Car il n'y a aucune nature participante de raison qui n'ait encor sa volonté libre pource que ce qui a naturellement vsa-

CONSOLAT. DE PHILOS.

ge de raison, & encor le iugement, par lequel il peut de luy-mesme discerner chacune chose. Doncques il cognoist quelles choses l'on doit fuir, & quelles choses l'on doit desirer. Mais chacun desire ce qu'il iuge estre desirable, & fuit ce qu'il repute deuoirestre fuy. Et pourtāt to^r ceux là qui ont de la raison, ont liberté deuolloir, ou de ne vouloir pas: mais ie neveux pas dire que tous ayent ceste liberté également: d'autant que les souueraines & diuines puissances ont vn iugement qui void tout, vn vouloir qui ne se corrompt iamais, & vn pouuoir de promptement obtenir tout ce qu'ils desirent. Mais il est bien besoing que les ames humaines soyent plus libres, lors qu'elles se contiennent en la contemplation de l'intellect diuin, & qu'elles le soient moins quād elles sont infusēs & se mouuent dans les corps, & moins encores quand elles sont attachées avec les membres terrestres. Et l'extreme seruitude est quand elles s'addonnent à vice, pour ce qu'elles decheent de la possession de leur propre raison. Car quand ils destournēt leurs yeux de la lumiere de la souueraine verité,

verité, & qu'ils les abbaissent aux choses basses & tenebreuses, ils sont soudain of-
fusquez d'une nuee d'ignorance, & trou-
blez de passions tres-dangereuses. Et
s'accostans à icelles, & leur applaudissas,
ils aident & fauorisent la seruitude, à la-
quelle ils se sont eux-mesmes souz-mis,
& sont comme esclaves de leur propre
liberté. Lesquelles choses la diuine pro-
vidence, qui void tout de toute eternité,
regarde & contemple, dispose & prede-
stine chacune selon son merite.

POEME II.

D'une resonante voix
Et d'un doux accent Homere
A rechanté tant de fois
Phæbus auteur de lumiere,
Qui de ses foibles rayons
La terre au dedans ne sonde,
Et ne peut voir les sablons
A trauers la mer profonde.
Mais à celuy qui se tient
Aux vaultes d'or de son temple,
Rien opposer ne se vient,
Car toute chose il contemple:

M

CONSOLAT. DE PHILOS.

*Ny la nuit de son bandeau
Empoisse d'un gros nuage,
La terre espaisse ny l'eau
Ne luy celent son ouurage.*

*Tout ce que nous voyons or',
Et tout ce qui a eu estre
Tout ce qui sera encor,
En vn moment peut cognoistre.
Si donc d'un seul clin de l'œil
Il void tout & tout modere,
N'est-il pas le Vray Soleil
Et seul authheur de lumiere?*

SOM. DE LA III. PROSE.

Boëce fait vne obiection contre ce que dessus, Que la prouidence & le liberal arbitre sont choses incompatibles. ce qu'il prouue par trois raisons. Car si Dieu preuoid toutes choses, voire les plus internes, il s'ensuit que noz. volonteiz & pensées ne peuuent estre autres que sa prouidence aura déterminé. & si la prouidence preuoid tellement les choses, que leur euénement soit ineuitable, cette liberté n'a plus de lieu, attendu que les deliberations & actions de l'homme sont diuinement astreintes à vn seul euénement. dont s'ensuyuroyent des inconueniens quine

LIVRE CINQUIESME. 134.
peuvent sans impieté estre receuz, comme il le
monstre au fil & suite de son discours.

PROSE III.

ALors, dis-ie, ie suis encor troublé
d'un doute plus mal-aisé. Et quel
est ce doute? dict-elle. Je iuge bien à
mon aduis quel il peut estre. Il me sem-
ble que cela est trop contraire & repu-
gnant, dis-ie, que Dieu preuoye tou-
tes choses, & qu'il y ait neantmoins au-
cune franche volonté, pource que si
Dieu void toutes choses, & qu'il ne
puisse estre trompé en aucune sorte, il
est necessaire que cela aduienne, que la
prouidence aura preuë deuoir adue-
nir. Car si de toute eternité il preuoid
& cognoist non seulement les actions
& operations des hommes, mais en-
cor' leurs pensées & volôtez: Nous n'au-
rons aucune liberté de volonté, & si ne
se fera aucune chose, ny ne pourra-on
auoir aucune volonté, sinon celle que la
prouidence qui ne peut estre trompée,
aura preuë: & si les choses qui sont
preueues se peuvent destourner en autre

M ij

CONSOLAT. DE PHILOS.

part qu'où elles sont preueuës, il n'y aura plus aucune certaine preuoyance de l'aduenir: mais plustost vne opinion & creance incertaine. Et ie repute chose meschante & malheureuse, de croire ainsi de Dieu & n'approuue pas ceste raison par le moyë de laquelle aucuns croient qu'ils pourront resoudre le nœud de ceste question, quād ils disent que les choses n'arriuent pas, pource que la prouidence les a preueuës deuoir estre: mais au contraire pource que ce qui doit estre ne peut estre caché à la diuine prouidence. Et en ceste forte ceste question tourne tout au rebours: car il ne seroit pas necessaire que les choses qui sont preueuës arriuaissent, mais il seroit necessaire de preuoir les choses futures. Côme si nous trouuillions de sçauoir, si la prescience est cause de la necessité des choses futures, ou si la necessité des choses futures est occasion de la prescience: & que nous ne voulussions point monstrier, que en quelque sorte que l'ordre des causes puisse estre, l'euenement des choses preueuës est necessaire: & encore qu'il ne semble point que la prescience infere e-

uenement necessaire aux choses. Comme si quelqu'un s'assied, il est necessaire que l'opinion de ceux-là soit bonne qui croient qu'il soit assis, & au contraire si l'opinion est vraye que quelqu'un soit assis, il est necessaire qu'il s'assie: la necessité est donc en l'un & en l'autre: en l'un d'estre assis, & en l'autre d'opinion vraye. Mais cestuy-là ne s'assied pas, pource que l'opinion est vraye qu'il est assis: ains plustost est l'opinion vraye, pource qu'il estoit assis premierement. Et bien que la verité procede d'un seul costé, si est-elle vne commune necessité en tous les deux. Or est-il manifeste que l'on peut discourir de la prouidence, & des choses aduenir en vne mesme sorte. Car combien que les choses, pour deuoir aduenir soient preueuës, elles n'aduiennent pas pourtant pour auoir esté preueuës. Et est necessaire que Dieu preuoye les choses futures, ou que les choses qu'il a preueuës arriuent. Et cela seul suffit pour oster & destruire la liberté de la volonté. Et pour n'en dire point d'auantage, il seroit fort hors de propos, & tout au rebours de ce qui doit estre, si l'on disoit, que l'eue-

nement des choses temporelles fust cause de l'éternelle prescience. Et qu'est-ce autre chose de penser, que Dieu preuoid les choses aduenir, pource qu'elles doivent aduenir : sinon penser que les choses qui sont des-ia de long temps aduenues soyent cause de ceste souveraine prouidence ? D'auantage quand ie sçay quelque chose estre, il est necessaire qu'elle soit. Et quand ie cognois bien que quelque chose sera, elle deura estre de necessité. Et ainsi l'euenement des choses preueues ne se peut fuir, ny euitier en façon du monde. Et si l'on se veut persuader quelque chose autrement qu'elle n'est, cela seulement n'est pas science, mais vné opinion faulse fort eslongnée & contraire à la verité. Et pourtant si quelque chose doit aduenir, mais non pas que l'euenement en soit necessaire ny certain, comment pourra l'on preuoir qu'il deura aduenir ? Car comme la science ne peut estre meslée avec la faulseté : aussi ce qui se conçoit d'icelle science, ne peut estre autre que l'on l'a conceu. Et pour ceste raison dit-on qu'il n'y a point de mensonge en la science.

pource qu'il faut que chacune chose soit telle, que la science comprend qu'elle soit. Quoy donc? en quelle sorte Dieu preuoid-il que ces choses incertaines doiuent aduenir? Car s'il pense qu'ineuitablement elles doiuent aduenir, & toutesfois qu'il soit possible seulement qu'elles aduiennent, il est trompé. ce que il n'est pas licite de penser, tant s'en faut que l'on le doiuë dire. Mais si comme elles sont, il iuge qu'elles doiuent estre, de maniere qu'il iuge qu'elles puissent estre, ou n'estre point, quelle prescience peut estre ceste-là, qui ne cõprend rié de ferme ny d'asseuré? Elle ne differeroit en rien des propheties ridicules de Tiresias, qui prophetisoit que tout ce qu'il diroit, feroit ou ne feroit pas. Enquoy surpassera ceste diuine prouidence, l'opinion des hommes, si comme eux elle iuge les choses incertaines desquelles l'euenement n'est pas assuré? Que si à luy, qui est la source tres-certaine de toutes choses, rien ne peut estre incertain ny caché: l'euenement sera tres-certain des choses qu'il aura preueues deuoir assurémēt aduenir. Et pourtāt ie ne voy

point qu'il y ait aucune liberté aux deliberations, & humaines operations : puis que l'intellect diuin, qui void toutes choses sans erreur, ny faute aucune, les lie & contrainct à vn seul euenement. Et si cela est vne fois receu, il est assez euident quelle ruine & quel dommage s'en enfuyt aux choses humaines. Et en vain le loyer est proposé aux bons, & le supplice aux mauuais. Puis qu'aucun mouuement de l'esprit libre, & volontaire, ne peut meriter ny l'vn ny l'autre. Et ce qui sembloit tantost iuste & equitable, c'est à sçauoir punir les mauuais, & salarier les bons, est la chose la plus iniuste de toutes, d'autant que de leur libre volonté, ils ne sont pas poussez, ou au bié, ou au mal: mais ils y sont contraincts par la necessité infallible des choses futures. Les vices donc, & les vertus n'auront pouuoir de faire aucune chose, mais plustost la confusion meslée & non distinguée de tous merites. Et ce qui est encore pis, c'est que l'ordre de toutes choses procedant de la diuine prouidence, & ne pouuant rien estre faict de la libre deliberation des hommes, il faut que tous nos vices & toutes

nos faultes se referent à l'auteur & source de tout bien. Doncques il n'y a raison du monde ny d'esperer ny de prier. Car que pourra l'on esperer, ou requerrir par prieres, quand vn ordre necessaire & in-euitable lie & contraint toutes les choses que l'on scauroit desirer? Il faut donc abolir & reietter ce seul commerce entre Dieu & les hommes, d'esperer ou de prier. Car si pour guerdon de nostre iuste humilité, nous acquerons l'ineestimable retribution de la grace diuine: & que ce soit le seul moyen par lequel les hommes semblent parler à Dieu, & se ioindre par les prieres à ceste lumiere inaccessible, pour obtenir ce qu'ils demandent: & si nous admettons la necessité des choses futures, & que nous croyons que nous n'ayons aucun pouuoir, par quel moyen pourrons nous estre ioincts & vnis à ce Prince & auteur souuerain de toutes choses? Et pourtant il sera necessaire que le gente humain, comme vous chantiez n'agueres, separé de son principe & de sa source, deuienne à rien & se resoluë.

M. v.

POEME III.

Qui est cause du discord
 Qui rompt, separe & delie
 Le lien qui tient d'accord
 Vne chose à l'autre vnue?

Quel dieu met dissension,
 Et fait que deux choses vrayes
 Se maintiennent separées,
 Ioinctes soyent en question?

Il n'y a iamais pourtant
 Debat entre choses vrayes,
 Ains l'une l'autre portant,
 Se maintiennent assurees.

Mais vn si subtil lien
 Ensemble les couple & lie,
 Qu'au corps l'ame enseuelie,
 Ne le peut comprendre bien.

Qui fait qu'un ardent desir
 La rend si fort empeschée:
 Et soigneuse à s'enquerir
 D'une verité cachée?

Qu'est-ce qu'elle veut sçavoir?
 Ce dont elle a cognoissance.
 Peut-on ayant l'ascience
 Se travailler pour l'auoir?

S'elle ne le sçait aussi,
 Que telle ignorance est grande
 De se tourmenter ainsi,
 Sans sçauoir ce qu'on demande!

Quelqu'un peut-il souhaitter
 Chose du tout incognuë,
 Ou d'une iamais non veuë
 La forme représenter?

Lors qu'elle estoit remirant
 L'intelle et diuin peut estre,
 Le total considerant,
 Peust ses parties cognoistre.

Dont elle se souuient or,
 Qu'elle est au corps prisonniere,
 Non de chasque singuliere,
 Mais sommairement encor.

Qui donc du bien s'enquerant,
 Veut en auoir la science,
 Il n'est du tout ignorant,
 Et du tout n'a cognoissance.

Il a des choses tousiours
 Cognoissance vniuerselle,
 Mais non de chasque parcelle;
 Qu'après un profond discours.

M. vj

SOMMAIRE DE LA

IIII. PROSE.

La Philosophie commence à dissoudre la question precedente. & premierement fault sçauoir que Boëce a esté principalement induit à ce doute par deux motifs. le premier, que si Dieu preuoid les choses à venir, il semble qu'il s'ensuiue qu'elles doiuent necessairement aduenir. le second, que les choses futures, desquelles l'euenement est incertain, ne peuuent estre certainemēt preueuës par la prouidence diuine. Premierement elle montre, que la prescience de Dieu n'impose point de necessité au liberal arbitre. Secondement, que ladite prescience n'est pas signe de la necessité des choses à venir. Et d'autant qu'il sembleroit qu'aucunes choses peussent estre preueuës, dont l'euenement neantmoins n'est pas necessaire : & que si elles n'auiennent pas necessairement, aussi peuuent-elles n'auenir pas, d'où s'ensuyuroit qu'aucune chose preueuë de Dieu n'auient pas : elle releue Boëce de ce doute, & erreur, dont la faute vient de ce qu'on estime que la faculté de la cognoissance soit selon la faculté de la chose conuë, nonde celuy qui la conoist.

P. R. O S E II II.

A Lors elle me dit: ceste dispute de la
 prouidence est fort vieille & anciē-
 ne, qui a esté fort debatüe par Ciceron
 en ses liures de la diuination, & de vous-
 mesmes, il y a long temps, recherchée.
 Mais iusques à ceste heure aucun de
 vous autres n'y a peu paruenir, quelque
 diligente recherche qu'il en ait sceu fai-
 re. & ce qui est cause de si grande ob-
 scurité, est que la ratiocination & dis-
 cours humain, ne peut approcher de la
 simplicité de la diuine prescience: que
 si vous la pouuiez en quelque sorte ima-
 giner, & la comprendre, il n'y auroit
 plus rien de quoy vous peussiez doub-
 ter. Mais à la fin i'essayeray de le vous
 descouurir & explicquer, quand ie vous
 auray premierement resolu ce poinct
 qui vous fait esmouuoir. Ie vous de-
 mande, pourquoy pensez vous que
 la raison de ceux qui veulent soul-
 dre ceste question, soit de peu d'effica-
 ce, lesquels pource qu'ils croient que
 la prescience n'est point occasion de ne-
 cessité aux choses futures, croient que
 la liberté de la volonté n'est en façon
du monde empeschée de la prescience:

& vous mesme ne prenez d'ailleurs l'argument de la necessité des choses futures, sinon que d'autant que les choses sont preueuës, elles ne peuuent n'aduenir point. Si donc preuoir les choses auant qu'elles aduiennent ne peut adiouster necessité aux choses futures, ce que vous m'avez n'agueres confessé; pourquoy les effectz volōtaires des choses seront ils contrainctz à vn certain euenement? car posons pour exemple, afin que vous voyez ce qui s'ensuit, qu'il n'y ait point de prescience; dites moy pour le regard de ce qui touche à ce faict, les choses qui procedent de la libre & franche volonté, sont elles contrainctes & soubz-mises à vne necessité? Non, dis-je. Or posons encore, dict-elle, qu'il y ait prescience, & toutesfois qu'elle ne mette aucune necessité aux choses: il est certain que la mesme libre & franche volonté demeurera entiere & absoluë. Mais vous me direz, encores que la prescience ne soit point cause necessaire des choses à venir, toutesfois c'est vn signe que les choses doiuent aduenir necessaire-

ment. Or en ceste sorte, encores qu'il n'y eust de prescience ; il seroit manifeste que les effects des choses futures seroient necessaires. Car tout signe montre seulement ce qui est, mais il ne fait pas estre ce qu'il demonstre, & pour prouuer que la prescience est vn signe de necessité: il faut premierement montrer qu'aucune chose ne peut aduenir, qu'il ne soit necessaire qu'elle aduienne. Autrement si ceste necessité n'estoit point, la prescience & aduantueüe ne pourra estre signe de telle chose, qui n'est point. Il est donc manifeste, que les raisons qui sont appuyées de preuues bien asseurées, ne se tirent pas des signes, ny des arguments, prins d'ailleurs, mais des causes necessaires & qui conuiennent. Mais me direz vous, comme est-il possible que ces choses-là n'aduiennent point que l'on a preueuës. deuoir aduenir ? comme si nous ne croyoions pas ces choses-là deuoir aduenir que la prescience a preueuës. deuoir aduenir : & que nous n'ayons pas plustost opinion que encores qu'elles aduiennent comme elles ont.

esté preueuës, toutcfois elles n'ont de leur nature aucune necessité, qui les contraigne de deuoir aduenir: ce que vous pourrez facilement entendre, parce que ie vous diray. Il y a beaucoup de choses, que lors qu'elles se font, nous les voyons deuant noz yeux, comme nous regardôs ce que font les chartiers, pour conduire leurs chēuaux, & charriots, & ainsi des choses semblables. A sçauoir si aucune necessité cōtraint que l'on face ainsi ces choses? vous me direz que non. Car veritablement l'effect de l'art, seroit vain & inutile, si toutes choses se mouuoient par force. Si donc ces choses quand elles se font, n'ont pas leur estre par necessité, auant qu'elles se facent elles doiuent estre, mais non pas par necessité: & pourtant il y a de certaines choses qui doiuent estre, mais leur euenement est libre de toute necessité. Et ne pense pas qu'aucun vueille dire que ce qui se fait à ceste heure, n'eust deu estre faict auât qu'il se feist. Les choses donc encore qu'elles soient preueuës, ont leurs euenements libres. Car comme la science des choses

présentes, n'apporte aucune nécessité aux choses qui se font: ainsi la prescience des choses futures n'admet aucune nécessité aux choses qui doivent estre. Mais (direz vous) cela dequoy l'on doute, est si l'on peut auoir quelque preuoyance, & auant-connoissance des choses, desquelles les euenemens ne sont nécessaires. Pource qu'il vous semble que telles choses ne s'accordent point, & croyez que si les choses sont preueuës, il est nécessaire qu'elles aduiennent; & si aussi leur euenement n'est pas nécessaire, elles ne se peuuent preuoir, & croyez encore que l'on ne peut sçauoir aucune chose qu'elle ne soit biẽ certaine. Mais si cela dont l'euenement est incertain, se preuoid comme s'il estoit bien certain, il est tout manifeste que c'est vn erreur d'opinion & de iugement, & non pas science veritable: car faire iugement d'une chose autrement qu'elle n'est pas, vous croyez bien que cela est fort esloigné de l'integrité de la science; & ce qui est cause de cest erreur, est que l'on pèse auoir parfaite connoissance des choses, les connoissant

CONSOLAT. DE PHILOS.

selon leur nature , & selon leur force, mais c'est tout le contraire : car tout ce que l'on cognoist , se comprend facilement , non selon sa force , mais selon la faculté & puissance du cognoissant. Et à fin que cela vous soit manifeste par cest exemple , la mesme rotondité d'un corps est cogneuë , & comprins autrement de la veuë , & autrement de l'atouchement : la veuë iettant de loing ses rayons la void tout d'un coup , mais l'atouchemēt ioinct & attaché à la rotondité , comprend les parties d'icelle vne à vne , par les mouuemens qu'il fait autour de sa circonference. L'homme est aussi cogneu par le sens d'une sorte , & d'une autre par l'imagination : autrement encore par la raison , & tout autrement encore par l'intellect. Le sens cognoist la figure suiète à la matiere , & l'imagination iuge seulement la figure , sans la matiere : la raison passe outre , & comprend genoralement les especes , ou formes des Indiuïdus & choses particulieres : & l'intellect qui est l'œil qui void plus outre se guindant par dessus le circuit de l'univers , void & contemple

par les yeux d'un net & pur entendement, ceste simple forme & idée de l'homme. Et en cecy il faut bien considerer que la force & vertu qui embrasse les plus grandes choses, comprend aussi les moindres, & au contraire les inferieures ne peuvent atteindre ny arriuer aux superieures : car le sens ne s'estend point outre la matiere, ny l'imaginatiō ne conoist point les especes vniuerselles ny la raison ne cōprēd pas la forme simple, mais l'intellect regardāt cōme d'un lieu hault & eminent, ayant compris & conceu quelle est la forme, fait iugement & cognoist toutes les choses qui luy sont soubsmises, en la mesme sorte qu'il comprend la forme, qui ne peut estre comprinse d'aucun autre. Car il cognoist l'universel comme la raison, la figure cōme l'imaginatiō, & la matiere cōme le sens. Non pas vsant de raisō, ny de l'imaginatiō, ny du sens, mais voyant toutes choses tout en vn coup & formellement, cōme lon dit, & sans aucun discours. La raison mesmes quand elle regarde quelque vniuersel, elle cōprend.

CONSOLAT. DE PHILOS.

les choses qui sont imaginables, & sensibles, sans vser d'aucune imaginatiō ou d'aucun sens : pource que c'est celle qui donne la diffinition des choses vniuerselles qu'elle comprend. En ceste sorte, l'homme est vn animal raisonnable ayāt pieds. Bien que la notion en soit vniuerselle : toutefois aucun ne peut ignorer, que cela ne soit imaginable & sensible: ce qu'elle cōsidere nō par imagination ou par sens, mais en son discours rationnel. L'imagination aussi encore qu'elle prenne son principe des sens de voir & de former figures; si est-ce, que sans la presence du sens, elle void toutes choses sensibles, non pas qu'elle le iuge par le sens, mais par vne raison imaginatiue. Vous voyez donc qu'en la cognoissance de toutes choses, on vse plustost de sa faculté de cognoistre, que de la nature des choses dont on recherche la cognoissance: & non sans raison. Car puis que le iugement est vne action & operation de celuy qui iuge, il est necessaire que chacun accomplisse & parface son ouurage propre, non à l'appetit d'autrui, mais selon sa volonté.

POEME IIII.

DEa que ces vieux Stoïques
 De l'ancienne saison
 Avecques peu de raison
 Disputoient par les Portiques,
 Que l'ame auoit par le corps
 Des choses intelligence,
 Et que leur forme & semblance
 Ell' receuoit de dehors,
 En ceste sorte & maniere,
 Que dessus le blanc tableau,
 Le peintre de son pinceau,
 Figure le caractère!

Mais si nostre ame ne peut
 De soy quelque chose faire,
 Ains qu'il luy faille parfaire
 Tout cela que le corps veut,
 Qu'elle ayt seulement puissance
 De montrer & faire veoir
 Tout ainsi qu'en vn miroir
 La figure & la semblance:
 D'où vient qu'elle peut ainsi
 Generalement comprendre
 Toute chose & raison rendre
 De chacune à part aussi?

CONSOLAT. DE PHILOS.

D'où cela qu'en ses parties
Vn tout separément met,
Et qu'en vn tout ell' remet
Celles là qui sont partyes?

Qu'elle faiët comparaison,
Des premieres aux dernieres,
Et les dernieres premieres
Fait par contraire raison?

Qu'en soy toutes amassées,
Ensemble les conserant,
Va les faulses separant,
Par leurs contraires poulsées?

Dites, cela n'est ce pas
Raison claire & apparente,
Qu'elle est cause plus puissante,
Que la matiere n'est pas,

Et qu'ell' a plus de pouvoir,
Et de produire & de faire,
Que non pas d'estre matiere
Pour les formes recevoir?

Vray est qu'elle est agitée
Premierement de dehors
Par les passions du corps,
Qui sa force ont excitée.

Si aux yeux quelques obiects,
Ou le son frappe aux oreilles,

*Aussy tost l'ame s'esueille,
S'appareillant aux effects.*

*Les especes recellées,
Qu'elle gardoit au dedans,
Pour s'accommoder aux sens.*

Aussy tost sont appellées.

*Et appropriant alors
Les formes qu'elle a encloses,
Les esgalle & mesle aux choses
Qui se monstrent au dehors,*

SOMMAIRE DE LA

V. PROSE.

• C'est vne preuue speciale que la cognoissance diuine est selon la maniere de celuy qui conoist les choses, non-pas selon la maniere de la chose cogneuë. Puis la Philosophie vient à monstrier l'insuffisance de ceux qui s'arrestans à la faculté que nous auons de conoistre les choses, improuuent la prouidence de Dieu : & en suite nous exhorte à nous élever à la conoissance de la diuine intelligence, laquelle en conoissance excède la raison humaine, & conoist certainement ce que nostre raison ne peult qu'avec incertitude descouurir.

PROSE V.

OR si en la cognoissance & sentiment
 des choses corporelles , les quali-
 tez du dehors immuent & alterent au-
 cunement les instruments des sens, & si
 les passions du corps precedent les for-
 ces de l'esprit agent , tellement qu'elles
 prouocquent l'operation de l'esprit en
 elles, & excitent les formes qui se repo-
 sent au dedans ; si, dis-ie , nostre esprit
 au sentiment des choses corporelles, ne
 reçoit aucune passion , & que neant-
 moins par sa propre vertu , il cognois-
 se quelle passion est suiette au corps:
 Combien mieux à plus forte raison, au-
 ront cognoissance les choses qui sont
 libres de toutes affections , & qualitez
 corporelles? car en faisant iugement, &
 discernant, ils n'y proceder pas selon les
 choses qui se presentent au dehors, mais
 ils agissent selon leur propre nature. Et
 pour ceste occasion à diuerses & diffe-
 rentes substances , il conuient diuerses
 cognoissances , & differentes aussi. Car
 le seul sens corporel a esté donné com-
 me en

me en partage aux animaux, les point de mouuement, comme les conques de la mer, & autres espèces qui sont attachees aux rochers, & s'y naissent: mais elles sont destituées de toute autre cognoissance. A celles qui ont mouuement, & qui semblent auoir vn desir de fuir les choses qui leur sont nuisibles, & de rechercher celles qui leur peuuent profiter, a esté donné l'imagination. Mais la raison appartient aux hommes seulement, comme l'intelligence à la diuinité, qui est cause que ceste cognoissance est plus excellente que toutes les autres, qui de sa propre nature ne cognoist pas seulement ce qu'elle a de propre, mais encore les sujets de toutes les autres cognoissances. Si donc le sens, & l'imagination, s'opposoient au discours, & disoient que cest vniuersel que la raison pense cognoistre, n'est rien, pource qui se peut comprendre avec le sens, ou par l'imagination, ne peut estre vniuersel: Et que partant il est necessaire, ou que le iugement de la raison soit vray, & qu'il n'y ait aucune chose sensible; ou bien puis

N

CONSOLAT. DE PHILOS.

selon leur nature , & selon leur force, mais c'est tout le contraire : car tout ce que l'on cognoist , se comprend facilement , non selon sa force , mais selon la faculté & puissance du cognoissant. Et à fin que cela vous soit manifeste par cest exemple , la mesme rotondité d'un corps est cogneuë , & comprise autrement de la veuë , & autrement de l'atouchement : la veuë iettant de loing ses rayons la void tout d'un coup , mais l'atouchement ioinct & attaché à la rotondité , comprend les parties d'icelle vne à vne , par les mouuemens qu'il fait autour de sa circonference. L'homme est aussi cogneu par le sens d'une sorte , & d'une autre par l'imagination : autrement encore par la raison , & tout autrement encore par l'intellect. Le sens cognoist la figure suiuite à la matiere , & l'imagination iuge seulement la figure , sans la matiere : la raison passe outre , & comprend genoralement les especes , ou formes des Indiuïdus & choses particulieres : & l'intellect qui est l'œil qui void plus outre seguidant par dessus le circuit de l'univers , void & contemple

par les yeux d'un net & pur entendement, ceste simple forme & idée de l'homme. Et en cecy il faut bien considerer que la force & vertu qui embrasse les plus grandes choses, comprend aussi les moindres, & au contraire les inferieures ne peuvent atteindre ny arriuer aux superieures : car le sens ne s'estend point outre la matiere, ny l'imaginatiō ne conoist point les especes vniuerselles ny la raison ne cōprēd pas la forme simple, mais l'intellect regardāt cōme d'un lieu hault & eminent, ayant compris & conceu quelle est la forme, fait iugement & cognoist toutes les choses qui luy sont soubsmises, en la mesme sorte qu'il comprend la forme, qui ne peut estre comprise d'aucun autre. Car il cognoist l'universel comme la raison, la figure cōme l'imaginatiō, & la matiere cōme le sens. Non pas vsant de raisō, ny de l'imaginatiō, ny du sens, mais voyant toutes choses tout en vn coup & formellement, cōme lon dit, & sans aucun discours. La raison mesmes quand elle regarde quelque vniuersel, elle cōprend.

CONSOLAT. DE PHILOS.

les choses qui sont imaginables, & sensibles, sans vser d'aucune imaginatiō ou d'aucun sens : pource que c'est celle qui donne la diffinition des choses vniuerselles qu'elle comprend. En ceste sorte, l'homme est vn animal raisonnable ayāt pieds. Bien que la notion en soit vniuerselle : toutefois aucun ne peut ignorer, que cela ne soit imaginable & sensible: ce qu'elle cōsidere nō par imagination ou par sens, mais en son discours rationel. L'imaginatiō aussi encore qu'elle prenne son principe des sens de voir & de former figures; si est-ce. que sans la presence du sens, elle void toutes choses sensibles, non pas qu'elle le iuge par le sens, mais par vne raison imaginatiue. Vous voyez donc qu'en la cognoissance de toutes choses, on vse plustost de sa faculté de cognoistre, que de la nature des choses dont on recherche la cognoissance: & non sans raison. Car puis que le iugement est vne action & operation de celuy qui iuge, il est necessaire que chacun accomplisse & parface son ouurage propre, non à l'appetit d'autrui, mais selon sa volonté.

POEME IIIL.

DEa que ces vieux Stoiques
 De l'ancienne saison
 Avecques peu de raison
 Disputoient par les Portiques,
 Que l'ame auoit par le corps
 Des choses intelligence,
 Et que leur forme & semblance
 Ell' receuoit de dehors,

En ceste sorte & maniere,
 Que dessus le blanc tableau,
 Le peintre de son pinceau,
 Figure le caractere!

Mais si nostre ame ne peut
 De soy quelque chose faire,
 Ains qu'il luy faille parfaire
 Tout cela que le corps veut,
 Qu'elle ayt seulement puissance
 De monstrier & faire veoir
 Tout ainsi qu'en vn miroir
 La figure & la semblance:

D'où vient qu'elle peut ainsi
 Generalement comprendre
 Toute chose & raison rendre
 De chacune à part aussi?

CONSOLAT. DE PHILOS.

D'où cela qu'en ses parties

Vn tout separément met,

Et qu'en vn tout ell' remet

Celles là qui sont partyes?

Qu'elle faict comparaison,

Des premieres aux dernieres,

Et les dernieres premieres

Fait par contraire raison?

Qu'en soy toutes amassées,

Ensemble les conserant,

Va les faulses separant,

Par leurs contraires poulsées?

Dites, cela n'est ce pas

Raison claire & apparente,

Qu'elle est cause plus puissante,

Que la matiere n'est pas,

Et qu'ell' a plus de pouvoir,

Et de produire & de faire,

Que non pas d'estre matiere

Pour les formes recenoir?

Vray est qu'elle est agitée

Premierement de dehors

Par les passions du corps,

Qui sa force ont excitée.

Si aux yeux quelques obiects,

Ou le son frappe aux oreilles,

*Aussy tost l'ame s'esuïlle,
 S'appareillant aux effects.
 Les especes recellées,
 Qu'elle gardoit au dedans,
 Pour s'accommoder aux sens.*

*Aussy tost sont appellées.
 Et appropriant alors
 Les formes qu'elle a encloses,
 Les esgalle & mesle aux choses
 Qui se monstrent au dehors,*

SOMMAIRE DE LA V. PROSE.

C'est vne preuue speciale que la cognoissance diuine est selon la maniere de celuy qui conoist les choses , non-pas selon la maniere de la chose cogneuë. Puis la Philosophie vient à monstrier l'insuffisance de ceux qui s'arrestans à la faculté que nous auons de conoistre les choses, improuuent la prouidence de Dieu : & en suite nous exhorte à nous éleuer à la conoissance de la diuine intelligence, laquelle en conoissance excède la raison humaine, & conoist certainement ce que nostre raison ne peut qu'avec incertitude descouurir.

PROSE V.

OR si en la cognoissance & sentiment
 des choses corporelles, les quali-
 tez du dehors immuent & alterent au-
 cunement les instruments des sens, & si
 les passions du corps precedent les for-
 ces de l'esprit agent, tellement qu'elles
 prouocquent l'operation de l'esprit en
 elles, & excitent les formes qui se repo-
 sent au dedans; si, dis-ie, nostre esprit
 au sentiment des choses corporelles, ne
 reçoit aucune passion, & que neant-
 moins par sa propre vertu, il cognois-
 se quelle passion est suiuite au corps:
 Combien mieux à plus forte raison, au-
 ront cognoissance les choses qui sont
 libres de toutes affections, & qualitez
 corporelles? car en faisant iugement, &
 discernant, ils n'y procedēt pas selon les
 choses qui se presentent au dehors, mais
 ils agissent selon leur propre nature. Et
 pour ceste occasion à diuerses & diffe-
 rentes substances, il conuient diuerses
 cognoissances, & differentes aussi. Car
 le seul sens corporel a esté donné com-
 me en

LIVRE CINQUIE

me en partage aux animaux, point de mouuement, comme les conques de la mer, & autres especes sont attachees aux rochers, & s'y naissent: mais elles sont destituées de toute autre cognoissance. A celles qui ont mouuement, & qui semblent auoir vn desir de fuir les choses qui leur sont nuisibles, & de rechercher celles qui leur peuuent profiter, a esté donné l'imagination. Mais la raison appartient aux hommes seulement, comme l'intelligence à la diuinité, qui est cause que ceste cognoissance est plus excellente que toutes les autres, qui de sa propre nature ne cognoist pas seulement ce qu'elle a de propre, mais encore les sujets de toutes les autres cognoissances. Si donc le sens, & l'imagination, s'opposoient au discours, & disoient que cest vniuersel que la raison pense cognoistre, n'est rien, pource qui se peut comprendre avec le sens, ou par l'imagination, ne peut estre vniuersel: Et que partant il est necessaire, ou que le iugement de la raison soit vray, & qu'il n'y ait aucune chose sensible; ou bien puis

N

manifeste, que plusieurs choses
 ioubs-mises & suiettes au sens
 d'imagination, que la conception
 de la raison soit vaine, d'autant qu'elle
 considere ce qui est sensible & parti-
 culier, comme vne chose vniuerselle.
 Mais si la raison contrerespondoit, &
 voulust dire qu'elle cognoist bien ce
 qui est sensible, & ce qui est ima-
 ginable, comprenant tout ce que
 l'un & l'autre peuuent cōprendre, mais
 que c'est vniuersellement. Et que telles
 choses ne peuuent paruenir à la co-
 gnoissance de l'vniuersel, pource que
 leur cognoissance ne peut excéder ny
 passer outre les figures corporelles : &
 que traittant de la cognoissance des
 choses, on s'en doibt arrester au plus
 parfaict & assure iugemēt. En ce debat
 nous qui auons la faculté aussi bien de
 discourir, comme d'imagination, & du
 sentimēt, ne tiendrions nous pas le par-
 ty de la raison ? & n'approuueriōs nous
 pas son opiniō ? Ainsi l'humaine raisō ne
 pense pas, que la diuine intelligēce voye
 les choses futures, autrement qu'elle
 mesme les peut voir. Car vous argumē-

tez ainsi, s'il y a quelques choses, lesquelles n'ayent point leurs euenemens certains ny necessaires, certainement on ne peut auparauant sçauoir qu'elles doiuent aduenir: il n'y aura donc aucune prescience de telles choses: & si encore nous voulons croire qu'il y en ait, il n'y aura rien qui n'aduienne par necessité. Mais si comme nous sommes participans de la raison, nous pouuons aussi participer au iugement diuin, comme nous auons iugé le sens & l'imagination deuoir ceder à la raison, aussi deuoins nous iuger que la raison humaine se doit soubmettre à l'intellect diuin. Et pourtant, esleuons nous s'il est possible au sommet de ceste souueraine intelligence, pource que la raison verra là, ce qu'elle ne peut voir en elle mesme: c'est à sçauoir en quelle sorte, ces choses qui n'ont pas leurs euenemens certains, sont cognuës de la certaine & assurée prescience de Dieu, & que cela ne soit point vne opinion, mais plustost vne simplicité de ceste souueraine science, qui n'est bornée ny reserrée en aucuns limites.

POEME V.

Maints & maints animaux porte
 De forme tous differens,
 La terre & en mainte sorte
 Deçà delà sont errans,
 Et ne s'en trouue entre tant,
 Qui se ressemblent pourtant.

Les vns estendus se traynent
 D'un glissement ondoyant,
 Et lentement se pourmeynent,
 La terre autour baloyant,
 Laisans les chemins tracez,
 Par où ilz seront passez:

Les autres d'aisle legere,
 Contre les vents combatans,
 Amont dressent leur carriere,
 Dedans les nues flotans,
 Et trauersent à voler,
 Le grand espace de l'air:

Les autres par les campagnes,
 Ou par les bois escartez,
 Ou sur les haultes montaignes
 Ont leurs seiours arrestez,
 S'esgayans l'herbe fouller,
 N'ont soing que de se saouller:

*Mais de tant & tant de sorte,
 'Aucun d'eux deuers les cieux,
 La teste droicte ne porte,
 Ny hault n'esleue ses yeux:
 Ains vers la terre panchez,
 Ont là leurs sens attachez.*

*L'homme seul a de nature
 Le front esleué en hault,
 Et droicte estant sa figure,
 De la terre ne luy chault:
 Fol sa figure dément,
 Celuy qui fait autrement:*

*Ayant vers les cieux la teste
 Et hault esleué le front.
 Ceste figure admonnest
 D'esleuer l'esprit à mont,
 De peur qu'au corps reserré
 Il ne demeure atterré.*

SOMM. DE LA VI. PROSE.

Icy la Philosophie monstre la maniere de la conoissance diuine & premierement considerer l'estat de Dieu, qui est eternité. Et d'autant que la conoissance suit l'estat de la chose qui conoist, c'est pourquoy la conoissance & science de Dieu suit l'estat & disposition de Dieu. Or l'estat de Dieu est eternal & present,

N iij.

CONSOLAT. DE PHILOS.

attendu que l'estre d'iceluy se mesure par eternité. Parquoy la science de Dieu est eternelle & presente. de façon qu'il conoist les choses & passées & à venir, cōme presentes. En suite ladite Philosophie resolt les obiections faictes cy-dessus contre la prouidence. Puis conclud de son discours, qu'il y a certaines choses qui sont selon elles contingentes & incertaines, lesquelles neantmoins auient par certitude, entrant que Dieu les a preueues. & qu'encore qu'il soit en nostre puissance de changer de dessein, toutefois cette mutation ne fuit point la prescience diuine, attendu que Dieu preconnoist ce changement, laquelle prescience en Dieu demeure nonobstant immuable & ferme. Pour la fin elle donne vne exhortation vtile, à ce que, puisque nos volontez sont libres, non adstreintes à necessité, nous suiuiions la vertu, fuyons le vice, esperions la felicité eternelle, & facions à Dieu prieres, n'ayans en ce siecle autre moyen de discourir avec lui, ni de nous presenter deuant sa face pour demander & obtenir nos necessitez.

PROSE VI.

PVis donc que comme nous auons vn peu auparauant monsté, tout ce qui se sçait, se cognoist non pas par sa nature propre, mais de celuy qui en com-

prend la science : Voyons entant qu'il nous est permis quel est l'estat de la diuine substance, à fin aussi que nous puissions cognoistre quelle est sa science. C'est le commun iugemēt de tous ceux qui viuent avec raison , que Dieu est eternek. Considerons donc que c'est que l'eternité : car elle nous fera conoistre , par mesme moyen , & la nature diuine , & sa science. L'eternité est possession parfaicte, d'une vie indeterminée, & infinie, & qui ne doit iamais diminuer : ce qui sera plus manifeste, par la comparaison des choses temporelles. Car quiconque vit à certain temps , estant à present, procede du passé à l'aduenir, & n'y a aucune chose temporelle , qui puisse comprendre tout ensemble, & embrasser entierement tout le temps qu'elle a à viure : car elle ne peut encores embrasser le iour de demain, & celuy d'hier est desia perdu , & l'heure presente n'est autre chose qu'un petit moment que vous vivez, & s'escoule si legerement, qui se nomme present. Ce donc qui est soubs-mis à la condition du temps , encore qu'il n'ait iamais

N iijj

commencé à estre, & ne cesse iamais d'estre, tellement que sa vie soit (comme Aristote a estimé du monde) il n'est pas pourtant tel, que l'on le puisse à bon droit croire eternal. Car encore qu'il comprenne l'espace d'une infinie, il ne comprend & embrasse pas tout d'un coup, pource qu'il n'a plus le passé, & n'a pas encore l'aduenir. Ce donc qui comprend & possède tout à la fois, & en un moment toute la plénitude & espace d'une vie inderminée: auquel le futur n'est point caché, & le passé ne l'a point abandonné; cela à bon droit se peut nommer eternal. Qui estant bien composé de soy il est necessaire qu'il soit tousiours present à luy-mesme, & qu'il ait tousiours presenté l'infirmité du temps mobile, d'où vient qu'aucuns, ayans ouy que l'opinion de Platon, estoit que ce monde n'auoit iamais eu commencement de temps, & ne deuoit iamais auoir fin; se font croire, qu'estant le monde tel, il est fait coëternal avec son facteur. Mais c'est une autre chose, estre mené par une vie interminée, & infinie, ce que Pla-

ton attribue au monde : & autre chose
 que la presence d'une vie interminée,
 qui est comprise & embrassée en vne v-
 nité de temps. Et il est tout manifeste
 que cela est propre à l'intellect diuin, &
 Dieu ne doit pas sembler plus ancien
 que les choses par luy faictes, eu esgard
 à la quantité du temps, mais bien selon
 la propriété de sa simple nature, pour-
 ce que le mouuement infini des choses
 temporelles, imite l'estat de la vie im-
 mobile, &eternelle, qui a tousiours tout
 present, & ne pouuant ny en approcher
 ny l'esgaller, il quitte l'immobilité, &
 vient à estre muable, & d'une simplicité
 de presence, croist en vne infinie quan-
 tité de futur & du passé : & ne pouuant
 posseder tout l'espace de sa vie tout en-
 semble, il semble d'autant qu'il ne ces-
 se iamais d'estre, qu'il vueille contre-
 faire & s'esgaller à ce qu'il ne peut ac-
 complir, ny parfaitement exprimer en
 sorte que ce soit, s'attachant à la presen-
 cetelle, quelle peut estre ce petit & le-
 ger moment : Laquelle pource qu'elle a
 ie ne sçay quoy, qui ressemble à ceste
 prescience immuable, elle fait que ce à

N.

quoy elle s'approche , tel semble elle estre. Mais d'autant qu'elle ne peut demeurer ferme & immobile , elle a prins vn chemin de temps infini, & ainsi continué sa vie, allant tousiours outre, l'espace de laquelle elle n'a peu comprendre, en demeurant ferme & immobile. Et si nous voulons en imitant Platon donner noms propres & conuenables aux choses, Dieu est veritablement eternal, & le monde perpetuel. Puis donc que tout iugement compréd de sa propre nature, les choses qui luy sont souz-mises , Dieu a sa condition tousiours eternelle , & luy est tousiours ensemble presente, & la science de luy outre-passant tout mouuement de temps, demeure ferme & arrestée en la simplicité de sa presence : comprenant infiniz espaces du passé & de l'aduenir, & void toutes choses en sa simple cognoissance, comme si elles se faisoient à l'heure mesme. Si vous voulez donc penser, quelle est la prescience , par laquelle Dieu cognoist toutes choses , ce sera mieux faict de croire que ce soit vne science des choses presentes , qui ne defaut iamais, que de penser que ce

soit vne prescience des choses futures.
 Et pourtant on la doibt nommer pro-
 uidence, & non preuoyance. Pource
 qu'eslongnée des choses basses & in-
 fines, elle void comme d'un hault lieu
 toutes choses. Pourquoi voulez vous
 donc que ces choses se facent neces-
 sairement, qui sont veuës de l'œil di-
 uin, puis que les hommes ne font pas
 necessairement les choses qu'ils voyent?
 Vostre veuë admet-elle necessité aux
 choses que vous voyez presentement?
 Non: mais s'il est raisonnable de paran-
 gonner ce qui est diuinement present
 avec l'humain, comme vous voyez les
 choses en presence temporelle, ainsi
 les void l'œil diuin en vne eternelle
 presence. Et pource que ceste prescien-
 ce diuine, ne change la nature, ny
 la propriété des choses, & sont à
 present telles deuant elle, qu'elles
 estoient le passé, & qu'elles seront
 à l'aduenir, & ne confond point le
 iugement des choses: mais avec un
 seul regard de sa prouidence void tou-
 tes choses, comme celles qui necessaire-
 ment doiuent estre, cōme les autres qui:

N vj.

n'ont point leur euenement necessaire:
 Tout ainsi qu'en vn mesme temps, vous
 voyez vn homme marcher sur la terre,
 & le soleil s'esleuer au ciel. Car encore
 que vous voyez & l'un & l'autre en-
 semble, vous congnoissez bien que
 l'un est volontaire, & l'autre neces-
 saire. Ainsi l'œil diuin, voyant tout, ne
 trouble point la qualité des choses qui
 luy sont tousiours presentes, mais futu-
 res au regard de la condition du temps.
 D'où vient que quand il cognoist quel-
 que chose deuoir aduenir, de laquelle
 toutesfois l'euenement n'est pas neces-
 saire, ce n'est pas vne opinion cela: mais
 plustost certaine cognoissance qui est
 fôdée & appuyée de la vertu. Et si vous
 me dites que ce que Dieu void, qui doit
 aduenir, ne peut n'aduenir point: & que
 ce qui ne peut aduenir point, il est bien
 force qu'il n'aduiene, me cōtraignât à ce
 nom de necessité: ie vous confesseray
 bien vne chose, qui est bien certainemēt
 vraye, mais telle qu'à peine aucun
 y pourra-il consentir, si ce n'est vn
 qui soit rauy à la contemplation des
 choses diuines. Car ie vous respondray,

que ce qui est futur, quand il se refere à la cognoissance de Dieu, est necessaire, & quand il considere selon sa propre nature, il semble libre du tout, & non contrainct. Car il y a deux sortes de necessitez, l'une simple, comme quand nous disons, qu'il est necessaire que tous les hommes soient mortels : l'autre conditionnelle, cōme si vous sçavez que quelqu'un voyage, il est necessaire qu'il voyage. Pource que qui est cogneu de quelqu'un ne peut estre autre, que l'on le cognoist. Mais ceste necessité cōditionnée, ne tire pas apres elle la simple necessité : car sa nature ne la fait pas necessité, mais bien sa conditiō qui y est adioustée. Pource qu'aucune necessité ne peut contraindre à voyager vn qui voyage de sa propre & libre volonté, bien que tandis qu'il chemine, il soit necessaire qu'il marche : & en ceste mesme sorte, si la providence void quelque chose de present, il est bien necessaire qu'il soit, bien qu'il n'ait de sa nature aucune necessité. Mais, me pourrez vous dire, Dieu void toutes les choses futures qui procedent de la liberte du vouloir, comme si elles estoient :

presentes? Ces choses donc, au regard de
 Dieu, sont nécessaires par le moyen de la
 cognoissance diuine : mais si on les cōsi-
 dere en elles mesmes, elles ne sont point
 hors de la pleine liberté de leur natu-
 re. Sans doubte donc toutes choses se
 font, lesquelles Dieu preuoid deuoir e-
 stre faictes : mais aucunes procedent de
 la libre volonté, lesquelles encore qu'el-
 les aduiennent pource qu'elles sont, ne
 perdent pas pourtant leur propre natu-
 re, pource qu'auant qu'elles aduinssent,
 elles pouuoient bien n'aduenir point.
 Qu'importe, direz-vous, & quelle diffe-
 rence faites vous entre celles qui ne sont
 point nécessaires, si-eu esgard à la condi-
 tion de la cognoissance de Dieu, elles ad-
 uiennent en quelque sorte que ce soit,
 ne plus ne moins que si elles estoient ne-
 cessaires? En cela vous respondray-ie, que
 ils sont differents comme les choses que
 ie vous ay n'aguères alleguées. Le Soleil
 quand il s'esleue, & l'homme quand il
 marche, cependât que ces choses se font,
 il est nécessaire qu'elles soient, & ne se
 peut faire autrement, qu'elles ne se facēt.
 & toutesfois il estoit nécessaire que l'y-

ne des deux aduint auant qu'elle se fist,
 mais non pas l'autre: semblablement les
 choses que Dieu a presentes sont sans
 aucun doute: mais l'un des deux prouiet
 de la necessité des choses, l'autre, du pou-
 uoir de ceux qui le font. Ce n'est point
 donc hors de propos, que nous disons,
 que si ces choses se referent à la diuine
 cognoissance, qu'elles sont necessaires, &
 si par soy on les considere, elles sont hors
 les liens de la necessité: ainsi comme ce
 qui est certain & manifeste au sens, si
 vous le referez à la raison, est vniuersel:
 mais si vous prenez garde à ce que c'est,
 ce sera vne particularité. Mais, me direz-
 vous, s'il est en ma puissance de changer
 ma deliberation, ie rendray vaine & nul-
 le la prouidence, pource qu'à l'aduenture
 changeray- ie les choses qu'elle a aupara-
 uant preuëes. Je vous respondray à ce-
 la, que vous pouuez bien changer vostre
 deliberation, mais pource que la verité
 presente de la diuine prouidence, void,
 & que cela est en vostre puissance, & si
 vous le deuez faire, & à quoy vous vous
 resouldrez, ie vous dis que vous ne pou-

uez eschapper la diuine prouidēce: Ainsi que vous ne pouuez empescher que l'œil qui vous aura present pour son obiect, ne vous voye: combien que vous ayez la volonté libre de vous appliquer à plusieurs choses. Comment donc, la diuine prouidence se changera elle, selon ma disposition, qu'il semble que quand ie voudray tantost vne chose & tantost vne autre, elle chāge de cognoissance, & tantost sçache vne chose, & tantost sçache l'autre alternatiuement? Non certes, pource que Dieu void tout ce qui est de futur, & doit estre, & le reuocque & retire à la presence de sa propre science, & ne chāge ny ne mue point la cognoissance d'vne chose, & puis d'vne autre, cōme vous pensez. Mais tout en vn coup ferme & asseuré, il preuient & comprend toutes vos mutations & changemens. Et n'a point ceste vertu de comprendre toutes les choses futures, & les veoir presentes, de l'euenement d'icelles, mais de sa propre & simple nature: & par là se resoult ce que vous auez n'agueres dict, qu'il estoit indigne que les choses futures fussent cause de la prescience de Dieu.

pour ce que ceste force & vertu de ſçauoir toutes choſes, qui comprend tout avecq' vne cognoiſſance preſente, a mis vn moyen & vn ordre à toutes les autres choſes, mais elle ne leur eſt point pour cela redeuable ny obligée. Eteſtant ces choſes ainſi, la liberté & franchise de volonté demeure aux mortels entiere, ny les loix ne propoſent point iniuſtement loyer & peine, eſtans nos volontez libres & deſliées de toute neceſſité: Et Dieu demeure là hault immobile ſpectateur, & preuoyant toutes choſes de ſon throſne & ſiege Royal, & ſon eternelle viſion ſe rencontre touſiours en preſent, avec la future qualité de nos operations, diſtribuant aux bons guerdon & loyer de leur bonté, & peine & ſupplice aux mauuais pour chaſtiment de leur méſchanceté. Ce n'eſt donc point en vain ny pour neant que l'on met en Dieu ſon eſperance, & que l'on luy fait prieres: leſquelles ſi elles ſont iuſtes, elles ne ſont point inutiles, & ſans efficace. Fuyez & contrariez donc le vice, & exercez vous à vertu, eſleuez voſtre eſprit à eſperances iuſtes, & faites prieres au ſouuerain de

CONS. DE PHIL. LI. CINQ.
toutes choses: efforcez vous d'estre bós,
& ne vous y feignez point. car vous en
auez grand besoin: estans toutes vos œu-
res & vos actions deuant vn iuge qui
void & cognoist toutes choses.

Fin de la Consolation de la Philosophie,
par SEVERIN BOEC.



